

MATYU

Yesus Kristus aqa moma naŋgo ñam kalil

¹ Endi Yesus Kristus aqa moma naŋgo ñam kalil. Yesus Kristus a Devit aqa leŋ na ɿambabej. Devit a Abraham aqa leŋ na ɿambabej.

² Abraham a Aisak aqa abu. Aisak a Jekop aqa abu. Jekop a Juda aqa was naŋgi ti naŋgo abu.

³ Juda a Peres Sera wo naŋgo abu. Naŋgo ai Tamar. Peres a Hesron aqa abu. Hesron a Ram aqa abu.

⁴ Ram a Aminadap aqa abu. Aminadap a Nason aqa abu. Nason a Salmon aqa abu.

⁵ Salmon a Boas aqa abu. Boas aqa ai Rahap. Boas a Obet aqa abu. Obet aqa ai Rut. Obet a Jesi aqa abu.

⁶ Jesi a Mandor Koba Devit aqa abu.

Devit a Solomon aqa abu. Solomon aqa ai a nami Uriā aqa ɿauŋ soqnej.

⁷ Solomon a Rehoboam aqa abu. Rehoboam a Abiya aqa abu. Abiya a Asa aqa abu.

⁸ Asa a Jehosafat aqa abu. Jehosafat a Jehoram aqa abu. Jehoram a Usia aqa abu.

⁹ Usia a Jotam aqa abu. Jotam a Ahas aqa abu. Ahas a Hesekia aqa abu.

¹⁰ Hesekia a Manase aqa abu. Manase a Emon aqa abu. Emon a Josaia aqa abu.

¹¹ Josaia a Jehoiakin aqa was naŋgi ti naŋgo abu. Aqa batí qa jeu tamo naŋgi na Israel naŋgi tont-njsib joqsib Babilon qureq di taqatnjresoqneb.

12 Babilon qureq di nañgi tontnijnab sonabqa Jehoiakin aqa aŋgro Sealtiel a ŋambabej. Sealtiel a Serubabel aqa abu.

13 Serubabel a Abiut aqa abu. Abiut a Eliakim aqa abu. Eliakim a Asor aqa abu.

14 Asor a Sadok aqa abu. Sadok a Akim aqa abu. Akim a Eliut aqa abu.

15 Eliut a Eleasar aqa abu. Eleasar a Matan aqa abu. Matan a Jekop aqa abu.

16 Jekop a Josep aqa abu. Josep a Maria aqa gumbulunj.

Maria aqa miliq na Yesus a ŋambabej. Nañgi a qa mareqnub, a Kristus.

17 Deqa Abraham aqaq dena bosi bosiq Devit a ŋambabej di moma 14. Devit aqaq dena bosi bosiq Israel nañgi Babilon qureq di soqneb di dego moma 14. Nañgi Babilon qureq di soqneb dena bosi bosiq Kristus a ŋambabej di dego moma 14.

Yesus Kristus a ŋambabej

18 Yesus Kristus a endegsi ŋambabej. Aqa ai Maria Josep na oqajqa saga qameb. Ariya Josep a Maria ombla ŋereñosaisonabqa Mondor Bole a Maria aqaq ainaqa a gumanjej.

19 Onaqa Maria aqa gumbulunj Josep a endegsi quej, “Maria a gumanjqo.” Josep aqa kumbra tulanq boledamu deqa a endegsi are qalej, “E lumu na Maria uratqai. E boleq di uratqasai. Maria a jemaiyo uge.”

20 Degsi are qaleqnaqa Tamo Koba aqa laŋ aŋgro bei a Josep aqaq ainaqa ŋeiobilqe na unej. Unnaqa laŋ aŋgro na minjej, “O Josep, Devit aqa moma, ni

Maria ame. Ni ulaaim. Ni que. Mondor Bole a Maria aqaq aiqoqa a gumanjø.

²¹ Deqa a aŋgro mel oqas. Amqa bunuqna aŋgro dena aqa segi tamo uŋgasari naŋgo une kobotet-njrsim naŋgi elenqas. Deqa ni aqa ñam Yesus waiyqam.”

²² Kumbra kalil di brantej deqa anjam bei Tamo Koba aqa medabu o tamo bei nami marej qaji di aqa damu brantej. A endegsi marej,

²³ “Niŋgi quiy. Bunuqna duŋgeŋe bei a tamo ombla ḡereŋosaisosimqa a gumanjosim aŋgro mel oqas. Amqa naŋgi aqa ñam Emanuel waiyqab.” Ñam di aqa damu, “Qotei a iga koba na unum.”

²⁴ Onaqa Josep a qutuosiqa Tamo Koba aqa laŋ aŋgro na anjam minjej qaji di dauryosiqa Maria ej.

²⁵ Bati deqa a Maria ombla ḡereŋosaioqneb. Gilsi gilsiq Maria a aŋgro mel ej. Onaqa Josep na aŋgro di aqa ñam Yesus waiyej.

2

Bongar sisiyo qaji tamo naŋgi Yesus unqajqa beb

¹ Yesus a Betlehem qureq di ɿambabej. Qure di Judia sawaq di unu. Bati deqa Mandor Herot a Judia sawa taqatesoqnej. Yesus a ɿambabonaqa bongar sisiyo qaji tamo qudei naŋgi seŋ oqo sawaq na walwelosib gilsib Jerusalem qureq di brantosib tamo qudei naŋgi endegsib nenemnjroqneb,

² “Juda naŋgo mandor koba ɿambabej qaji a qabi unu? Iga seŋ oqo sawaq di aqa bongar unsimqa dauryosim bonum. Iga a qa louqajqa deqa bonum.”

³ Onaqa Mandor Herot a naŋgo anjam di quisiqa a are koba qaloqnej. Tamo uŋgasari kalil Jerusalem di soqneb qaji naŋgi dego are koba qaloqneb.

⁴ Deqa Herot a Israel naŋgo atra tamo kokba ti naŋgo dal anjam qalie tamo naŋgi ti kalil metnır-naqa naŋgi bosib koroonabqa a na naŋgi endegsi nenemnjrej, “Kristus a qabia ɻambabqas?”

⁵ Onaqa naŋgi na kamba minjeb, “Kristus a Betlehem qureq di ɻambabqas. Qure di agi Judia sawaq di unu. Qotei aqa medabu o qaji tamo bei a nami endegsi nengreŋyej,

⁶ ‘O Betlehem tamo uŋgasari, nungo qure Judia sawaq di unu. Qure kokba kalil Judia sawaq di unub qaji naŋgi na nungo qure bunyqasai. Di kiyaqa? Nungo qureq dena gate koba bei tigelosimqa a na ijo segi Israel tamo uŋgasari naŋgi taqatnırqas.’ ”

⁷ Onaqa Herot a anjam di quisiqa bongar sisiyo qaji tamo naŋgi lumu na metnırnaqa naŋgi aqa areq bonabqa nenemnjrej, “Bati gembu bongar di brantej?”

⁸ Onaqa naŋgi bongar brantej qaji aqa batı di ubtosib Herot minjnabqa a na kamba minjrej, “Niŋgi Betlehem aisib aŋgro deqa geregere ɻamoiy. Namosib a tal qabi unu di unsib bosib e merbiy. Yim e kamba aisiy a qa louqai.”

⁹ Onaqa naŋgi Mandor Herot aqa anjam di quisib Betlehem aiyeb. Aisib ɻam atsibqa bongar nami ser oqo sawaq di uneb qaji di namo aisiq aŋgro soqnej qaji tal di tiŋsi sonaq uneb.

¹⁰ Unsib naŋgi tulaŋ areboleboleinjrej.

11 Onaqa naŋgi tal miliq gilsib aŋgro aqa ai Maria wo sonab unjrsibqa aŋgro aqa areq di sinja pulutosib a qa loueb. Osib naŋgo qasarŋ iŋgi iŋgi qudei ti gol ti goreŋ ti qa ti walaqajqa quleq bole bole di eleŋosib aŋgro atraiyeb. Iŋgi iŋgi di naŋgi nami silali kokba na awaiyeleŋeb.

12 Ariya naŋgi tal uratosib olo puluqa laqnabqa Qotei a ɻeiobilqeи na minjrej, “Ninŋi olo Herot aqaq di brantaiib.” Degsi minjrnaqa naŋgi gam bei dauryosib naŋgo segi qure utruq aiyeb.

Josep na Yesus aqa ai wo joqsiq Isip sumeb

13 Naŋgi ainabqa bati di Tamo Koba aqa lan aŋgro bei a Josep aqaq gilsiq ɻeiobilqeи na minjej, “Herot a bosim aŋgro Yesus qalsim moiytqajqa ɻamqas. Deqa ni tigelosim aŋgro aqa ai wo joqsim Isip sawaq sumiy. Sumsib di soqnibqa bunuqna e ni mermitqa sawa endeq olo bqab.”

14 Onaqa Josep a qolo tigelosiqa aŋgro aqa ai wo joqsiq Isip sawaq sumeb.

15 Sumsib di sonabqa bunuqna Herot a moiyej. Josep a kumbra di yej deqa anjam bei Tamo Koba aqa medabu o tamo nami marej qaji di aqa damu brantej. A endegsi marej, “Ijo aŋgro mel a Isip sawaq di soqnimqa e dena metit a Isip sawa uratosim ijoq bqas.”

Qaja tamo naŋgi na aŋgro mel naŋgi ɻumeleŋeb

16 Herot a bongar sisiyo qaji tamo naŋgi qa tarinjonaq ugeiyonaq qalieej, naŋgi a gisanjeb. Deqa a minjinj ani oqetonaqa aqa qaja tamo qudei naŋgi qariŋnjrnaqa aisib Betlehem qureq di aŋgro mel kiñilala wausau aiyel osaisoqneb qaji naŋgi

kalil ñumeleñosib moiyoñjreb. Qure qure Betlehem jojomq di soqneb qaji dia dego aŋgro mel kiñlala wausau aiyel osaisoqneb qaji naŋgi kalil moiyoñjreb. Herot a bongar brantej qaji aqa batı dauryosiq kumbra degyej.

¹⁷ Deqa anjam bei Qotei aqa medabu o tamo Jeremaia nami marej qaji di aqa damu brantej. A endegsi marej,

¹⁸ “Rama qureq di Resel a akamkobaqnsiq pail-oqnej. Aqa aŋgro kalil naŋgi ñumnab moreñeb deqa akameqnaqa tamo uŋgasari naŋgi aqa are latetqa yeqnab a naŋgo anjam quqwa uratoqnej. Di kiyaqa? Aqa aŋgro kalil naŋgi moreñekriteb deqa.”

Josep na Yesus aqa ai Maria wo joqsiq olo Israel sawaq beb

¹⁹ Bati Herot a moinaqa Tamo Koba aqa laŋ aŋgro bei a Isip sawaq di Josep aqaq di brantosiqa ñeiobilqe na minjej,

²⁰ “Ni tigelosim aŋgro kiñala Yesus aqa ai Maria wo joqsim olo Israel sawaq gile. Tamo naŋgi Yesus qalsib moiyoñta maroqneb qaji naŋgi moreñekriteb deqa ni olo gile.”

²¹ Onaqa Josep a tigelosiqa Yesus aqa ai Maria wo joqsiq olo Israel sawaq gilej.

²² Bati deqa Arkelaus a na aqa abu Herot aqa sawa osiq Judia sawa taqatesoqnej. Deqa Josep a anjam di qusiqa Judia sawaq gilqa ulaej. Onaqa Qotei a Josep ñeiobilqe na minjej, “Ni Galili sawaq gile.”

²³ Onaqa Josep a Qotei aqa anjam di dauryosiqa Galili sawaq gilej. Gilsiq qure bei aqa ñam Nasaret

di soqnej. A di soqnej deqa anjam bei Qotei aqa medabu o tamo qudei naŋgi nami maroqneb qaji di aqa damu brantej. Naŋgi endegsib maroqneb, “Naŋgi a qa maroqnqab, ‘A Nasaret tamo.’ ”

3

Jon yansnjro qaji a Qotei aqa anjam palontoqnej

¹ Bunuqna Jon yansnjro qaji a Judia naŋgo wadau sawaq di brantej. Brantosiq dia tamo uŋgasari naŋgi Qotei aqa anjam palontosiq endegsi minjroqnej,

² “Qotei laŋ qureq di unu qaji a nuŋgo Mandor Koba sosim niŋgi taqatŋgwajqa bati jojomqo. Deqa niŋgi are bulyiy.”

³ Jon a kumbra degyej deqa anjam bei Qotei aqa medabu o tamo Aisaia nami marej qaji di aqa damu brantej. A Jon qa endegsi marej, “Tamo bei a wadau sawaq di tigelosimqa a tulan leleŋjoqnsim tamo uŋgasari naŋgi endegsim minjroqnas, ‘Tamo Koba a bqajqa gam gereiyetiy. Gam tingitetiy.’ ”

⁴ Jon a wadau sawaq di sosiqa a gara jugo kamel aqa junjum na gereiyo qaji di jugoqnsiqa alalag na singilatosiq laqnej. A iŋgi uyo saiqoji deqa a sis ti bisim qaq ti uyoqnej.

⁵ Bati deqa tamo uŋgasari Jerusalem di soqneb qaji naŋgi ti Judia sawaq di soqneb qaji naŋgi ti qure kalil Jordan ya qalaq di soqneb qaji naŋgi ti tigelosib Jon aqa areq boqneb.

⁶ Boqnsibqa naŋgo une kalil babteqnab Jon na Jordan yaq di yansnjroqnej.

⁷ Bati deqa Farisi tamo ti Sadyusi tamo ti tulan̄ gargekoba nañgi Jon na yansn̄jrqa marsibqa aqa areq beqnabqa unjrsiqa nañgi endegsi min-jroqnej, “Nin̄gi kumbra uge yo qaji tamo. Nin̄gi amal uge bul. Nin̄gi yai na mern̄gwoqa mondon̄ Qotei aqa minjin̄ nun̄goq aiyaim deqa ulaosib ijoq bonub?

⁸ Nin̄gi are bulyosib nun̄go kumbra uge kalil uratosib kumbra bole bole yoqniy. Yim e unsiy marqai, ‘Bole, nin̄gi are bulyonub.’ Osiy nin̄gi yansñgwai.

⁹ Nin̄gi endegsib are qalaib, ‘Abraham a gago moma utruunu deqa iga Qotei aqa ñamgalaq di tamo bole.’ Nin̄gi degsib are qalaib. Nin̄gi quiy. Qotei na marimqa meniñ kalil endi dego tamo bulyosib tigelosib Abraham aqa moma brantqab.

¹⁰ Qotei na tapor qalat ojsiqa ñam qomqajqa utruq di atej unu. Deqa ñam kalil gei bole atosaieqnub qaji di Qotei na tapor dena qomeleñosim ñamyuwoq di breinjrqas.

¹¹ “Nin̄gi are bulyqajqa deqa e ya na nin̄gi yansñgeqnum. Ariya Tamo Koba a bunuqna ijo qoreq na bqas. A tamo singila koba. Ijo singila aqa singila ti keresai. Deqa e a kañgalyqajqa e tamo bolesai. A bosimqa Mondor Bole aqa singila na ti ñamyuwo na ti nin̄gi yansñgwas.

¹² A bem sum ñoqoryosim damu eleñosim aqa talq di atqas. Osim a bem sum aqa suwi breinjrim ñamyuwo gaigai yuejunu qaji dia yuekritqab.”

Jon na Yesus yansej

¹³ Bati deqa Yesus a Galili sawaq dena tigelosiqa walwelosiq Jordan yaq gilej. A Jon na yansqa

marsiqa aqa areq gilej.

¹⁴ Gilnaqa Jon na saidyosiq minjej, “Ni e yans-bqam di kere. Kiyaqa e ni yansmqa marsim ijoq bonum?”

¹⁵ Onaqa Yesus na kamba minjej, “Uŋgum. Ni ijo anjam dauryosim e yansbe. Yimqa kumbra dena iga Qotei aqa areqalo kalil keretosim dauryqom.” Onaqa Jon a Yesus aqa anjam di dauryosiqa a yansez.

¹⁶ Yesus a yanso osiqa a yaq na tigelosiqa tarosiq laŋ goge koqyonaqa laŋ waqej. Laŋ waqonaqa Qotei aqa Mondor a binor bulosiq aisiq Yesus aqa jejamuq di awoonaq unej.

¹⁷ Unnaqa laŋ goge dena Qotei aqa anjam bei endegsi brantej, “Endi ijo aŋgro qujai. E a tulan qalaqalaiyeqnum. E a qa tulan areboleboleibequ.”

4

Satan a bosiq Yesus walawalaiyoqnej

¹ Onaqa bati deqa Mondor a Yesus wadau sawaq osi gilsicha di uratonaqa Satan bosiqa Yesus a une bei atqa marsiqa walawalaiyoqnej.

² Qanam 40 qolo 40 Yesus a wadau sawaq di soqnej. Sosiqa ingi uratoqnsiqa qurieŋ ti soqnej. Deqa bati 40 di koboonaqa a mamyej.

³ Onaqa walawalaiyo tamo Satan a Yesus aqa areq bosiqa minjej, “Ni Qotei aqa Niriamqa meniŋ kalil endi minjrim bem bulyibqa ni uye.”

⁴ Degsi minjnaqa Yesus na kamba minjej, “Qotei aqa anjam bei nami endegsib neŋgrenyeb unu, ‘Tamo nanji ingi uyo na segi ɻambile sqasai. Anjam

kalil Qotei aqa medabuq na branteqnu qaji dena nañgi ñambile sqab.’ ”

⁵ Onaqa Satan na Yesus olo osiqa Qotei aqa qure koba Jerusalem gilsiq atra tal quraq oqsiq goge dia Yesus atsiqa minjej,

⁶ “Ni Qotei aqa Niriamqa endena prugosim mandamq aiye. Agi Qotei aqa anjam bei nami endegsib neñgrenyeb unu, ‘Qotei na aqa lañ añgro nañgi minjrimqa bosib ni taqatm̄qab.’ Anjam bei dego neñgrenyq di unu. Anjam agiende, ‘Lañ añgro nañgi bosib bañ na ni soqtmibqa ino singa meniñ na qalqasai.’ ”

⁷ Onaqa Yesus na kamba Satan minjej, “Qotei aqa anjam bei dego neñgrenyq di unu. Anjam agiende, ‘Ni ino Tamo Koba Qotei aqa singila laña tenemtqa osim a gisanýaim.’ ”

⁸ Degsi minjnaqa Satan a Yesus olo osiqa mana goge kobaq oqsiq dia Yesus tigeltoсиqa sawa sawa kalil mandor kokba nañgi na taqatejunub qaji nango singila ti ñoro ti di Yesus osoryosiqa minjej,

⁹ “Ni ijo ulatamuq endi singa pulutosim e qa louimqa sawa sawa kalil di nañgo singila ti ñoro ti ni emqai.”

¹⁰ Onaqa Yesus na minjej, “Satan, ni ulañ. Qotei aqa anjam bei nami endegsib neñgrenyeb unu, ‘Ino Tamo Koba Qotei a segi qa louoqnsimqa aqa sorgomq di soqne.’ ”

¹¹ Degsi minjnaqa Satan a Yesus uratosiq ulañej. Onaqa Qotei aqa lañ añgro nañgi bosib Yesus singilatoqneb.

Yesus a olo Galili sawaq gilej

12 Bati bei Jon a tonto talq di waiyonab sonaqa Yesus a di qusiqa olo tigelosiq Galili sawaq gilej.

13 Gilsiq Nasaret qureq di brantej. Dena walwelosiqa Kaperneam qureq gilsiq di soqnej. Kaperneam qure agi Galili ya agu kobaquja qalaqsi unu. Ya agu jojomq di Sebulun sawa ti Naptali sawa ti unub.

14 Yesus a Kaperneam qureq gilej deqa anjam bei Qotei aqa medabu o tamo Aisaia nami marej qaji di aqa damu brantej. A endegsi marej,

15 “Gam kobaquja Jordan ya qalaq dena aiyejunu qaji di Galili sawa ambleq na aiyejunu. Aisiq yuwalq di dinnejunu. Gam qalaq di Sebulun ti Naptali ti unub. Sawa bei bei qaji naŋgi beleñosib Galili di unub.

16 Deqa tamo uŋgasari ambruq di unub qaji naŋgi puloŋ kobaquja unqab. Tamo uŋgasari padalo gam dauryosib ambruq di unub qaji naŋgi puloŋ dena suwantnjqras.”

Yesus na tamo qolqe naŋgi metnjrnaq a dauryeb

17 Bati deqa Yesus na aqa wau utru atsiqa Qotei aqa anjam palontoqnsiqa tamo uŋgasari naŋgi endegsi minjroqnej, “Qotei laŋ qureq di unu qaji a nuŋgo Mandor Koba sosim niŋgi taqatŋgwajqa batijojomqo. Deqa niŋgi are bulyiy.”

18 Osiqa a Galili ya agu qalaq aisiq alile dia walwelqnsiqa ñam atej di Saimon aqa ñam bei Pita aqa was Andru wo sonabunjrej. Naŋgi aiyel qe o qaji tamo soqneb deqa naŋgi kakaj waiyeqnab unjrsiqa minjrej,

19 “Niŋgi e daurbiy. Niŋgi qe o qaji tamo unub deqa niŋgi qe eqnub. Dego kere e wau enjgitqa niŋgi olo tamo oqnqab.”

20 Yesus a naŋgi degsi minjrnaqa naŋgi naŋgo kakaj uratosib Yesus dauryeb.

21 Onaqa Yesus a olo walwelosiq aisiqa Sebedi aqa ŋiri Jems aqa was Jon wo naŋgi aiyel qobun miliqiq di naŋgo abu ti kakaj braŋo qandimeqn-abqa unjrsiqa metnjrej.

22 Metnjrnaqa naŋgo abu Sebedi a qobun miliqiq di sonaqa uratosib Yesus dauryeb.

Yesus a Qotei aqa anjam palontoqnsiqa ma tamo naŋgi boletnjroqnej

23 Yesus a dena walwelosiqa Galili sawa keretqnsiqa Juda naŋgo Qotei tal miliqiq giloqnsiqa dia Qotei aqa anjam palontoqnej. Qotei na aqa segi tamo ungasari naŋgi taqatnjrsim naŋgo Mandor Koba sqas anjam bole di Yesus na palontoqnej. Osiqa tamo ma utru segi segi kalil naŋgi boletnjroqnej.

24 Yeqnaqa tamo ungasari kalil Siria sawaq di soqneb qaji naŋgi Yesus qa quoqnsib deqa tamo ma utru segi segi joqsib aqa areq boqneb. Tamo jejamu jaqatiŋnjro qaji naŋgi ti tamo mondor uge uge na ojeleŋo qaji naŋgi ti tamo nanarioqnsib manjaloqneb qaji naŋgi ti tamo jejamu lainjro qaji naŋgi ti kalil joqsib beqnab Yesus na boletnjroqnej.

25 Bati deqa tamo ungasari tulanj gargekoba naŋgi Yesus dauryoqnsib laqneb. Galili sawa naŋgi ti Dekapolis sawa naŋgi ti Jerusalem qure naŋgi ti Judia sawa naŋgi ti qure qure Jordan

ya taqal beiq di soqneb qaji nañgi ti kalil Yesus dauryoqnsib laqneb.

5

Yesus a manaq oqsiq dia anjam palontej

¹ Onaqa Yesus na tamo uñgasari kalil nañgi di unjrsiqa a manaq oqsiq di awesonaqa aqa segi angro nañgi aqa areq beb.

² Bonabqa a Qotei aqa anjam palontosiq endegsi minjrej,

³ “Tamo uñgasari qudei nañgi poinjrqo, nañgi Qotei aqa ñamgalaq di sougetejunub. Tamo uñgasari nañgi di areboleboleinjreme. Qotei lañ qureq di unu qaji a nañgo Mandor Koba sosim nañgi taqatnjqras.

⁴ “Tamo uñgasari akam ti unub qaji nañgi dego areboleboleinjreme. Qotei na nango are olo boletetnjqras.

⁵ “Tamo uñgasari lawo na sosib nango segi ñam aguq ateqnub qaji nañgi dego areboleboleinjreme. Qotei na mandam kalil osim nañgi enjrqas.

⁶ “Tamo uñgasari kumbra bole dauryqajqa arearetnjreqnu qaji nañgi dego areboleboleinjreme. Nañgi tulaj kere na sqab. Iga ingi ti ya ti uyqajqa arearetgeqnu dego kere.

⁷ “Tamo uñgasari duleqnub qaji nañgi dego areboleboleinjreme. Qotei a kamba nañgi qa duloqnqas.

⁸ “Tamo uñgasari nañgo are miliq di jiga bei saiqoji unub qaji nañgi dego areboleboleinjreme. Nañgi Qotei aqa ulatamu unqab.

⁹ “Tamo uñgasari jeu turyeqnub qaji nañgi dego areboleboleinjreme. Qotei a nañgi qa marqas, ‘Nañgi ijo segi angro bole.’”

¹⁰ “Tamo uñgasari qudei nañgi kumbra bole dau-ryeqnub deqa jeu tamo nañgi na nañgi gulbe en-jreqnub. Tamo uñgasari nañgi di dego arebole-boleinjreme. Qotei lañ qureq di unu qaji a nañgo Mandor Koba sosim nañgi taqatnjqras.

¹¹ “Ninji ijo ñam ti unub deqa bunuqna tamo qudei na ninji misiliñgoqnsib ugeugeinjgoqnsib nunjo jejamu laña gisanjoqnqab. Di uñgum. Ninji areboleboleinjeme.

¹² Od, nunjo are tulaj boleinjgim soqniy. Nunjo awai bole agi lañ goge di unu. Nami jeu tamo nañgi na Qotei aqa medabu o qaji tamо nañgi dego degsib ugeugeinjroqneb.”

Ninji bar ti puloñ ti bul soqniy

¹³ Osiga Yesus a olo marej, “Ninji mandamq endi bar bul soqniy. Ariya bar aqa qajarara koboqas di ingi kiye na olo qajararatqas? Di keresai. Bar aqa qajarara koboqas di a ugeqas. Deqa bar di mandamq di waiybqa tamо qudei nañgi bosib singa na sosqab.

¹⁴ “Ninji mandamq endi puloñ bul soqniy. Ninji are qaliy. Qure kobaquja a mana gogeqsi sqas di a boleq di sqas. A uliesqa keresai.

¹⁵ Tamо bei a lam qatrentosim guwe na kabutqasai. Boleq di gaintim warum suwañjamqa tamо kalil tal miliqq di unub qaji nañgi warum geregere unqab.

¹⁶ Dego kere ninji puloñ bul sosib boleq di kumbra bole bole yoqniy. Yoqnibqa tamо uñgasari

naŋgi na nuŋgo kumbra di unoqnsib nuŋgo Abu lan qureq di unu qaji aqa ñam soqtoqnqab.”

Yesus a dal anjam qa marej

17 Osiqa Yesus a olo marej, “E Moses aqa dal anjam ti Qotei aqa medabu o qaji tamo naŋgo anjam ti kalil dauryosiy keretqajqa deqa mandamq aiyem. Niŋgi endegsib are qalaib, ‘Yesus a dal anjam di taqal waiyqajqa bej.’ Di sai.

18 E bole merŋgwai. Laŋ ti mandam ti koboo-saisoqnimqa dal anjam mutu kiňala bei koboqasai bole sai. Dal anjam soqnim soqnim Qotei na aqa wau kalil keretqas.

19 Deqa niŋgi quiy. Tamo bei a dal anjam mutu kiňala bei uge qa marsim tamo uŋgasari naŋgi dego titnjroqnim naŋgi uge qa marqab tamo di aqa ñam tulaŋ aguq aiqas. Deqa Qotei laŋ qureq di unu qaji a na tamo di taqatqasai. Osim aqa Mandor Koba sqasai dego. Ariya tamo bei a dal anjam kalil dauryosim tamo uŋgasari naŋgi dego dauryqa minjroqnas tamo di aqa ñam tulaŋ kobaqas. Deqa Qotei na tamo di taqatosim aqa Mandor Koba sqas.

20 E niŋgi endegsi merŋgwai. Niŋgi kumbra tulan bolequja yoqniy. Yoqniib nuŋgo kumbra bole dena dal anjam qalie tamo naŋgi ti Farisi ti naŋgo kumbra bole buŋyoqneme. Buŋyqasai di Qotei laŋ qureq di unu qaji a nuŋgo Mandor Koba sosim niŋgi taqatŋwasai.

Yesus a ŋirij kumbra qa anjam palontej

21 “Niŋgi dal anjam endegsib queb, ‘Niŋgi tamo bei moiyyotaib. Niŋgi tamo bei moiyyotqab di niŋgi une ti sqab.’ Dal anjam di nuŋgo moma naŋgi nami minjreb.

22 Ariya e dal anjam di buñyosiñ ningi endegsi merñgħwai. Tamo bei na aqa was ɳirinjtqas di a une ti sqas. Tamo bei na aqa was misilinjyqas di une kobaquja aqa jejamuq di sqas. Deqa a ojsib anjam pegiyo talq di tigeltośib aqa une ubtetqab di kere. Tamo bei na aqa was minjqas, ‘Ni tulan nanari, areqalo saiqoji,’ degyqas di aqa une deqa Qotei na a osim ɳamyuwoq waiyqas di kere.

23-24 “Deqa ni Qotei atraiyqa marsimqa ino was bei a ni qa ɳirinj ti soqnimqā ni deqa are qalsim atraiyo ingi ingi mati atra bijal qalaq di uratosim ino was aqaq gile. Gilsim a ombla anjam gereiyekritosim dena bosim Qotei atraiyqam.

25 “Deqa tamo bei a ni qa anjam bei soqnimqā ningi ombla walwelosib anjam pegiyo talq gilo-qnsibqa gamq di ningi segi aiyel na anjam urur gereiyoqujatiy. Yosib anjam moiytosib a ni osim anjam pegiyo talq gilqasai. Ariya ningi gamq di anjam gereiyqasai di a na ni osi gilsimqā anjam pegiyo tamo aqa ulatamuq di tigeltmimqā anjam pegiyo tamo a ni osim qaja tamo nañgo banq di atqas. Yimqa nañgi na ni osib tonto talq di waimqab.

26 Deqa e bole mermqai. Ni tonto talq dena olo oqedqasai. Ni mati ino une aqa awai kalil kere-timqā qaja tamo nañgi na ni uratmib oqedqam.

Yesus a uña jejamu ojetqajqa kumbra qa anjam palontej

27 “Niñgi dal anjam endegsib queb, ‘Ningi tamo bei aqa uña jejamu ojetaib.’

28 Ariya e dal anjam di buñyosiñ ningi endegsi merñgħwai. Tamo bei a uña bei lañha kokoqyosiqa

are prugyqo di aqa are miliqiñ na a uña di aqa jejamu ojetqo.

²⁹ “Ino ñamdamu wo na ni titmosim uneq waimqa laqnimqa ñamdamu di otorosim waiy. Ni degye. Di kiyaqa? Ino ñamdamu qujai loumimqa ni une yqasai di kere. Ariya ni ñamdamu aiyel ti soqnimqa Qotei na ni ñamyuwoq waimqas di keresai.

³⁰ Ino bañ wo na ni titmosim uneq waimqa laqnimqa bañ di gentosim waiy. Ni degye. Di kiyaqa? Ino bañ qujai loumimqa ni une yqasai di kere. Ariya ni bañ aiyel ti soqnimqa Qotei na ni ñamyuwoq waimqas di keresai.

Yesus a uña uratqajqa kumbra qa anjam palon-tej

³¹ “Nami nañgi dal anjam endegsib mareb, ‘Tamo bei na aqa uña uratqa osimqa pepa bei neñgreñyosim yosim di a uratqas.’

³² Ariya e dal anjam di buñyosiñ ningi endegsi merñgwai. Tamо bei na aqa ñauñ laña uratim a olo tamo bei oqas di tamо dena aqa ñauñ kumbra ugeq waiyqo. Tamо bunuj a dego une atqo. Di kiyaqa? Uña di a nami tamо bei ombla une atosai deqa.

Nin̄gi anjam bei marqa osibqa in̄gi bei na siñgilataib

³³ “Nin̄gi dal anjam endegsib queb, ‘Ni anjam bei siñgilatosim Tamо Koba minjqam di ni na olo urataim. Ni anjam di dauryosiñ ye.’ Dal anjam di nun̄go moma nañgi nami minjreb.

³⁴ Ariya e dal anjam di buñyosiñ nin̄gi endegsi merñgwai. Nin̄gi anjam bei siñgilataib. Nin̄gi anjam

bei marqa osibqa iŋgi bei na siŋgilataib. Lanj qure a Qotei aqa awo jaram koba. Deqa niŋgi lanj qure aqa ñam na anjam bei siŋgilataib.

³⁵ Mandam a Qotei aqa singa atqajqa sawa. Deqa niŋgi mandam aqa ñam na anjam bei siŋgilataib. Jerusalem a Mandor Koba aqa segi qure koba. Deqa niŋgi Jerusalem aqa ñam na anjam bei siŋgilataib.

³⁶ Ni anjam bei marqa osimqa ino gate na anjam siŋgilataim. Ni segi na marimqa ino gate baŋga sara qat bei oqwa keresai. Tulu bei dego oqwa keresai. Deqa ni ino gate na anjam siŋgilataim.

³⁷ Niŋgi od qa segi marsib said qa dego segi mariy. Niŋgi anjam bei totoryosib marqab di niŋgi Satan aqa areqalo dauryqab.

Tamo bei na ni kumbra uge emimqa ni kamba a kumbra uge yaim

³⁸ “Niŋgi dal anjam endegsib queb, ‘Tamo bei na tamo bei aqa ñamdamu ugetetqas di niŋgi kamba aqa ñamdamu ugetetiy. Tamо bei na tamo bei aqa qalagei ugetetqas di niŋgi kamba aqa qalagei ugetetiy.’

³⁹ Ariya e dal anjam di buŋyosiŋ niŋgi endegsi merŋgwai. Tamо bei na ni kumbra uge emimqa ni kamba a kumbra uge yaim. Tamо bei na ula poŋmimqa belosim waliŋe bei osoryimqa ponyem.

⁴⁰ Tamо bei a ni qa anjam bei soqnim ino gara jugo yaimqajqa mermimqa ni na saidyaim. Olo ino gara olekoba dego ye.

⁴¹ Qaja tamо bei na ni ojsim siŋgila na mermqas, ‘Ni ijo ingi ingi qoboiyetbosim e daurbosim gam truquyal aendeq gile.’ A degsi mermimqa ni aqa

anjam di buñyosim aqa ingi ingi qoboiyetosim dau-ryosim gam olekobaq osi gilete.

42 Tamo bei na ino ingi bei yaimqajqa mermimqa ye. Tamo bei na ino ingi bei yaimosim bunuqna a kamba olo ni emqajqa mermimqa ingi di ye. A saidyaim.

Niñgi na jeu tamo nañgi geregereinjroqniy

43 “Niñgi dal anjam endegsib queb, ‘Ni ino was nañgi qalaqalainjroqne. Osim ino jeu tamo nañgi qoreinjroqne.’

44 Ariya e dal anjam di buñyosiñ niñgi endegsi merñgwai. Niñgi nunjo jeu tamo nañgi dego qalaqalainjroqniy. Tamo qudei na niñgi uegeugeinjibqa niñgi olo nañgi qa Qotei pailyoqniy.

45 Niñgi kumbra degyqab di niñgi nunjo Abu lan qureq di unu qaji aqa añgro bole sqab. Niñgi qalie, Qotei a dego tamo bole ti tamo uge ti nañgi turtnjroqnsiq kumbra bole bole enjreqnu. Agi a na aqa señ qarinyeqnaqa tamo bole ti tamo uge ti nañgoq aiyeqnu. Awa dego qarinyeqnaqa tamo bole ti tamo uge ti nañgoq aiyeqnu.

46 Tamo ungasari niñgi qalaqalainjgeqnub qaji nañgi segi niñgi kamba qalaqalainjroqnnqab di kumbra tulan̄ bolesai. Nunjo kumbra deqa Qotei a niñgi awai bole enjwasai. Takis o qaji tamo nañgi dego kumbra degyeqnub.

47 Niñgi nunjo was nañgi segi gereinjroqnnqab di kumbra tulan̄ bolesai. Nunjo kumbra dena niñgi na tamo qudei buñnjrzasai. Tamo nañgi Qotei qaliesai qaji nañgi dego nañgo segi was nañgi gereinjreqnub.

48 Nuñgo Abu lañ qureq di unu qaji a gaigai kumbra bole bole keretoqnsiq yeqnu. Deqa ningi dego nuñgo Abu aqa kumbra di dauryosib kumbra bole bole keretoqnsib yoqniy.

6

Niñgi laña baban na kumbra boleyaim

1 “Tamo qudei nañgi endegsib are qaleqnub, ‘E laña baban na kumbra bole yoqnit tamo nañgi e nuboqnsib ijo ñam soqtetboqñqab.’ Ariya ningi degyaib. Niñgi degyqab di nuñgo Abu lañ qureq di unu qaji a niñgi awai bole engwasai.

2 “Niñgi gisan tamo nañgo kumbra dauryaib. Gisan tamо nañgo kumbra agiende. Nañgi na tamo ingi ingi saiqoji nañgi aqaryainjrqa oqnsib tamo qudei qarinjreqnab nañgi qa namooqnsib gul anjameqnub. Gul anjameqnab tamo uñgasari nañgi na gisan tamо nañgi di unjroqnsib nañgo ñam soqtetnjreqnub. Gisan tamо nañgi di Qotei tal miliqiq di, gam kokbaq di kumbra degyeqnub. Deqa e bole mernjgwai. Qotei a tamо nañgi di awai bole enjrqasai. Nañgo awai agi tamо uñgasari nañgi na nañgo ñam soqtetnjreqnub di kere.

3 Deqa ni degyaim. Ni tamо ingi ingi saiqoji nañgi aqaryainjrqa osimqa ban qonan a uli na aqaryainjrimqa ban wo a qalieqasai.

4 Di yawo anjam. Aqa damu endegsi unu. Ni uli na tamо ingi ingi saiqoji nañgi aqaryainjrimqa tamo uñgasari kalil nañgi qalieqasai. Ni kumbra di uli na yoqnim ino Abu a segi unoqnqas. Deqa a segi na ino ñam soqtetmosim ni awai bole emoqnqas.”

Yesus a pailyo kumbra qa anjam palontej

⁵ Osiqa Yesus a olo marej, “Niñgi Qotei pailyqa osibqa gisanj tamo nañgi pailyeqnub degsib pailyaib. Gisanj tamo nañgi Qotei pailyqa oqnsib tamo ungasari kalil nañgo ñamdamuq di tigeleqnab unjroqnsib nañgo ñam soqtetnjreqnub. Tamo nañgi di Qotei tal miliq di, qure ambleq di, gam kokba qalaq di kumbra degyeqnub. Deqa e bole mernjgwai. Qotei a nañgi awai bole enjrqasai. Nañgo awai agi tamo ungasari nañgi na nañgo ñam soqtetnjreqnub di kere.

⁶ Deqa ni degsi pailyaim. Ni Qotei pailyqa osimqa ino segi warum miliq gilsim siran qandimtosim ino Abu uliejunu qaji a pailyimqa tamo kalil nañgi ni numqasai. Ni kumbra di uli na yoqnim ino Abu a segi unoqnqas. Deqa a segi na ino ñam soqtetmosim ni awai bole emoqnqas.

⁷ “Tamo nañgi Qotei qaliesai qaji nañgi laña laña pailyo olekokba yoqnsibqa endegsib are qaleqnub, ‘Iga pailyo olekokba yoqnimqa Qotei a gago pailyo quqwas.’ Di gisanj. Deqa niñgi Qotei pailyqa osibqa degsib pailyaib.

⁸ Niñgi nañgo kumbra di dauryaib. Niñgi ingi bei qa truquosib nuñgo Abu pailyosaisoqnibqa a nami qalieqo.

⁹ “Deqa niñgi endegsib Qotei pailyoqniy, ‘O gago Abu, ni lañ qureq di unum. Ino ñam tulañ getento.

¹⁰ Ni bosim gago Mandor Koba sosim iga taqatgoqnime.

Lañ qureq di nañgi ino areqalo dauryeqnub dego kere iga mandamq endi ino areqalo dauryoqnqom.

- 11** O Abu, gago iŋgi uyo bati gaigai keretgoqnime.
12 Tamo naŋgi iga qa une ateqnub qaji naŋgo
 une kalil iga na kobotetnjreqnum deqa ni
 kamba gago une kalil dego kobotetgime.
13 Gulbe bei na iga walawalaigosim uneq waigwa
 laqnimqa ni iga aqaryaigime.
 Yim Satan na iga ugetgwasai.'

14 "O ijo angro, niŋgi degsib Qotei pailyoqniy.
 Niŋgi quiy. Niŋgi tamo bei qa anjam soqnimqa
 niŋgi na aqa une kobotiy. Yimqa nunŋo Abu laŋ
 qureq di unu qaji a na kamba nunŋo une kalil
 kobotetŋwas.

15 Niŋgi aqa une kobotetqasai di nunŋo Abu a
 dego nunŋo une kobotetŋwasai."

Yesus a qurieŋ qa anjam palontej

16 Osiqa Yesus a olo marej, "Niŋgi qurieŋqa
 marsibqa gisanj tamo naŋgi qurieŋeqnub
 niŋgi degsib qurieŋjaib. Gisanj tamo naŋgi
 qurieŋqnsibqa ulatamu ugeinjreqnu. Tamo
 unŋasari kalil naŋgi na unjrsib naŋgo ñam
 soqtetnjrqajqa deqa naŋgi kumbra degyeqnub.
 Deqa e bole merrŋawai. Tamo naŋgi di Qotei na
 awai bole enjrqasai. Naŋgo awai agi tamo unŋasari
 naŋgi na naŋgo ñam soqtetnjreqnub di kere.

17 Ariya ni kumbra degyaim. Ni qurieŋqa
 osimqa ino ulatamu geregere yansoqnsim ino
 gate baŋga pranyoqnsim ino jejamu gereiyoqnsim
 laqne.

18 Yimqa tamo unŋasari kalil naŋgi ni numoqnsib
 ni qurieŋ ti unum di naŋgi qalieqasai. Ni kumbra
 di uli na yoqnim ino Abu a segi na unoqnqas.

Deqa a segi na ino ñam soqtetmosim awai boleemoqñqas."

Niñgi mandam qa inđgi inđgi koroiyaib

¹⁹ Osiqa Yesus a olo marej, "Niñgi mandam qa inđgi inđgi koroiyaib. Di sisimbiñ na ugetqab. Baisuwi ojqas. Bajin tamo nañgi tal paratosib oqab.

²⁰ Deqa niñgi lañ qure qa inđgi inđgi koroiyyiy. Di sisimbiñ na ugetqasai. Baisuwi ojqasai. Bajin tamo nañgi tal paratosib oqasai dego.

²¹ Sawa qabia ino ñoro boleunu dia ino are miligi dego siñgilitim sqas."

Ino ñamdamu a ino jejamu qa puloñ bul

²² Osiqa Yesus a olo marej, "Ino ñamdamu a ino jejamu qa puloñ bul. Deqa ino ñamdamu boleqas di ino jejamu kalil suwanjesqas.

²³ Ariya ino ñamdamu ugeqas di ino jejamu kalil ambruesqas. Deqa puloñ ino are miligiñ di unu qaji a olo ambruqas di ino are miligi kalil ambruekritqas."

Ni tamo kokba aiyel nañgi wauetnjrqa keresai

²⁴ Osiqa Yesus a olo marej, "Tamo qujai a tamo kokba aiyel nañgi wauetnjrqa keresai. A tamo kobaquja bei qalaqalaiyosim olo tamo kobaquja bei jeutqas. Bei aqa anjam dauryosim olo bei qoreiyqas. Dego kere niñgi silali ti Qotei ti turtnjrsib nañgi wauetnjrqa keresai."

Niñgi bole sqajqa deqa areqalo kobaiyaib

²⁵ Osiqa Yesus a olo marej, "Niñgi mandamq endi bole sqajqa deqa areqalo kobaiyaib. Osib endegsib maraib, 'Iga inđgi ti ya ti qabe na

osim uyqom? Gara qabe na osim gago jejamu kabutqom?' Niñgi degsib maraib. Niñgi iñgi uyo na segi ñamble oqasai. Niñgi gara jugoqnqab dena segi nunjo jejamu bole sqasai.

²⁶ Niñgi qebari nañgi unjriy. Nañgi iñgi yago-saieqnub. Iñgi otorosib talq di atosaieqnub. Ariya nunjo Abu lañ qureq di unu qaji a na qebari nañgi iñgi anainjreqnu. Niñgi qalie, qebari nañgi qunuñ saiqoji. Niñgi tamo qunuñ ti. Niñgi na qebari nañgi tulaj buñnjrejunub.

²⁷ Niñgi mandamq endi sokobaiyqajqa deqa are koba qalaib. Niñgi are koba qalqab dena ningi nunjo segi sqajqa bati olo yala totoryqa keresai. Sai bole sai.

²⁸ "Deqa niñgi kiyaqa gara qabe na osib jejamu kabutqajqa are koba qaleqnub? Niñgi ñam so unjriy. Nañgo wala kiyersib branteqnub di niñgi qaliesai. Nañgi segi wauosaieqnub. Nañgo segi wala gereiyosaieqnub.

²⁹ Deqa e niñgi endegsi mernjgwai. Nami Solomon a gara wala boledamu jugoqnej. Ariya ñam so aqa wala dena Solomon aqa wala tulaj buñjejunu.

³⁰ Mañ lañaj a bini oqwas nebe tamо nañgi na ginjenjosib ñamyuwoq waiyqab. Mañ lañaj di Qotei na wala enjreqnu. Deqa niñgi kiyaqa Qotei qa nunjo areqalo singilatqa yonub keresaiiñgwo? Niñgi mañ lañaj sai. Niñgi tamо qunuñ ti. Deqa niñgi endegsi poiñgem, Qotei a niñgi dego gara engoqnqas.

³¹ Niñgi areqalo kobaiyosib endegsib maraib, 'Iga iñgi ti ya ti qabe na osim uyqom? Gara qabe na osim gago jejamu kabutqom?' Niñgi degsib

maraib.

³² Tamo uŋgasari Qotei qaliesai qaji naŋgi iŋgi iŋgi deqa are koba qaleqnub. Ariya niŋgi deqa are koba qalaib. Nunjo Abu laŋ qureq di unu qaji a qalie, niŋgi laŋa sqa keresai. Niŋgi iŋgi iŋgi deqaji oqnsib sqab.

³³ Deqa niŋgi kumbra qujai endi yoqniy. Niŋgi Qotei na taqatŋosim nunjo Mandor Koba sqajqa ti aqa kumbra bole bole dauryqajqa ti siŋgilaqniy. Niŋgi degyqab di Qotei na kamba iŋgi uyo ti gara ti dego engoqnqas.

³⁴ Deqa nebe kumbra kiye nuŋgoq di brantqas niŋgi deqa are koba qalaib. Nebe a bati bei. Nebe qa gulbe di aqa segi gulbe. Bati segi segi aqa gulbe di naŋgo segi segi. Deqa niŋgi are koba qalaib.”

7

Niŋgi na tamо qudei naŋgi peginjraib

¹ Osiqa Yesus a olo marej, “Niŋgi na tamо qudei naŋgi peginjraib. Niŋgi peginjrqasai di Qotei a kamba dego niŋgi peginjwasai.

² Ariya niŋgi na tamо naŋgi peginjrqab kere dego Qotei a kamba niŋgi peginjwas. Niŋgi na tamо naŋgo jejamuq di une qametnjqab kere dego Qotei a kamba nungo jejamuq di une qametnjqwas.

³ Kiyaqa ni ino was aqa ɻamdamuq di ɻam ñeŋgi kiňala unu di unsimqa ino segi ɻamdamuq di ɻampaŋ kobaquja unu di ni unosai?

⁴ Kiyaqa ino segi ɻamdamuq di ɻampaŋ kobaquja soqnimqa ni na tentosim ino was minjqam, ‘Was, e ino ɻamdamuq di ɻam ñeŋgi kiňala unionum di osiy taqal waiyetmqai?’

5 Ni gisaŋ tamo. Ni mati ɻampaŋ kobaquja ino segi ɻamdamuq di unu qaji di taqal waiyosim ɻamdamu suwaŋmimqa ariya degam ɻam ŋeŋgi kiňala ino was aqa ɻamdamuq di unu qaji di geregere unsim taqal waiyete.

6 “Niŋgi ñoro bole bole oqnsib bauŋ naŋgi enjroqnaib. Enjrqab di naŋgi ñoro di taqal waiyosib bosib niŋgi uñiŋgwab. Niŋgi kolilei bole bole oqnsib bel naŋgi enjroqnaib. Enjrqab di naŋgi kolilei di mandamq di waiyosib naŋgo siŋga na sose-leŋqab.”

Niŋgi Qotei pailyqab di a na niŋgi aqaryainŋwas

7 Osiqa Yesus a olo marej, “Niŋgi ingi bei qa Qotei pailyqab di a na engwas. Niŋgi ingi bei oqa marsibqqa ɻamqab di itqab. Niŋgi siranme kindokindonjeqnaibqa Qotei na siran waqtetŋwas.

8 Tamo kalil Qotei pailyeqnub qaji naŋgi ingi eqnub. Tamo kalil ingi qa ɻameqnub qaji naŋgi iteqnub. Tamo kalil siranme kindokindonjeqnub qaji naŋgi Qotei na siran waqtetŋreqnu.

9 “Tamo bei aqa aŋgro a mamyim ingi qa minjimqa a ingi yqas. A meniŋ yqasai.

10 A na qe qa minjimqa a qe yqas. A amal yqasai.
11 Deqa niŋgi quiy. Niŋgi tamo bolesai. Ariya niŋgi nuŋgo aŋgro naŋgi ingi bole bole enjreqnub. Niŋgi naŋgi saidnjrosaieqnub. Nuŋgo kumbra dena niŋgi endegsi poiŋgem, nuŋgo Abu laŋ qureq di unu qaji a dego niŋgi saidŋgosaeqnu. Niŋgi pailyqab di a na ingi bole bole niŋgi engoqnqas. A na niŋgi saidŋgwasi bole sai.

12 “Kumbra bole bole tamo naŋgi na niŋgi eŋwajqa arearetŋgeqnu qaji di niŋgi na olo naŋgi

enjroqniy. Niñgi degyqab di ningi Moses aqa dal anjam ti Qotei aqa medabu o qaji tamo nañgo anjam ti kalil keretosib dauryqab.”

Niñgi sirajme kiñala miliq giliy

¹³ Osiqa Yesus a olo marej, “Niñgi sirajme kiñala miliq giliy. Niñgi sirajme kobaquja miliq gilqab di ningi padalo sawaq aiqab. Gam di kobaquja. Tamo gargekoba nañgi gam di dauryeqnub.

¹⁴ Niñgi sirajme kiñala miliq gilqab di ningi gam kiñala dauryosib ñambile gaigai sqajqa sawaq di brantqab. Tamo quja quja segi gam di itosib dauryeqnub.”

Niñgi gisan anjam maro tamo nañgi qa ñam atoqniy

¹⁵ Osiqa Yesus a olo marej, “Niñgi geregere ñam atoqniy. Tamo qudei na bosib gisanjosib merngwab, ‘Iga Qotei aqa medabu o qaji tamo bole.’ Di sai. Tamo nañgi di kaja bul lawo na boqnsib ningi walawalaingoqnsib anjam merngeqnub. Ariya nañgo are miliq di nañgi tamo uge. Nañgi bauñ juwanj kaja nañgi ñumeqnub dego bul.

¹⁶ Niñgi nañgo kumbra di geregere tenemtosib poiñgwas, nañgi Qotei aqa medabu o qaji tamo bolesai. Niñgi are qaliy. Tamo nañgi sil luwit marinq dena wain gei osib uyeqnub e? Sai. Mañ luwit marinq dena qura gei osib uyeqnub e? Sai.

¹⁷ Niñgi qalie, ñam bole nañgi gei bole ateqnub. Ñam uge nañgi gei uge ateqnub.

¹⁸ Ñam bole nañgi gei uge atosaieqnub. Ñam uge nañgi gei bole atosaieqnub.

19 Nam kalil gei bole atosaieqnub qaji di tamo naŋgi na qomeleŋoqnsib ɻamyuwoq di breinjre-qnub.

20 Dego kere niŋgi gisanj tamo naŋgo kumbra geregere tenemtosib poiŋgwas, naŋgi Qotei aqa medabu o qaji tamo bolesai.

21 “Niŋgi endegsib are qalaib. Tamo uŋgasari naŋgi ‘O Tamko Koba, O Tamko Koba’ e degsib met-bqab di Qotei na naŋgi taqatnjsim naŋgo Mandor Koba sqas. Di sai. Tamo uŋgasari ijo Abu aqa areqalo dauryeqnub qaji naŋgi segi Qotei na taqatnjsim naŋgo Mandor Koba sqas. Qotei agi lan qureq di unu.

22 Mondoŋ diŋo bati bamqa tamo uŋgasari gargekoba naŋgi ijo ulatamuq di tigelosib endegsib merbqab, ‘O Tamko Koba, iga ino ñam na anjam mare mare laqnem. Iga ino ñam na mondor uge uge winjroqnsimqa maŋwa gargekoba yoqnem.’ Naŋgi e degsib merbqab.

23 Merbibqa e kamba minjrqai, ‘Niŋgi tal qabe? E niŋgi qaliesai. Deqa niŋgi jaraiyyiy. Niŋgi kumbra uge yo qaji tamo.’ ”

Yesus a tal gereiyo kumbra qa yawo anjam marej

24 Osiqa Yesus a olo marej, “Tamo a ijo anjam kalil endi qusim dauryqas di a tamo bei meniŋ quraq di aqa tal atej a bul sqas.

25 Bunuqna awa jagwa ti bosimqa ya meli dosim tal di qamsim putqasai. Singila na tigelesqas. Di kiyaqa? A meniŋ quraq di tal atej deqa.

²⁶ Ariya tamo a ijo anjam kalil endi qusim olo dauryqa uratqas di a nanari tamo bei laja sub gogeq di aqa tal atej qaji a bul sqas.

²⁷ Tal atnaq sonaqa awa jagwa ti bosiq ya meli dosiqa tal di qamsiq rengintosiq putonaq aisiq tulan niñaqej. Od, tal di a torei padalej.”

²⁸ Yesus a anjam kalil di marsiq koboonaqa tamo uñgasari tulan gargekoba nañgi queb. Qusib nañgi prugugeteb.

²⁹ Di kiyaqa? Yesus aqa anjam maroqnej di siñgila ti. Dal anjam qalie tamo nañgo anjam maroqneb de ti keresai. Yesus a segi anjam di aqa abu.

8

Yesus a tamo yu na aqa jejamu ugeelenjej qaji di boletej

¹ Yesus a manaq dena aiyeqnaqa tamo uñgasari tulan gargekoba nañgi a dauryosib aiyeb.

² Onaqa tamo bei yu na aqa jejamu ugeelenjej qaji a Yesus aqa areq bosiq aqa siñgaq di siñga pulutosiqa minjej, “O Tamor Koba, ni e boletbqa are soqnimqa e boletbe.”

³ Degsi minjnaqa Yesus a bañ waiyosiq tamo di ojsiqa minjej, “E ni boletmqa are unu. Deqa ino jejamu olo boleeme.” Onaqa bati qujai deqa aqa yu kalil mosoosiq aqa jejamu boleej.

⁴ Onaqa Yesus na olo minjej, “Ni que. Ino jejamu boleqo deqa ni tamo qudei nañgi minjraim. Ni gilsim ino jejamu atra tamo osoryosim atraiyqa-jqa ingi ingi Moses a nami marej qaji di osim Qotei atraiyime. Yimqa tamo uñgasari nañgi ni numsisib marqab, ‘Bole, ino jejamu boleqo.’ ”

Yesus na qaja tamo gate aqa kañgal tamo boletej

5 Onaqa Yesus a walwelosiq Kaperneam qureq di brantej. Dia qaja tamo gate bei soqnej. A Rom tamo. A Yesus aqa areq bosiq a pailiyosiq minjej,

6 “O Tam o Koba, ijo kañgal tamo a makobaiyqo. Aqa tanu kalil laiyosiq jejamu tulañ jaqatinjyqoqa talq di ḡieejunu.”

7 Onaqa Yesus na minjej, “E gilsiy boletqai.”

8 Degsi minjnaqa qaja tamo gate na olo minjej, “O Tam o Koba, e tamo bolesai deqa ni ijo talq baim. Ni anjam segi marimqa ijo kañgal tamo a boleqas.

9 E dego tamo kokba qudei nañgo sorgomq di unum. Ijo qaja tamo nañgi ijo sorgomq di unub. E bei minjqa, ‘Ni gile.’ Yimqa a gilqas. Bei minjqa, ‘Ni au.’ Yimqa a bqas. Ijo kañgal tamo bei minjqa, ‘Wau di ye.’ Degsi minjítqa a ijo anjam dauryqas.”

10 Onaqa Yesus a qaja tamo gate aqa anjam di quasiq a tulañ prugugetej. Osiqa bulosiq tamo ungasari gargekoba a dauryoqneb qaji nañgi minjrej, “E bole mernjgwai. Qaja tamo gate endi a e qa aqa areqalo tulañ sinjilatqo. Israel tamo nami e qa degsi aqa areqalo sinjilato qaji bei unosai.

11 “Deqa e niñgi endegsi mernjgwai. Tam o ungasari gargekoba nañgi sawa guta na guma na ti bosib koroosib Abraham, Aisak, Jekop nañgi koba na awoosib ingi uyoqnqab. Yimqa Qotei lañ qureq di unu qaji a nañgo Mandor Koba sosim nañgi taqatnjqas.

12 Ariya tamo qudei Qotei a nami taqatnjqas osiq metnjrej qaji nañgi a qa nañgo areqalo sinjilatosai deqa a nañgo Mandor Koba sosim nañgi

taqatnjqasai. A na naŋgi osim qalaq di brein-jrimqa naŋgi sawa ambruq di sqab. Sawa dia naŋgi akamkobaoqnsib pailoqnsib naŋgo jaqatinj qa qalagei anjam atoqnqas.”

¹³ Osiqa Yesus a qaja tamo gate di minjej, “Ni gile. Ni e qa ino areqalo singilatonum deqa ni gilsim unime. Ino kaŋgal tamo a boleosiq unu.” Degsi minjnaqa batı qujai deqa aqa kaŋgal tamo aqa ma koboonaqa a boleej.

Yesus na Pita aqa mimibe boletej

¹⁴ Onaqa Yesus a Pita aqa tal gogetosiqa Pita aqa mimibe makobaiyonaqa jejamu kaŋkaŋyonaq bijalq di ɻeiesonaq unej.

¹⁵ Unsiga aqa baŋ ojsiga tigeltonaqa aqa jejamu kaŋkaŋ di koboonaqa a tigelosiqa inŋgi goiyetej.

Yesus a tamo uŋgasari gargekoba naŋgi boletnjro-qnej

¹⁶ Seŋ aiqa laqnaqa tamo uŋgasari mondor uge uge na ojeleno qaji naŋgo was naŋgi na joqsisib Yesus aqa areq osi boqneb. Osi beqnabqa Yesus a anjam segi minjreqnaqa mondor uge naŋgi aqa anjam quoqnsib jaraiyoqneb. Tamо ma utru segi segi so qaji naŋgi dego osi beqnab Yesus na boletnjroqnej.

¹⁷ A kumbra di yoqnej deqa anjam bei Qotei aqa medabu o tamo Aisaia nami marej qaji di aqa damu brantej. A endegsi marej, “Kristus a gago ma utru segi segi kalil yaiyetgoqnsiq taql waiyeqnu.”

Tamo qudei naŋgi Yesus dauryqajqa minjej

18 Bati deqa Yesus a ḥam atej di tamo uŋgasari tulaŋ gargekoba naŋgi aqa areq di koroesonab unjrej. Deqa a na aqa aŋgro naŋgi minjrej, “Iga qobuŋ gogetosim jaraiyosim ya agu taqal beiq gilqom.”

19 Degsi minjrsiqa naŋgi joqsiq koba na gilqa laqnabqa dal anjam qalie tamo bei a Yesus aqa areq bosiqqa minjej, “O Qalie Tamo, ni sawa sawaq giloqnimqa e ni daurmoqnqai.”

20 Onaqa Yesus na minjej, “Baun juwanŋ naŋgi tal ti. Agi sub miligiq di ḥereŋeqnub. Qebari naŋgi simi ti. Deqa naŋgi simiŋ di ḥereŋeqnub. Ariya e Tamo Aŋgro ḥeqajqa tal saiqoji. Deqa ni e daurbqajqa gulbe koba.”

21 Onaqa Yesus aqa aŋgro bei na minjej, “O Tamo Koba, ni e odbimqa e mati aisiy ijo abu qa tarinjoqnqai. A moiymqa subq atsiy di e ni daurmqai.”

22 Onaqa Yesus na minjej, “Uŋgum. Tamo moiyo qaji naŋgi segi na tamo moiyo qaji naŋgi subq ateleŋjoqnqab. Ariya ni bosim e daurbe.”

*Yesus a jagwa ti ya korkor ti anjam minjrnaq
laeb*

23 Osiqa Yesus a qobuŋ gogetonaqa aqa aŋgro naŋgi a dauryosib koba na qobuŋ gogetosib gileb.

24 Naŋgi gileqnabqa Yesus a qobuŋ miligiq di ḥeisiq qambumtej. Onaqa jagwa tulaŋ koba tigelosiq ya korkortosiqa qobuŋ qaloqnsiqa mormaŋ miligiq aiyeqnaqa ya maqej.

25 Deqa Yesus aqa aŋgro naŋgi tulaŋ ulaugertosib aqa areq bosib dudumyosib minjeb, “O Tamo Koba, ni iga aqaryraig. Iga padalqa laqnum.”

26 Onaqa Yesus a tigelosiqa minjrej, “Ninji e qa nunjo areqalo singilatqa yonub tulañ keresaiñgwo. Ninji kiyaqa ulaonub?” Degsi minjrsiqa jagwa ti ya ti ñirintnırnaqa nañgi laeb.

27 Onaqa Yesus aqa angro nañgi are koba qalsib segi segi maroqneb, “Yesus a tamo kiyero deqa jagwa ti ya ti minjrqoqa aqa anjam quisib laonub?”

*Yesus a tamo aiyel nañgo jejamuq na mondor uge
gargekoba winjrej*

28 Onaqa Yesus aqa angro nañgi ti qobuñ na gilsib ya agu taqal beiq di brantosib Gadara nañgo sawaq di tiryeb. Tiryonabqa tamo aiyel nañgi tamo sub ato sawaq dena brantosib walwelosib Yesus aqa areq beb. Tamo nañgi di mondor uge uge na ojelenjo qaji. Nañgi aiyel qaja ani. Deqa tamo kalil nañgi gam dena walwelqa keresai.

29 Nañgi aiyel Yesus aqa areq bosib lelenkobaosib minjeb, “O Qotei aqa Niri, ni iga kiyergwajqa bonum? Iga padalqajqa bati bosaisonaqa ni laña ambleq di iga jaqtinj egwa bonum e?”

30 Bati deqa isaq yala dia bel tulañ gargekoba nañgi suwaroqneb.

31 Deqa mondor uge nañgi singila na pailosib Yesus minjeb, “Ni iga qarinjimqa iga bel nañgo jejamuq gilelenjom.”

32 Onaqa Yesus na minjrej, “Di kere. Ninji jaraiyosibqa bel nañgo jejamuq gilelenjoiy.” Degsi minjrsiqa mondor uge nañgi na tamo aiyel di uratnırırsib bel nañgo jejamuq gilelenjeb. Gilnabqa bel kalil nañgi gurgurosib botau dena prugeleñosib yaq aisib ya uysib moreñeb.

³³ Onaqa bel taqatoqneb qaji tamo naŋgi kumbra di unsibqa jaraiyosib qure miliq aiyeb. Aisib bel qa ti tamo aiyel mondor uge uge na ojeleño qaji naŋgi qa ti saoqnsib laqneb.

³⁴ Onaqa qure deqaji kalil naŋgi quisibqa Yesus unqajqa aqa areq beb. Bosib Yesus unsib minjeb, “Ni gago sawa endi uratosim sawa beiq gile.”

9

Yesus a tamo bei jejamu laiyej qaji di boletej

¹ Onaqa Yesus aqa aŋgro naŋgi ti olo qobuŋ gogetosibqa ya agu taqal beiq aisib Yesus aqa segi qureq di branteb.

² Brantosib sonabqa tamo qudei na tamo bei jejamu laiyej qaji a saperaq di atsib Yesus aqa areq osi beb. Onaqa Yesus a naŋgo areqalo unej di naŋgo areqalo qujai Yesus na tamo jejamu laiyej qaji di boletqa kere. Degsi unsiq deqa tamo di minjej, “O ijo aŋgro, ni areboleimeme. Ino une kalil e na kobotetmonum.”

³ Onaqa dal anjam qalie tamo qudei naŋgi Yesus aqa anjam di quisibqa naŋgo areqalo na mareb, “Yesus a Qotei misiliŋyqo.”

⁴ Naŋgi degsib are qaleqnabqa Yesus a naŋgo areqalo di qalieosiqa minjrej, “Ninji kiyaqa areqalo uge di onub?”

⁵ Anjam kiye e na tamo jejamu laiyoqo qaji di minjit ninji quisib e qa poiŋwas? ‘Ino une kalil e na kobotetmonum,’ anjam de kiyo, ‘Ni tigelosim walwel,’ anjam de kiyo?

⁶ Ariya e segi Tamo Aŋgro. E mandamq endi singila ti unum deqa e na tamo naŋgo une kobotetnjrqa kere. Ninji degsi poiŋwajqa deqa e na

tamo di boletqai.” Yesus a nañgi degsi minjrsiqa tamo jejamu laiyej qaji di koqyosiqa minjej, “Ni tigelosim ino sapera osim ino talq gile.”

⁷ Degsi minjnaqa aqa jejamu boleonaqa a tigelosiqa aqa talq gilej.

⁸ Onaqa tamo ungasari kalil nañgi Yesus aqa mañwa di unsibqa nañgi tulan̄ ullaosib Qotei aqa ñam soqtoqneb. Di kiyaqa? Qotei na singila kobaquja Yesus yej deqa.

Yesus na Matyu minjej, “Ni e daurbe”

⁹ Onaqa Yesus a dena walwelosiqa takis o qaji tamo bei aqa ñam Matyu a takis o talq di awesonaq gilsiq itej. Osiqa minjej, “Ni e daurbe.” Degsi minjnaqa a tigelosiqa Yesus dauryej.

¹⁰ Onaqa bati bei Yesus aqa angro nañgi ti Matyu aqa talq gilsib awoosib ingi uyoqneb. Nañgi segi sai. Takis o qaji tamo ti une tamo ti tulan̄ gargekoba nañgi dego bosib awoosib Yesus aqa angro nañgi ti ingi uyoqneb.

¹¹ Onaqa Farisi qudei nañgi bosib Yesus a takis o qaji tamo ti une tamo ti nañgi koba na ingi ueq nab unjrsibqa Yesus aqa angro nañgi nenem-njreb, “Nun go Qalie Tamo a kiyaqa takis o qaji tamo ti une tamo ti nañgi koba na awoosib ingi ueq nub?”

¹² Onaqa Yesus a Farisi nañgo anjam di quisiga minjrej, “Tamo ma saiqoji nañgi yu qangra tamo aqaq gilosaieqnub. Tamo ma ti nañgi segi yu qangra tamo aqaq gileqnub.

¹³ Qotei aqa anjam bei nami neñgrenyeb qaji di ningi sisiyosib geregere poingem. Agi endegsib neñgrenyeb, ‘Ningi e laña atrabeqnub. E nun go

kumbra deqa arearetbosaieqnu. Ariya niŋgi tamo naŋgi qa duлоqnsib kumbra bole bole enjroqnqab di e tulan̄ arearetbqas.’” Osiqa Yesus a olo anjam endegsi minjrej, “Tamo bei a marqas, ‘E tamo bole. E une saiqoji.’ E tamo deqaji naŋgi metnjrit ijoq bqajqa deqa mandamq aiyosai. Tamo a marqas, ‘E une ti.’ E tamo deqaji naŋgi metnjrit ijoq bqajqa deqa mandamq aiyem.”

Yesus a qurieŋ qa anjam marej

¹⁴ Bati bei Jon aqa aŋgro naŋgi Yesus aqa areq bosib minjeb, “Iga ti Farisi naŋgi ti iŋgi uratoqnsim qurieŋeqnum. Kiyaqa ino aŋgro naŋgi qurieŋosaieqnub?”

¹⁵ Onaqa Yesus na kamba minjrej, “Tamo bei a unja ban̄ ojqa bati qa aqa was naŋgi ti soqnibqa naŋgi are gulbeinjrqas e? Sai. Bunuqna nango was a naŋgi uratnjrimqa bati deqa naŋgi qurieŋoqnsib sqab.

¹⁶ “Tamo bei a gara jugo bunuj osim dena mutu gentosim gara jugo sari braŋoq di qandimqa keresai. Degsi qandimqas di bunuqna a na gara jugo sari di yansimqa gara mutu bunuj a kiňalaosim gara jugo sari di uratim braŋ qelikobaqas.

¹⁷ Tamо bei a wain bunuj osim ya nobu sariq di qamqa keresai. Ya nobu sari di nami kangrajosiq singilaej deqa tamo dena wain bunuj qamimqa wain a didiqosim ya nobu sari paratosimqa wain bileyosim mandamq aiqas. Ya nobu a dego ugeqas. A wain bunuj osim ya nobu bunujq di qamqas di naŋgi ombla bole sqab.”

Uŋa bei a Yesus aqa gara ojnaq boletosiq olo aŋgro moiyej qaji a tigeltej

18 Yesus na Jon aqa angro naŋgi yawo anjam degsi minjrsiq koboonaqa Qotei tal taqato tamo bei a walwelosiq Yesus aqa areq bosiga siŋga pulutosiqa minjej, “O Tamo Koba, ijo angro sebiŋ a endego moiqo. Deqa ni bosim ino baŋ aqa jejamuq di atimqa a olo ɣambile sqas.”

19 Onaqa Yesus na tamo di odyosiqa tigelosiq a dauryosiq gileqnaga aqa angro naŋgi dego naŋgi aiyel daurnjrsib gileb.

20 Naŋgi gileqnabqa uŋa bei ma ti soqnej qaji a Yesus aqa qoreq na dadauryosiqa baŋ waiyosiq Yesus aqa gara mutu ojej. Uŋa di a nami bai na unej leŋ aiyoqnsiq degsi soqnej wausau 12 uratej.

21 A endegsi are qalej, “E Yesus aqa gara mutu segi baŋ na ojitqa ijo ma koboqas.” Degsi are qalsiqa baŋ waiyosiq Yesus aqa gara mutu ojej.

22 Ojnaqa Yesus a bulosiqa uŋa di unsiqa minjej, “O ijo angro, ni are lawo soqnime. Ni ino are-qalo e qa siŋgilatosim ijoq bonum deqa ino ma agi koboqo.” Onaqa batı qujai deqa aqa leŋ aiyoqnej qaji di koboej.

23 Yesus a dena walwelosiq Qotei tal taqato tamo aqa talq di brantosiqa ɣam atej di tamo uŋgasari naŋgi yumba anjamоqnsib akam murqumyeqnab unjrej.

24 Unjrsiqa minjrej, “Niŋgi sasaloiy. Angro sebiŋ di a moirosai. Alanya ɣeisiq qambumtejunu.” Degsi minjrnaga naŋgi Yesus kikiyeb.

25 Osib naŋgi sasalosib tal uratonabqa Yesus a angro moiyej qaji aqa warum miligiq gilsiga angro aqa baŋ ojsiq soqtonaqa a olo ɣambile osiq tigelosiq awoej.

26 Onaqa bunuqna sawa sawa kalilq di tamo uŋgasari naŋgi Yesus aqa maŋwa deqa saoqnsib laqneb.

Yesus a tamo qudei naŋgi boletnjrej

27 Onaqa Yesus a qure di uratosiq walwelosiq gileqnaqa tamo aiyel ɣam qandimnjro qaji naŋgi gam na Yesus dauryosib giloqneb. Naŋgi giloqnsib leleŋoqnsib Yesus minjoqneb, “O Devit aqa Niri, ni iga qa are ugeimeme.”

28 Degtisib Yesus minjeqnabqa a tal bei gogetej. Tal gogetosiq sonaqa naŋgi aiyel Yesus aqa areq bonabqa minjrej, “E ningi boletŋwa kere ningi degsib are qalonub e?” Onaqa naŋgi aiyel na minjeb, “Od, Tamo Koba.”

29 Onaqa Yesus na minjrej, “Ningi e qa nuŋgo areqalo siŋgilatosib ijoq bonub deqa e ningi boletŋgwai.” Osiqa aqa baŋ waiyosiq naŋgo ɣamdamu ojej.

30 Ojnaqa naŋgo ɣamdamu poinjrnaqa naŋgi sawa uneb. Onaqa Yesus a siŋgila na minjrej, “Nuŋgo ɣamdamu boleqo deqa ningi tamo qudei naŋgi ubtosib minjraib.”

31 Onaqa naŋgi Yesus aqa anjam di dauryosai. Yesus a naŋgi aiyel boletnjrej deqa naŋgi gilsib mare mare laqnab sawa deqaji tamo uŋgasari kalil naŋgi quekriteb.

32 Naŋgi aiyel gileqnabqa tamo bei mondor uge na ojnaq medabu getenyej qaji a tamo qudei na osib Yesus aqa areq beb.

33 Bonabqa Yesus na mondor uge di wiyeton-aqa aqa meŋ otyonaqa medabu waqtosiqa anjam maroqnej. Onaqa tamo uŋgasari kalil naŋgi maŋwa

di unsibqa are koba qaloqnsib maroqneb, “Israel sawaq endi tamo bei na kumbra deqaji bei yeqnaq iga nami unosaiqneb.”

³⁴ Onaqa Farisi naŋgi maroqneb, “Mondor uge naŋgo gate koba Satan a Yesus aqa jejamuq di unu. Singila dena Yesus na mondor uge naŋgi winjreqnu.”

Yesus a tamo uŋgasari naŋgi qa dulej

³⁵ Yesus a dena walwelosiqa qure kokba ti qure kiňlala ti dia brantqnsiqa Juda naŋgo Qotei tal miliq giloqnsiqa Qotei aqa anjam palontoqnsiq minjroqnej. Qotei na aqa segi tamo uŋgasari naŋgi taqatnjrsim naŋgo Mandor Koba sqas anjam bole di Yesus na palontoqnsiq Juda naŋgi minjroqnej. Osiqa tamo ma utru segi segi so qají naŋgi bolet-njroqnej.

³⁶ Tamo uŋgasari tulan̄ gargekoba naŋgi Yesus aqa areq beqnabqa unjroqnsiq a naŋgi qa dulonqnej. Di kiyaqa? Naŋgi tulan̄ sougetesoqneb deqa. Naŋgi kaja bul mandor saiqoji.

³⁷ Deqa Yesus na aqa aŋgro naŋgi yawo anjam bei endegsi minjrej, “Wauq di iŋgi gargekoba melionub. Ariya iŋgi meli bunuj otorqajqa wau tamo gargekoba sai.

³⁸ Deqa niŋgi wau lanja minjibqa a na wau tamo naŋgi qariŋnjrimqa naŋgi aqa wauq gilsib iŋgi meli bunuj otorelenqab.”

10

Yesus aqa aŋgro 12 naŋgo ñam

¹ Onaqa Yesus na aqa aŋgro 12 naŋgi metnjrnaqa aqa areq beb. Bonabqa a na naŋgi singila enjrej.

Naŋgi na tamo uŋgasari naŋgo jejamuq dena mon-dor uge uge winjrqajqa ti tamo uŋgasari naŋgo ma utru segi segi kalil kobotetnjrqajqa ti deqa marsiq naŋgi siŋgila enjrej.

² Aqa anjam maro tamo 12 siŋgila enjrej qaji naŋgo ñam agiende. Bei Saimon. Yesus na aqa ñam bei Pita waiyej. Naŋgi aqa was Andru wo. Bei Sebedi aqa ɻiri Jems aqa was Jon wo.

³ Ariya Filip Bartolomyu wo. Bei Tomas naŋgi takis o qaji tamo Matyu wo. Bei Alfias aqa ɻiri Jems naŋgi Tadius wo.

⁴ Bei Saimon agi Rom naŋgi winjrqajqa maro-qnej qaji. Ariya bei Judas Iskariot agi bunuqna Yesus osiqa jeu tamo naŋgo banq di atej qaji.

Yesus na aqa aŋgro 12 naŋgi wau enjrej

⁵ Osiqa Yesus na aqa aŋgro 12 naŋgi di qariŋnjrqa osiqa minjrej, “Niŋgi qure qureq giloqniy. Niŋgi sawa bei bei qaji naŋgoq giloqnaib. Samaria naŋgo qureq dego giloqnaib.

⁶ Niŋgi Israel naŋgo segiq giloqniy. Israel naŋgi sougetejunub. Naŋgi kaja bul mandor saiqoji.

⁷ Deqa niŋgi giloqnsibqa anjam endegsib min-jroqniy, ‘Qotei lan qureq di unu qaji a nuŋgo Mandor Koba sosim niŋgi taqatŋgwajqa bati jojomqo.’

⁸ O ijo aŋgro, niŋgi na Israel naŋgi degsib min-jroqnsibqa naŋgo ma tamo naŋgi boletnjroqniy. Tamo moreŋqniqbqa olo tigeltnjroqniy. Tamo naŋgo jejamu yu na ugeeleno qaji naŋgi olo gerein-jroqniy. Mondor uge uge naŋgi dego tamo uŋgasari naŋgo jejamuq dena winjroqniy. E siŋgila eŋgonum qaji di niŋgi awaiyosai. Elanja eŋgonum. Deqa niŋgi

dego tamo naŋgi laŋa gereinjroqniy. Naŋgi awai bei yainjraib.

⁹ “Niŋgi meniŋ silali agi gol ti silva ti kapa ti di osib gilaib.

¹⁰ Niŋgi walwelosib nunŋo qaquŋ aib. Gara jugo aiye aiyel aib. Siŋga tatal aiye aiyel aib. Walwelqa-jqa toqoŋ ojaib. Niŋgi Qotei aqa wau tamo unub deqa niŋgi qure qureq giloqnibqa naŋgi na ingi ingi deqaji niŋgi enŋgoqnqab.

¹¹ “Niŋgi qure bei beiq di brantoqnsibqa tamo bole bei itoqnsib aqa talq di soqniy. Dia sosib dena tigeloqnsib olo qure beiq giloqniy.

¹² Niŋgi tal bei gogetoqnsibqa tamo uŋgasari tal miliqiŋ di unub qaji naŋgi endegsib minjroqniy, ‘Niŋgi lawo na soqniy.’

¹³ Degtisib minjroqniqbqa naŋgi niŋgi joqsib gereiŋgibqa nuŋgo lawo anjam di naŋgoq di uratib soqnam. Ariya naŋgi niŋgi gereiŋgosaiabqa nuŋgo lawo anjam di olo puluosim nunŋoq bem.

¹⁴ Tamo bei a niŋgi gereiŋgwa uratimqa kiyo nunŋo anjam quqwa asgiyimqa kiyo niŋgi qure di uratqa oqnsib nunŋo siŋga tumbrum butuyoqniy.

¹⁵ E bole merŋgwai. Mondon Qotei a tamo uŋgasari naŋgo une qa peginjrqa batiamqa Qotei na qure deqaji naŋgi tulan padaltnjrougetqas. Sodom qure ti Gomora qure ti naŋgi Qotei na mondon degsim padaltnjrqasai. A naŋgi gulbe kiňala enjrqas.”

Gulbe bei bei brantoqnsib

¹⁶ Osiqa Yesus a olo marej, “Niŋgi quiy. Niŋgi kaja du du bul unub deqa e na niŋgi qarinjgitqa gilsib baŋŋ juwaŋ naŋgo ambleq di wauoqnsib.

Deqa niŋgi amal naŋgo kumbra dauryiy. Agi amal naŋgi gaigai ɣam atoqnsib laqnub. Niŋgi binoŋ naŋgo kumbra dego dauryiy. Agi binoŋ naŋgi kumbra bole segi yeqnub. Naŋgi kumbra uge yosaieqnub.

¹⁷ Deqa niŋgi tamo naŋgi qa geregere ɣam atoqniy. Naŋgi bosib niŋgi ojeleñosib anjam pegiyo talq di niŋgi tigeltnqoqnqab. Osib naŋgo Qotei tal miliqiŋ di niŋgi kumbaiŋqoqnqab.

¹⁸ Osib niŋgi olo joqoqnsib Rom naŋgo gate ti naŋgo mandor ti naŋgo ulatamuq di niŋgi tigeltnqoqnqab. Yimqa niŋgi ijo anjam bole palontoqnsib naŋgi minjroqnnqab. Osib sawa bei bei qaji naŋgi dego ijo anjam minjroqnnqab.

¹⁹ Naŋgi na niŋgi ojoqnsib anjam pegiyo talq di tigeltnqoqnibqa niŋgi ulaaib. Osib endegsib are qalaib, ‘Iga na kamba anjam kiyersim minjrqom?’ Niŋgi degaib. Bati deqa Qotei na powo eŋgimqa niŋgi kamba anjam minjrqab.

²⁰ Niŋgi segi na anjam minjrqasai. Nuŋgo Abu aqa Mondor na nungo medabu sinqilatetŋim niŋgi anjam marqab.

²¹ “Bati deqa kumbra uge endeqaji brantelenqas. Tamo qudei na naŋgo segi was naŋgi ojoqnsib jeu tamo naŋgo banq di atoqnibqa naŋgi na naŋgi ñumoqnib moreñoqnnqab. Tamo qudei na naŋgo segi angro naŋgi dego degsib ojoqnnqab. Angro qudei na naŋgo segi ai abu naŋgi ojoqnsib jeu tamo naŋgo banq di atoqnibqa naŋgi na naŋgi ñumoqnib moreñoqnnqab.

²² Niŋgi ijo ɣam ejunub deqa tamo uŋgasari kalil naŋgi niŋgi qa tulaŋ ugeoqnsib jeutnqoqnqab.

Ariya ningi ijo ñam singila na ojsib gilsib diño bati itqab di Qotei na ningi elenqas.

²³ Ningi qure bei beiq di brantoqnibqa tamo ungasari naŋgi na ningi ugeugeingoqnibqa ningi naŋgo qure di uratoqnsib olo qure beiq giloqniy. E bole mernejgwai. Ningi Israel naŋgo qure kalil keretosaisoqnibqa e Tamo Anjro olo bqai.

²⁴ “Skul anjro na aqa qalie tamo a bunyqa keresai. Kaŋgal tamo na aqa tamo koba a bunyqa keresai.

²⁵ Skul anjro a kobaqujaosimqa di aqa qalie tamo ombla kerekereqab. Kaŋgal tamo a powo koba osimqa di aqa tamo koba ombla kerekereqab. E tal aqa abu bul. Jeu tamo naŋgi na e merbeqnub, ‘Ni Satan.’ Degtib ñam merbeqnub. Ningi ijo talq di unub deqa jeu tamo naŋgi na ningi dego ñam tulan ugedamu mernejgoqnqab.”

Ningi Qotei segi ulaiyyi

²⁶ Osiqa Yesus a olo marej, “Ningi jeu tamo naŋgi di ulainjraib. Kumbra kalil kabuejunu qaji di boleq dqas. Anjam kalil uliejunu qaji di tamo naŋgi quisib poinjrqas.

²⁷ Deqa anjam e ambruq di mernejeqnum qaji di ningi olo suwaŋqoq di maroqniy. Anjam ningi lumu na queqnub qaji di ningi olo bijal goqeq di tigelosib palontoqniy.

²⁸ Ningi jeu tamo naŋgi ulainjraib. Naŋgi nuŋgo qunun moirotqa keresai. Naŋgi nuŋgo jejamu segi moirotqa kere. Deqa ningi naŋgi ulainjraib. Qotei a segi ulaiyyi. A na qujai tamo naŋgo qunun ti jejamu ti turtnjrsim ŋamyuwoq di breinjrqas kere.

29 “Niñgi qalie. Tamo nañgi qebari sinjir silali kobaquja na awaiyosaieqnub. Silali kiñala na awaiyeqnub. 10 toea dego. Ariya nuñgo Abu a na qebari sinjir nañgi geregere taqatnjreqnu. A na marimqa bei a uloñosim mandamq aña keresai.

30 Dego kere Qotei a nunjo gate bañga segi segi sisivoqnsiq geregere taqateqnu.

31 Deqa niñgi ulaaib. Niñgi qebari kalil nañgi tulan buñnjrejunub.”

Niñgi Yesus aña ñam marqajqa ulaaib

32 Osiqa Yesus a olo marej, “Niñgi mandam tamo nañgo ulatamuq di ijo ñam boleq atsib marqab di mondon e kamba ijo Abu lañ qureq di unu qaji aña ulatamuq di nunjo ñam boleq atsiy marqai.

33 Ariya niñgi mandam tamo nañgo ulatamuq di ijo ñam marqajqa asgiñgwas di mondon e kamba ijo Abu lañ qureq di unu qaji aña ulatamuq di nunjo ñam marqajqa asgibqas.”

Iga Yesus tulan qalaqalaiyoqnqom

34 Osiqa Yesus a olo marej, “Niñgi kiyersib are qalonub? E na qaja kobotitqa tamo uñgasari nañgi geregere lawo na sqajqa e deqa bem kiyo? Sai. E na qaja kobotqajqa bosai. E na tamo uñgasari nañgi pupoinjritqa nañgi jeu jeu sqajqa deqa bem.

35 Od, e jeu kumbra tigeltqa bem. Deqa añgro mel nañgi na nañgo segi abu nañgi jeutnjroqnqab. Añgro sebiñ nañgi na nañgo segi ai nañgi jeutnjroqnqab. Aiñ yala nañgi na nañgo segi aiñ qeli nañgi jeutnjroqnqab.

36 Tamo uñgasari tal qujaiq di unub qaji nañgi jeu jeu sqab.

37 “Deqa ningi quiy. Tamo bei na aqa ai abu naŋgi tulan qalaqalainjrsimqa ariya di buŋyosim e tulan qalaqalaibqasai di a e ombla wauqa keresai. Tamo bei na aqa aŋgro mel naŋgi ti aqa aŋgro sebiŋ naŋgi ti tulan qalaqalainjrsimqa ariya di buŋyosim e tulan qalaqalaibqasai di a e ombla wauqa keresai.

38 Tamo bei na aqa segi ɻamburbas qoboiyosim e daurbqasai di a e ombla wauqa keresai.

39 Tamo bei a aqa segi ɻambile taqatqajqa arearetqas di a padalqas. Ariya tamo bei a e qa are qalsimqa aqa segi ɻambile uratqas di a olo ɻambile bole oqas.”

Tamo bei na Yesus aqa aŋgro gereiyqas di Qotei na a awai boleyqas

40 Osiqa Yesus a olo marej, “Tamo bei na ningi osim geregereiŋgas di a na e dego osim geregereibqas. Tamo a e oqas di a na ijo Abu e qariŋbej qaji di dego oqas.

41 Tamo bei a endegsi are qalqas, ‘Tamo di a Qotei aqa medabu o qaji tamo.’ A degsi are qalsimqa tamo di osim gereiyqas di Qotei na kamba awai bole yqas. Di kiyaqa? A na Qotei aqa medabu o qaji tamo di gereiyqo deqa. Tamo bei a endegsi are qalqas, ‘Tamo di a Qotei aqa anjam dauryeqnu qaji tamo.’ A degsi are qalsimqa tamo di osim gereiyqas di Qotei na kamba awai bole yqas. Di kiyaqa? A na Qotei aqa anjam dauryeqnu qaji tamo di gereiyqo deqa.

42 Tamo bei a ijo aŋgro bei unsim endegsi are qalqas, ‘Tamo di a Yesus aqa aŋgro.’ A degsi are qalsimqa ijo aŋgro di osim ya ulili tigsim anaiyqas di

Qotei na kamba awai bole yqas. E bole mernjgwai. A ijo segi aŋgro gereiyqo deqa aqa awai bole Qotei na yqas qaji di tamo bei na olo yaiyqa keresai.”

11

Jon yansnjro qaji aqa aŋgro qudei naŋgi anjam bei Yesus nenemyeb

¹ Yesus na aqa aŋgro 12 naŋgi anjam degsi minjrsiq koboonaqa a sawa di uratosiqa qure qureq giloqnsiqa tamo uŋgasari naŋgi Qotei aqa anjam plaltosiq minjroqnej.

² Bati deqa Jon yansnjro qaji a tonto talq di soqnej. Sonaqa wau kalil Kristus a yoqnej qaji di tamo qudei naŋgi unsib deqa mare mare laqnab Jon a quej. Qusiqa aqa aŋgro qudei naŋgi qariŋnjrnaq Yesus aqa areq gilsib endegsib nene-myeb,

³ “Kristus agi Qotei na nami qariŋyim bqajqa marej qaji di ni kiyo? Ni saiamqa iga tamo bei qa tarinjom kiyo?”

⁴ Onaqa Yesus na kamba minjrej, “Niŋgi aisib anjam niŋgi queqnub qaji deqa ti kumbra niŋgi uneqnub qaji deqa ti Jon saiyosib minjiy.

⁵ Endegsib minjiy, ‘Tamo ɻam qandimnjro qaji naŋgi olo ɻam poinjreqnaqa sawa uneqnub. Tamo jejamu lainjro qaji naŋgi olo walweleqnub. Tamo naŋgo jejamu yu na ugeeļeļo qaji naŋgo yu kalil koboeqnu. Tamo dabkala getenjro qaji naŋgo dabkala olo waqeqnu. Tamo moreļo qaji naŋgi olo tigeleqnub. Tamo sougetejunub qaji naŋgi Qotei aqa anjam bole queqnub.

6 Tamo nañgi e qa nañgo areqalo siñgilatoqnsib olo ijo ñam ulontosaieqnub qaji nañgi tulan̄ areboleboleinjreqnu.’ ”

7 Onaqa Jon aqa añgro nañgi Yesus aqa anjam di quisibqa olo puluosib Jon minjqaqqa aiyeb. Aiyeqnaqba Yesus na tamo uñgasari gargekoba a ombla soqneb qaji nañgi Jon qa endegsi minjrej, “Ningi tamo kiyero unqajqa wadau sawaq gileb? Ningi tamo silai aqa banja bul jagwa na pilet eqnaqa di unqajqa gileb kiyo? Sai. Jon a tamo deqaji sai.

8 Deqa ningi tamo kiyero unqajqa wadau sawaq gileb? Ningi tamo gara bole walaosi laqnu qaji di unqajqa gileb kiyo? Di dego sai. Tamo gara bole walaeqnub qaji nañgi mandor kokba nañgo talq di unub.

9 Deqa ningi kiyaqa wadau sawaq gileb? Ningi Qotei aqa medabu o qaji tamo bei unqajqa gileb kiyo? Od. Agide. Ningi deqa unqa gileb. Deqa e ningi endegsi merñgawai. Jon a Qotei aqa medabu o qaji tamo kobaquja. A na Qotei aqa medabu o qaji tamo kalil nañgi tulan̄ buñnjrejunu.

10 Agi nami e mandamq aiyosaisonamqa Qotei a Jon qa endegsi merbej, ‘Ni que. E na ijo anjam maro tamo qariñyitqa a ni qa namoosim ino gam gereiyetmzas.’ Tamo di agi Jon. Anjam di Qotei aqa neñgrenq di unu.

11 Deqa e bole merñgawai. Jon yansnjro qaji a na tamo kalil mandamq endi unub qaji nañgi tulan̄ buñnjrejunu. Ariya tamo qudei ñam saiqoji unub qaji nañgi Qotei na taqatnjroqnsiqa nañgo Mandor Koba unu deqa nañgi olo Jon tulan̄ buñyejunub.

12-13 “Nami Moses aqa dal anjam ti Qotei aqa medabu o qaji tamo nañgo anjam ti maroqneb

dena bosi bosiq Jon yansnjro qaji aqa bati bran-tej. Dena bosiq bini tamo uŋgasari naŋgi Qotei na taqatnjsim naŋgo Mandor Koba sqajqa tulanŋ singilaeqnub. Qotei agi lanŋ qureq di unu.

¹⁴ Niŋgi quiy. Qotei aqa medabu o qaji tamo Elaija a olo bqas. Anjam di nengrenq di unu. Elaija agi bej. E Jon qa mernŋwa osimqa Elaija aqa ñam na yawo anjam mernŋeqnum. Niŋgi ijo anjam di quqwa are soqnimqa quiy.

¹⁵ Tamo a dabkala ti sqas di a ijo anjam di geregere quem.

¹⁶ “Tamo uŋgasari bini bati endeqa unub qaji naŋgo kumbra qa e yawo anjam kiyersiy marqai? E naŋgo kumbra qa endegsi marqai. Naŋgi aŋgro du du bul qure ambleq di alaŋoqnsib aŋgro qudei na qudei minjreqnub,

¹⁷ ‘Iga yumba anjamonumqa niŋgi lou tuosai. Iga are uge qa louonumqa niŋgi akamosai.’ ”

¹⁸ Osiqa Yesus a olo marej, “Jon a bosiqiŋgi ti wain ti uratosiq sonaqa tamo naŋgi a qa maro-qneb, ‘A mondor uge ti unu.’ ”

¹⁹ Ariya e Tamo Angro bosimqa ingi ti wain ti ueqnamqa tamo naŋgi e nuboqnsib mareqnub, ‘Niŋgi uniy. Yesus a qunjaŋ ani. A wain uyo ani. A takis o qaji tamo ti une tamo ti naŋgi koba na wal-weleqnub.’ ” Osiqa Yesus a olo marej, “Qotei aqa tamo uŋgasari naŋgi aqa wau kalil unoqnsib dena naŋgi bole qalieeqnub, aqa powo tulanŋ kobaquja.”

*Yesus na tamo uŋgasari are bulyosai qaji naŋgi
ŋirinŋnjrej*

²⁰ Qure qudei Yesus a dia maŋwa gargekoba yoqnej qaji naŋgi are bulyosai deqa a naŋgi qa ŋirinŋej.

21 Osiqa minjrej, “O Korasin qure ti Betsaida qure ti, niŋgi tulaŋ padaloougetqab. Di kiyaqa? Maŋwa e nuŋgoq di yoqnem qajī di Tair qure ti Saidon qure ti naŋgoq di brantej qamu naŋgi nami are bulyosib are uge qa gara jigsib ñam sumq di awoeb qamu.

22 Deqa e niŋgi endegsi mern̄gwai. Mondoŋ Qotei a tamo uŋgasari naŋgo une qa peginjrqa batiamqa a na niŋgi tulaŋ padaltn̄gougetqas. Qotei na Tair qure ti Saidon qure ti naŋgi degsim padaltn̄rqa-sai. A naŋgi gulbe kiňala enjrqas.

23 O Kaperneam tamo uŋgasari, niŋgi laŋ qureq oqwa kere e? Keresai. Qotei na niŋgi breiŋgimqa moiyo qureq aiqab. Di kiyaqa? Maŋwa e nuŋgoq di yoqnem qaji di Sodom qure naŋgoq di brantej qamu naŋgi bini unub qamu. Naŋgi padalosai qamu.

24 Deqa e niŋgi endegsi mern̄gwai. Mondoŋ Qotei a tamo uŋgasari naŋgo une qa peginjrqa batiamqa a na niŋgi tulaŋ padaltn̄gougetqas. Qotei na Sodom qure naŋgi degsim padaltn̄rqa-sai. A naŋgi gulbe kiňala enjrqas.”

Yesus na niŋgi aqaryaiŋgimqa niŋgi aqaratqab

25 Bati deqa Yesus a endegsi Qotei pailyej, “O Abu, ni segi laŋ qa ti mandam qa ti Koba. E ino ñam soqteqnum. Di kiyaqa? Ni ijo anjam kalil powo tamo naŋgi qa ulitoqnsimqa tamo naŋgi aŋgro du du bul unub qaji naŋgi segi qa babteqnam naŋgi poinjreqnu.

26 Od, Abu, ni ino segi areqalo dauryosim agi degyeqnum.”

²⁷ Yesus a degsi Qotei pailyej. Osiqa marej, “Ijo Abu na ingi ingi kalil ijo banq di atelenjej unu. E segi Qotei aqa Niri. Tamo bei a e qa qaliesai. Ijo Abu a segi e qa qalie. Tamo bei a ijo Abu qa qaliesai dego. E segi ijo Abu qa qalie. E na tamo qudei naŋgi ijo Abu osornjrqa areibqas di osornjrqai. Yim naŋgi dego ijo Abu qa qalieqab.

²⁸ “Niŋgi gulbe qoboiyoqnsib waukobaeqnub qaji niŋgi kalil ijoq babqa e na aqaryainqitqa niŋgi aqaratqab.

²⁹ E ijo segi ñam aguq atoqnsim tamo naŋgi lawo kumbra enjreqnum. Deqa niŋgi e qa geregere qaliesosib ijo anjam dauryoqniy. Yim niŋgi aqaratqab.

³⁰ Niŋgi ijo anjam dauryqajqa di gulbe sai. Di oto. Wau e na niŋgi engeqnum qaji di dego gulbe sai. Di oto.”

12

Yesus a segi yori bati aqa Tamo Koba

¹ Yori bati bei Yesus aqa angro naŋgi ti wau ambleq na giloqnsibqa aqa angro naŋgi mamnjrnaqa bem sum gei eleqoqnsib uye uye giloqneb.

² Naŋgi degsib gileqnabqa Farisi qudei naŋgi bosib naŋgi unjrsib Yesus minjeb, “Ni une. Ino angro naŋgi gago dal anjam groteqnub. Yori bati qa kumbra degyo di getento koba.”

³ Onaqa Yesus na kamba Farisi naŋgi minjrej, “Nami Devit aqa wau tamo naŋgi ti mamnjrnaqa kumbra yeb qaji di niŋgi buk miliq di sisiyosai kiyo?

⁴ Devit a atra tal miliq gilsiqha Qotei atraiyqa-jqa bem osiqa aqa wau tamo naŋgi koba na uyeb.

Bem di getento. Di atra tamo naŋgo segi uyzajqa bem. Devit a degyej di a dal anjam grotej. Ariya a Qotei aqa ɻamgalaq di une saiqojo.

⁵ Dal anjam bei dego neŋgreŋq di unu. Anjam agiende. Atra tamo naŋgi yori bati gaigai atra tal miliqiq di waeqnb. Naŋgo kumbra dena naŋgi dal anjam groteqnb. Ariya naŋgi Qotei aqa ɻamgalaq di une saiqojo. Niŋgi anjam di nami buk miliqiq di sisiyosai kiyo?

⁶ Ariya e niŋgi endegsi mern̄gwai. Bini tamo bei atra tal tulaŋ bunyeyunu qaji a nuŋgo ambleq di unu.

⁷ Qotei aqa anjam bei dego nami endegsib neŋgreŋyeb unu, ‘Niŋgi e laŋa atraibeqnb. E nuŋgo kumbra deqa arearetbosaeqnu. Niŋgi tamo naŋgi qa duloqnsib kumbra bole bole enjroqnb di e tulaŋ arearetbqas.’ O Farisi, niŋgi Qotei aqa anjam di sisiyosib poiŋgo qamu niŋgi tamo une saiqojo naŋgi gulbe enjrosai qamu.

⁸ E Tamo An̄gro. Deqa e segi na yori bati taqatejunum. E segi yori bati aqa Tamo Koba.”

Yori bati qa Yesus a tamo baŋ qandamyej qaji di boletej

⁹ Onaqa Yesus a dena walwelosiqa qure beiq di brantosiqa Juda naŋgo Qotei tal miliqiq gilej.

¹⁰ Qotei tal miliqiq di tamo bei baŋ qandamyej qaji a soqnej. Deqa tamo qudei naŋgi Yesus aqa jejamuq di anjam laŋa qametqa marsibqa endegsib nenemyeb, “Iga yori bati qa tamo boletqom di kere kiyo? Dal anjam a kiyersi marqo?”

¹¹ Onaqa Yesus na kamba minjrej, “Tamo bei aqa kaja a yori bati qa uloŋosim subq aiyimqa a

uratqasai. A na aqaryaiyosim olo subq dena osim goge atqas. Di ningi qalie.

¹² Ariya tamo nañgi kaja sai. Nañgi tamo qunuñti. Deqa iga yori bati qa tamo aqaryaiyim a bole sqas di kumbra bole.”

¹³ Yesus a nañgi degsi minjrsiqa tamo banj qandamyej qaji di minjej, “Ni ino banj waiy.” Degsi minjnaqa aqa banj waiyonaq boleej. Aqa banj bei ombla na kerekereeb.

¹⁴ Onaqa Farisi nañgi Qotei talq dena oqedosib nañgi gam kiyersib Yesus qalib moiqajqa deqa qairoqneb.

Yesus a segi qujai Qotei aqa wau tamo bole

¹⁵ Farisi nañgi Yesus qalqajqa qairoqneb di qalieosiqa qure di uratosiq walwelosiq gilej. A gileqnaqa tamo uñgasari gargekoba nañgi a dauryeqnab a nañgo ma tamo kalil nañgi boletnjroqnej.

¹⁶ Osiqa a na nañgi saidnjroqnej, “Ningi ijo ñam ubtosib maraib.”

¹⁷ Yesus a kumbra di yej deqa anjam bei Qotei aqa medabu o tamo Aisaia nami marej qaji di aqa damu brantej. A anjam endegsi marej,

¹⁸ “Endi ijo wau tamo e segi na giltem qaji. E a tulan qalaqalaiyeqnum. E a qa areboleboleibeqnu. E ijo Mondor aqaq di atitqa a na sawa bei bei qaji nañgi endegsim minjroqnqas, ‘Ningi kumbra bole dauryiy.’

¹⁹ A ñirinj anjam maroqnqasai. A lelenjkobaoqnqasai. Gamq di tamo uñgasari nañgi aqa kakro quoqnqasai.

20 Silai aqa baŋga genqɑ laqnimqa a na torei gentqasai. Waŋal aqa puloŋ kiñalaamqa a na torei mosotqasai. A degsim lawo na wauoqnsim gilsim gilsim kumbra bole torei singilatqas.

21 Yimqa sawa bei bei qaji naŋgi a qa naŋgo are-qalo singilatosib a na naŋgi aqaryainjrqajqa deqa tarinjoqnsib sqab.”

Tamo qudei naŋgi maroqneb, “Yesus a Belsebul aqa singila na waueqnu”

22 Onaqa batı di tamo bei mondor uge na med-abu getentosiq ɻam qandimyej qaji a soqnej. Son-aqa tamo qudei na a osib Yesus aqa areq beb. Bonabqa Yesus na mondor uge di wiyetonaqa aqa meŋ otyonaqa aqa ɻamdamu boleosiq a sawa un-siqa anjam bole maroqne. **23** Onaqa tamo uŋgasari kalil naŋgi Yesus aqa maŋwa di unsibqa tulaŋ prugugetosib maroqneb, “Tamo di a Devit aqa Niri kiyo?”

24 Onaqa Farisi naŋgi naŋgo anjam di quisibqa maroqneb, “Sai. Mondor uge naŋgo gate koba Belsebul a Yesus aqa jejamuq di unu. Singila dena a na mondor uge naŋgi winjreqnu.”

25 Onaqa Yesus a naŋgo areqalo di qalieosiqa yawo anjam bei endegsi minjrej, “Tamo naŋgi sawa qujaiq di unub qaji naŋgi segi poaiyelosib qotqab di naŋgi koba na geregere sqa keresai. Naŋgi niňaŋosib koboqab. Tamo naŋgi qure qujai kiyo tal qujai kiyo di unub qaji naŋgi segi poaiyelosib qotqab di naŋgi dego koba na geregere sqa keresai.

26 Dego kere Satan na aqa segi mondor uge naŋgi winjrqas di naŋgi poaiyelqab. Deqa Satan a

kiyersim aqa mondor uge naŋgi olo taqatnjqas?
Di keresai.

²⁷ Niŋgi mareqnub, ‘Yesus a Belsebul aqa singila na mondor uge naŋgi winjreqnu.’ Di sai. E Belsebul aqa singila na mondor uge naŋgi winjrqai di yai aqa singila na nuŋgo angro naŋgi mondor uge winjrqab? Deqa naŋgi segi na mernŋwab, ningi anjam groteqnub.

²⁸ Ariya e Qotei aqa Mondor aqa singila na mondor uge naŋgi winjrqai di niŋgi endegsi poiŋgwas, ‘Bole, Qotei a gago Mandor Koba sosim iga taqatgwajqa bati brantqo.’ Ningi degsi poiŋgwas.

²⁹ “Tamo bei a kiyersim tamo singila koba bei aqa tal gogetosim aqa ingi ingi kalil bajinŋqas? E marqai. A mati tamo di sil na tontim soqnimqa di aqa ingi ingi kalil bajinŋqas. Tontqasai di aqa ingi ingi bajinŋqa keresai.

³⁰ “Tamo bei na e beterbqasai di a na e jeutbqas. Tamo bei a e ombla wauqasai di a na ijo wau ugetetbqas.

³¹ “Deqa e ningi endegsi merŋgwai. Tamo ungasari naŋgo une kalil Qotei na kobotetnjqas. Naŋgo misiliŋ anjam mareqnub qaji une di dego Qotei na kobotetnjqas. Ariya naŋgi Qotei aqa Mondor misiliŋqab une di Qotei na kobotetnjqasai.

³² E Tamo Angro. Tamo a e misiliŋbqas une di Qotei na kobotqas. Ariya tamo a Mondor Bole misiliŋqas une di Qotei na kobotqasai. Bini bati endeqa Qotei na kobotqasai. Mondoŋ dego Qotei na kobotqasai.”

Nam uge naŋgi gei uge ateqnub

33 Osiqa Yesus a olo marej, “Nam bole naŋgi gei bole ateqnub. Nam uge naŋgi gei uge ateqnub. Deqa tamo naŋgi ɻjam aqa gei unsibqa dena poinjrqas, ‘Nam di bole. Nam di uge.’

34 Niŋgi amal uge bul. Niŋgi tamo uge. Deqa niŋgi kiyersib anjam bole maroqnqab? Tamo naŋgo areqalo kalil naŋgo are miliq na oqoqnsiq medabuq na branteqnu.

35 Tamo bole naŋgo are miligi di areqalo bole na maqejunu. Deqa naŋgi kumbra bole yeqnub. Ariya tamo uge naŋgo are miligi di areqalo uge na maqejunu. Deqa naŋgi kumbra uge yeqnub.

36 “Deqa e niŋgi endegsi merŋgwai. Mondonj Qotei a tamo ungasari naŋgi peginjrqa batiamqa naŋgo anjam kalil naŋgi laŋa laŋa mareqnub qaji di Qotei na naŋgo jejamuq di qametnjrqas.

37 Ino anjam boleamqa Qotei na mermqas, ‘Ni tamo bole.’ Ino anjam ugeamqa Qotei na mermqas, ‘Ni tamo uge.’ ”

Tamo qudei naŋgi Yesus aqa maŋwa unqajqa minjeb

38 Onaqa dal anjam qalie tamo qudei ti Farisi qudei ti naŋgi na kamba Yesus minjeb, “O Qalie Tamo, ni Qotei aqa maŋwa bei babtim iga unqom.”

39 Onaqa Yesus na kamba minjrej, “Tamo ungasari bini bati endeqa unub qaji naŋgo kumbra tulan ugedamu. Naŋgi Qotei areiyosaieqnub. Naŋgi gaigai ijo maŋwa laŋa unqajqa metbeqnub. Deqa e na ijo maŋwa bei naŋgi osornjrqasai. Qotei aqa medabu o tamo Jona aqa maŋwa segi osornjritqa naŋgi unqab.

40 Agi Jona a bati qalub qolo qalub qe ani aqa miliqiq di soqnej. Dego kere e Tamo Āŋgro bati qalub qolo qalub sub miliqiq di sqai.

41 Mondoŋ Qotei na tamo uŋgasari naŋgi peginjrqa batiamqa Ninive tamo naŋgi tigelqab. Tigelosibqa tamo uŋgasari bini bati endeqa unub qaji naŋgo kumbra uge babtetcnjrqab. Naŋgi degyqab. Di kiyaqa? Ninive tamo naŋgi nami Jona aqa anjam quſib are bulyeb deqa. Ariya bini tamo bei Jona tulan buŋyejunu qaji a nuŋgo ambleq di unu.

42 Mondoŋ Qotei na tamo uŋgasari naŋgi peginjrqa batiamqa uŋja mandor nami guta di sawa taqatoqnej qaji a dego tigelqas. Tigelosimqa tamo uŋgasari bini bati endeqa unub qaji naŋgo kumbra uge babtetcnjrqas. A degyqas. Di kiyaqa? Uŋja di a nami Solomon aqa powo kobaquja unqa marsiqsa sawa isaq na walwelosi bej deqa. Ariya bini tamo bei Solomon tulan buŋyejunu qaji a nuŋgo ambleq di unu.”

Mondor uge a tamo aqa jejamu uratosim olo bqas

43 Osiqa Yesus a olo marej, “Mondor uge a tamo bei aqa jejamuq dena ulanosim sawa kaŋgraŋoq gilqas. Gilsim dia laqnsimqa aqaratqajqa sawa ŋamam ugeiyim marqas,

44-45 ‘E olo puluosiy ijo tal uratem qaji deq olo aiqai.’ A degsi marsimqa aisim tal di laŋa unu degsim unqas. Tal di nami maŋ solsib ingi ingi kalil gereiyeb milalejunu di unsimqa olo puluosim gilsim mondor uge 7 tulan ugedamu naŋgi joqsim bosim koba na tal dia sqab. Soqnibqa

tamo di aqa so tulan̄ ugeqas. Aqa so uge namij degwasai. Aqa so olo tulan̄ ugedamuqas. Dego kere tamo un̄gasari bini bati endeqa kumbra uge uge yeqnub qaji nañgi degsib sougetesqab.”

Yesus a marej, “Ijo ai ijo was nañgi tal qabe?”

⁴⁶ Yesus na tamo un̄gasari gargekoba nañgi anjam degsi minjreqnaqa aqa was nañgi aqa ai koba na Yesus qa bosib talq di iteb. Yesus a warum miliqiq di sonaqa nañgi na anjam bei minjqajqa deqa oqeç di tigelesoqneb.

⁴⁷ Onaqa tamo bei na Yesus minjej, “Ni que. Ino was nañgi ino ai ombla na ni anjam bei mermqa bonub agi oqeç di tigelejunub.”

⁴⁸ Onaqa Yesus na kamba minjej, “Ijo ai ijo was nañgi tal qabe?”

⁴⁹ Degsi minjsiqa aqa bañ na aqa segi aŋgro nañgi osoryosiqa minjej, “Ni une. Ijo ai ijo was nañgi agide.

⁵⁰ Tamo a ijo Abu lañ qureq di unu qaji aqa areqalo dauryoqncas di a ijo was bole. A ijo jaja. A ijo ai.”

13

Yesus a saga yago qa yawo anjam marej

¹ Bati deqa Yesus a tal uratosiqa alile aisiq ya agu qalaq di awoej.

² Onaqa tamo un̄gasari tulan̄ gargekoba nañgi bosib aqa areq di koroonabqa a sasalosiqa qobun̄ gogetosiq di awoej. Awesonaqa tamo un̄gasari kalil nañgi alile di tigelesoqneb.

3 Tigelesonabqa a na yawo anjam gargekoba naŋgi minjroqnej. Yawo anjam bei endegsi minjrej, “Niŋgi quiy. Tamo bei a gilsiq aqa iŋgi wauq di saga yago breiyelenej.

4 Breiyonaqa saga yago qudei gam qalaq aiyeleñeb. Ainabqa qebari naŋgi bosib uyekriteb.

5 Saga yago qudei mandam lanjaq di aiyeleñeb. Mandam di guma meniŋ ti. Gogeq di mandam kiňala. Deqa saga yago aiyeleñosib urur oqoqujateb.

6 Naŋgo jirim tulan guma aiyosai deqa sen oqsiq kanjkaŋonaqa naŋgi laosib moreñeb.

7 Saga yago qudei sil luwit ambleq di aiyeleñeb. Dena oqeb qaji sil luwit na dega dauryosiq oqsiq kabutnırnaq geitosai.

8 Saga yago qudei mol mandam boledamuq di aiyeb. Di aisib oqoboledamuyosib gei tulan gargekoba ateleñeb. Qudei 100. Qudei 60. Qudei 30.

9 Tamo a dabkala ti sqas di a ijo anjam endi geregere quem.”

Yesus a kiyaqa tamo ungasari naŋgi yawo anjam minjroqnej?

10 Onaqa Yesus aqa angro naŋgi aqa yawo anjam di quisibqa naŋgi aqa areq bosib nenemyeb, “Ni kiyaqa tamo ungasari naŋgi yawo anjam minjreñum?”

11 Onaqa Yesus na kamba minjrej, “Qotei lan qureq di unu qaji a na aqa segi tamo ungasari naŋgi taqatnırsim naŋgo Mandor Koba sqas. Anjam di aqa utru uliejunu. Di Qotei na babtimqa ijo angro

niŋgi segi utru qaliegab. Ariya a na tamo ungasari lanaj naŋgi yawo anjam aqa utru osornjrqasai.

¹² Tamo a powo ti sqas di Qotei na powo olo yimqa a powo koba oqas. Ariya tamo a powo ti sqasai di powo kiňala aqaq di unu qaji di Qotei na olo yaiyimqa a laja sqas.

¹³ Tamo ungasari naŋgi di ɻam atoqnsib ijo anjam aqa damu unosaieqnub. Naŋgi dab atoqnsib ijo anjam aqa utru quosaieqnub. Osib poinjrosaieqnu. Deqa e na naŋgi yawo anjam segi minjreqnum.

¹⁴ Nango kumbra dena anjam bei Qotei aqa medabu o tamo Aisaia nami marej qaji di aqa damu branteqnu. A endegsi marej, ‘Niŋgi dab atoqnqab di ijo anjam aqa utru poiŋwasai. Niŋgi ɻam atoqnqab di ijo anjam aqa damu dego poiŋwasai.

¹⁵ Tamo ungasari di nango are miligi geteŋnjrejunu. Nango dabkala na ijo anjam quqwaŋqa asginjreqnu. Naŋgi ɻam brunjejunub. Deqa nango ɻamdamu na ijo kumbra unqasai. Nango dabkala na ijo anjam quisib utru poinjrqasai. Naŋgi are bulyosib ijoq bqasai dego. Deqa e na naŋgi boletnjqasai.’ Qotei a nami degsi marej.

¹⁶ “O ijo aŋgro, niŋgi nunjo ɻamdamu na ijo kumbra uneqnub. Nunjo dabkala na ijo anjam queqnub. Deqa niŋgi tulaj areboleboleiŋgem.

¹⁷ E bole mernjwai. Nami Qotei aqa medabu o tamo naŋgi ti tamo bole bole naŋgi ti gargekoba kumbra niŋgi bini uneqnub qaji di unqajqa are koba soqnej. Ariya naŋgi unosaioqneb. Anjam niŋgi bini queqnub qaji di dego naŋgi quqwaŋqa

are koba soqnej. Ariya nañgi quosaioqneb.”

Saga yago qa yawo anjam aqa utru Yesus na babtej

18 Osiqa Yesus a olo marej, “Saga yago qa yawo anjam e maronum di aqa utru e na babitqa ningi quiy.

19 Saga yago qudei gam qalaq ainabqa qebari nañgi bosib uyekriteb di aqa utru endegsi unu. Qotei lañ qureq di unu qaji a na aqa segi tamo ungasari nañgi taqatnjsim nañgo Mandor Koba sqas. Anjam di tamo qudei nañgi quisibqa ariya nañgi geregere poinjrosai. Deqa Satan a bosim anjam di olo yainjrqas. Qotei na nañgo are miliq q di anjam di atej ariya Satan a bosim olo yainjrqas.

20 Saga yago qudei mandam lanjaq di aiyeb qaji di aqa utru endegsi unu. Tamo qudei nañgi Qotei aqa anjam quisib tulanq areboleboleinjrimqa anjam di oqujatosib nañgo areq atqab.

21 Ariya anjam di nañgo are miliq tulanq guma aiyosai. Deqa sokiñala Qotei aqa anjam gotranyo qaji tamo qudei na bosib nañgi gulbe enjrsib ugeugeinjrqab. Yimqa nañgo areqalo Yesus qa singilateqnub qaji di nañgi olo ulontqab.

22 Saga yago qudei sil luwit ambleq di aiyeb qaji di aqa utru endegsi unu. Tamo qudei nañgi Qotei aqa anjam quisibqa ariya bunuqna nañgi olo mandam qa ingi ingi qa are koba qaloqnsib ñoro koba oqajqa are prugnjroqnqas. Yimqa kumbra dena nañgi gisanjrsim Qotei aqa anjam nañgo are miliq q di tentim loumqas. Saga yago uge nañgi gei bole atosaieqnub dego kere.

23 Saga yago qudei mol mandam boledamuq di aiyeb qaji di aqa utru endegsi unu. Tamo qudei nañgi Qotei aqa anjam quisib geregere poinjrimqä nañgo are miliqiñ di siñgilatqab. Deqa Qotei aqa anjam di nañgo are miliqiñ di saga bul tulan̄ kobaqas. Qudei 100. Qudei 60. Qudei 30.”

Pilagiñ yago breiyqajqa yawo anjam

24 Osiqa Yesus a olo yawo anjam bei tamo uñgasari nañgi endegsi minjrej, “Qotei lañ qureq di unu qaji a na aqa segi tamo uñgasari nañgi taqatnjsim nañgo Mandor Koba sqas. Kumbra di tamо bei a gilsicha aqa ingi wauq di bem sum yagelenjej degо kere.

25 Bem sum yagelenjonaqa qolo tamо uñgasari nañgi ḥereñesonabqa jeu tamо bei a bosicha bem sum yago ambleq di pilagiñ yago degо breiyej. Breiyosiq ulanej.

26 Ariya bunuqna bem sum oqsib geiteleñjonabqa pilagiñ na degо dauryosiq oqej.

27 Deqa kañgal tamо nañgi na bosib unsibqa wau lanja minjeb, ‘O Tamо Koba, ni bem sum segi yagem. Deqa kiyaqa bem sum oqsib geitonubqa pilagiñ degо dauryosib oqonub?’

28 “Onaqa wau lanja na kamba minjrej, ‘Jeu tamо bei a bosiq pilagiñ yago breiyej.’ Degtis minjrnqa nañgi na kamba minjeb, ‘O Tamо Koba, ni marimqä iga pilagiñ di otoreleñqom.’

29 Onaqa minjrej, ‘Niñgi pilagiñ otoraib. Ningi otorgab di bem sum ti turtosib otoro uge.

30 Deqa niñgi uratib soqneb. Bem sum ti pilagiñ ti koba na oqsib geiteleñqabqa e na ijo wau

tamo qudei naŋgi endegsi minjrqai, “Niŋgi pilagiŋ otorosib ruwoelenjəsib ɻamyuwoq di koituy. Koitosib bem sum olo osib ijo talq di atelenjy.” ”

Sis yago qa yawo anjam

³¹ Osiqa Yesus a olo yawo anjam bei endegsi minjrej, “Qotei laŋ qureq di unu qaji a na aqa segi tamo uŋgasari naŋgi taqatnjsim naŋgo Mandor Koba sqas. Kumbra di tamo bei na sis yago osiq aqa wauq di yagej dego kere.

³² Sis yago naŋgi tulaj kiñilala kas yago bul. Ingi ingi qudei naŋgo yago kokba yala. Sis yago naŋgi tulaj kiñilala. Ariya sis yago di tamo bei na osim aqa wauq di yagimqa bunuqna a oqsim tulaj kobaqujaqas. Osim ɻam qudei buŋnjrsim dani kokba atelerqas. Amqa qebari naŋgi bosib aqa daniq di simi atelenqab.”

Bem tiyeqnu qaji sum aqa yawo anjam

³³ Osiqa Yesus a olo yawo anjam bei endegsi minjrej, “Qotei laŋ qureq di unu qaji a na aqa segi tamo uŋgasari naŋgi taqatnjsim naŋgo Mandor Koba sqas. Kumbra di bem tiyeqnu qaji sum bul. Unja bei a bem tiyeqnu qaji sum kiñala osiqa bem sum laŋaj ti turtosiq web kobaqujaq di bulyonaqa bem kalil tiyekritej.”

Yesus a yawo anjam gargekoba maroqnej

³⁴ Yesus a na tamo uŋgasari naŋgi yawo anjam gargekoba deqaji minjroqnej. A anjam bei minjrosaioqnej. Yawo anjam segi minjroqnej.

³⁵ A kumbra di yej deqa anjam bei Qotei aqa medabu o tamo bei nami marej qaji di aqa damu brantej. A endegsi marej,

“E yawo anjam tamo uŋgasari naŋgi minjroqñqai. Tulaŋ nami yawo anjam di aqa utru uliesoqnej. Sosiq agi bini uliejunu. Deqa e na ubtosiy maroqñqai.”

Pilagin yago breiyqajqa yawo anjam aqa utru

³⁶ Osiqa Yesus na tamo uŋgasari naŋgi uratnijrsiqa tal gogetosiq di sonaqa aqa aŋgro naŋgi aqa areq bosib minjeb, “O Tamo Koba, ni na pilagin qa yawo anjam di aqa utru geregere plaltosim merge.”

³⁷ Onaqa Yesus na minjrej, “Tamo bem sum yagej qaji di agi e segi. E Tamo Aŋgro.

³⁸ Bem sum aqa wau di mandam endi. Bem sum yago di tamo uŋgasari Qotei na taqatnjreqnu qaji naŋgi. Pilagin yago di Satan aqa segi tamo uŋgasari naŋgi.

³⁹ Jeu tamo pilagin yago breiyej qaji di Satan. Bem sum geiteleño bati di diňo bati. Wau tamo bem sum otorelenjeb qaji di laŋ aŋgro naŋgi.

⁴⁰ Deqa ningi quiy. Wau tamo naŋgi bosib pilagin otorosib ɿamyuwoq di koitelenjeb dego kere laŋ aŋgro naŋgi diňo bati qa kumbra degyqab.

⁴¹ Bati deqa e Tamo Aŋgro na ijo laŋ aŋgro naŋgi qarinjritqa aisib ingi uge uge kalil tamo naŋgi uneq breinjreqnub qaji naŋgi ti tamo kalil kumbra uge uge yeqnub qaji naŋgi ti pilagin bul breinjrib ɿamyuwo kobaq aiqab. Deqa Qotei a naŋgo Mandor Koba sqasai. Osim naŋgi taqatnjqasai dego.

⁴² Naŋgi ɿamyuwo kobaq aisib dia akamkobao-qnsib pailoqnsib naŋgo jaqatin qa qalagei anjam atoqñqas.

43 Bati deqa tamo uŋgasari kumbra bole bole yeqnub qaji naŋgo Abu Qotei na naŋgi taqatnjsim naŋgo Mandor Koba sqas. Deqa naŋgi seŋ bul tulaŋ suwaŋesqab. Tamo a dabkala ti sqas di a ijo anjam endi geregere quem.”

Silali ultqajqa yawo anjam

44 Osiqa Yesus a olo marej, “Qotei laŋ qureq di unu qaji a na aqa segi tamo uŋgasari naŋgi taqatnjsim naŋgo Mandor Koba sqas. Kumbra di tamo qudei na silali kobaquja osib ɻam moŋgum miligiq di ateb dego kere. Atsib naňu agu beiq di sub bogsib sub miligiq di ɻam moŋgum uliteb. Onaqa tamo bei na bosiq ɻam moŋgum di itosiq tulaŋ areboleboleiyej. Deqa a ɻam moŋgum di olo subq di mororyosiq gilsiq aqa ingi ingi kalil qariŋyosiq dena silali osiq naňu agu di awaiyej.”

Kolilei qa yawo anjam

45 Osiqa Yesus a olo marej, “Qotei laŋ qureq di unu qaji a na aqa segi tamo uŋgasari naŋgi taqatnjsim naŋgo Mandor Koba sqas. Kumbra di ingi ingi qariŋyo tamo bei a kolilei qa ɻamoqnej dego kere.

46 A gilsiq kolilei tulaŋ boledamu bei itosiq olo puluosi bosiq aqa ingi ingi kalil qariŋyosiq dena silali osiq kolilei di awaiyej.”

Kakaŋ waiyqa yawo anjam

47 Osiqa Yesus a olo marej, “Qotei laŋ qureq di unu qaji a na aqa segi tamo uŋgasari naŋgi taqatnjsim naŋgo Mandor Koba sqas. Kumbra di tamo naŋgi yuwalq di kakaŋ waiyosib qe gargekoba utru segi segi elenjeb dego kere.

48 Kakanq maqonaqa tamo nañgi na titosib bosib ululq di goge atsib awoosib qe bole bole gumbaq di jigeleñeb. Osib qe uge uge uratosib qalaq di breinjreb.

49-50 Kumbra deqaji diño bati qa brantqas. Lañ angro nañgi bosib tamo bole bole nañgi elenqab. Osib tamo uge uge nañgi breinjribqa ñamyuwoq aiqab. Ñamyuwo koba dia nañgi akamkobaoqnsib pailoqnsib nañgo jaqatiq qa qalagei anjam atoqnqas.”

51 Osiqa Yesus na aqa angro nañgi endegsi nenenmjrej, “Yawo anjam kalil mernjgonum qaji endi ningi utru poiñgwo e?” Onaqa nañgi na minjeb, “Od.”

52 Onaqa Yesus na olo minjrej, “Qotei lañ qureq di unu qaji a na aqa segi tamo ungasari nañgi taqatnjsim nañgo Mandor Koba sqas. Anjam di dal anjam qalie tamo qudei nañgi poiñreqnu. Poinjreqnu qaji nañgi tal aqa abu bul sqab. Deqa nañgi nañgo talq dena ñoro bunuj ti ñoro namij ti eleñqnsib oqeç atoqnqab.”

Yesus aqa qure utru nañgi aqa anjam quetosai

53 Yesus a yawo anjam di kalil marsiq koboonaqa a sawa di uratej.

54 Osiqa aqa segi qure utruq gilsiq di sonaqa yori batiej. Deqa a Juda nañgo Qotei tal miligiq gilsiq a tamo ungasari garnekoba sonab tigelosiqa Qotei aqa anjam palontosiq minjroqnej. Minjreqnaqa tamo ungasari nañgi aqa anjam quisibqa tulan prugugetosib maroqneb, “Yesus a powo qabe na osiqa anjam singila deqaji palontosiq mergeqnu? A kiyersiq mañwa deqaji babteleñeqnu?”

⁵⁵ Aqa abu a laña tal gereiyo qaji tamo. A Maria aqa njiri. A Jems na Josep na Saimon na Judas na nānjo was.

⁵⁶ Aqa jaja kalil nañgi agi iga koba na endi unum. Deqa a kiyersiq mañwa deqaji babteleñeqnu?"

⁵⁷ Nañgi degsib yomu anjam marsib Yesus qa ugeeb. Onaqa a na minjrej, "Qotei aqa medabu o qaji tamo bei aqa segi qure utruq gilsim anjam minjroqnqas di nañgi aqa anjam quetqa asgin-jrqas. Deqa a ñam saiqoji sqas. Aqa segi talq di dego a ñam saiqoji sqas. Ariya a qure bei beiq giloqnsim anjam minjroqnqas di nañgi aqa anjam quetoqnsib aqa ñam soqtoqqnqab."

⁵⁸ Yesus na tamo uñgasari nañgi degsi minjrej. Aqa segi qure utruq di a mañwa gargekoba yosai. Di kiyaqa? Nañgi a qa nañgo areqalo siñgilatosai deqa.

14

Herot a are qalej, "Yesus a Jon yansnyro qaji"

¹ Bati deqa tamo uñgasari nañgi Yesus qa saosib laqnabqa Mandor Herot a quej.

² Qusiqa aqa wau tamo nañgi minjrej, "Tamo di a Jon yansnyro qaji. A moisiq olo subq na tigelqo. A deqa siñgila osiqa mañwa babteleñeqnu."

³⁻⁴ Herot a nami aqa was Filip aqa ñauñ Herodias yaiyosiq ej. Deqa Jon na Herot minjoqnej, "Ni ino segi was aqa uña em di kumbra bolesai. Ni kumbra ugeteqnum." Jon na Herot degsi minjoqnej. Deqa Herot a Jon qa minjin qojetonaqa aqa qaja tamo qudei qarinqnraqa gilsib Jon ojsib sil na qosisib tonto talq di waiyeb.

5 Jon a tonto talq di sonaqa Herot a endegsi are qaloqnej, “E Jon qalit moiqas.” Ariya tamo ungasari kalil naŋgi maroqneb, “Jon a Qotei aqa medabu o qaji tamo bole.” Naŋgi degsib maroqneb deqa Herot a naŋgi ulainjrsiq Jon qalqa uratej.

6 Ariya bati bei Herot a Jon qalim moiqajqa gam endegsi itej. Aqa ɻambabo bationaqa a na maruro atsiqa tamo qudei naŋgi metnjrnaq bosib aqa talq di koroeb. Koroosib ingi uyeq nabqa Herot aqa ɻauŋ aqa aŋgro sebiŋ a warum miliqiq bosiqna naŋgi lou tuetnjroqnej. Onaqa Herot a di unsiqa tulanq areboleboleiyej.

7 Deqa a na aŋgro sebiŋ di minjej, “Ni ijo ingi kiyə oqajqa merbqam e ni emqai.” Osiqa aqa anjam di olo singilatosiq minjej, “Ijo anjam di e bole dauryqai. E uratqasai bole sai.”

8 Onaqa aŋgro sebiŋ aqa ai na minjej, “Ni Jon aqa gate qa Herot minje.” Onaqa aŋgro sebiŋ na Herot minjej, “Ni Jon yansnjro qaji aqa gate tabirq di atsim ebe.”

9 Onaqa Herot a Jon qalim moiqajqa are sosai deqa a are tulanq gulbekobaiyej. Ariya aqa segi anjam tamo kalil naŋgo ulatamuq di marsiq singilatej qaji deqa are qalsiqa aŋgro sebiŋ di minjej, “Di kere.”

10 Osiqa aqa qaja tamo bei qarinjonaq gilsiga tonto talq di Jon aqa kakro gentetej.

11 Osiqa aqa gate tabirq di atsiqa osi bosiq aŋgro sebiŋ di yonaqa a na osi gilsiga aqa ai yej.

12 Onaqa bunuqna Jon aqa aŋgro naŋgi deqa quisibqa bosib Jon aqa qusa osi gilsib subq ateb.

Osib Yesus aqa areq gilsib minjeb, “Herot na Jon qalnaq moiyej.”

Yesus a tamo 5,000 nañgi iñgi anainjrej

13 Onaqa Yesus a anjam di qusiqa a sawa di uratosiq qobun̄ bei gogetosiqa wadau sawaq gilej. Aqa angro nañgi ti gileb. A gileqnaqa tamo uñgasari kalil nañgi deqa qusibqa nañgo segi segi qureq na tigelosib sin̄ga na gurgurosib Yesus ñamqajqa gileb.

14 Onaqa Yesus a qobun̄ na gilsiq tiryosiqa ñam atej di tamo uñgasari tulan̄ gargekoba nañgi nami tiryqa sawaq di tariñesonab unjrej. Unjrsiqa a nañgi qa are ugeiyej. Deqa a nañgo areq aisiqa nañgo ma tamo kalil boletnjroqnej.

15 Onaqa señ aisiq bilaqtonaqa Yesus aqa angro nañgi aqa areq bosib minjeb, “O Tamo Koba, endi wadau sawa. Señ aigo. Qoloqas. Deqa ni na tamo uñgasari nañgi minjrimqa qure qureq gilsib di iñgi awaiyosib uyqab.”

16 Onaqa Yesus na minjrej, “Nañgi kiyaqa qure qureq gilqab? Niñgi segi na iñgi anainjriy.”

17 Degsi minjrnaqa nañgi na kamba minjeb, “Iga iñgi sai. Iga bem 5 qe aiyela segi unu.”

18 Onaqa Yesus na minjrej, “Bem ti qe ti di ijoq osib boiy.”

19 Onaqa nañgi bem ti qe ti di osi bosib Yesus yonabqa a na tamo uñgasari kalil nañgi minjrej, “Niñgi kalil ñiñq di awoeleñoiy.” Onaqa nañgi kalil awoonabqa Yesus na bem 5 ti qe aiyel ti di osiqa lan̄ goge tarosiq Qotei pailyej. Pailyo koboonaqa bem ti qe ti giñgenyosiqa aqa angro nañgi enjrn̄aqa nañgi na osi giloqnsibqa tamo uñgasari nañgi jeisib enjreqnab uyoqneb.

20 Uynab kalil menetnjrej. Onaqa iñgi oto urateleñeb qaji di Yesus aqa angro nañgi na koroiyosib gumba kokba 12 di jignab maqelenjej.

21 Tamo kalil bem ti qe ti uyeb qaji nañgi sisiyeb 5,000. Ariya uñgasari ti angro du du ti nañgi sisiyosai.

Yesus a ya banjaq na walwelej

22 Onaqa Yesus na aqa angro nañgi endegsi minjrej, “Ninji qobun gogetosib namoosib gilsib ya agu taqal beiq di tiryosib soqniy. E na tamo uñgasari nañgi minjritqa nañgo qure qureq jaraiy-oqniib e bqai.”

23 Onaqa Yesus aqa angro nañgi namoosib qobun na gileqnabqa Yesus na tamo uñgasari nañgi minjrnraq jaraiyeqnabqa a segi Qotei pailyqa marsiq manaq oqej. Oqsiq a segi mana goge di sonaqa bilaqtej.

24 Onaqa aqa angro nañgi qobun na gileqnabqa ya agu ambleq di jagwa koba tigelosiqa ya korkortosiqa nañgi pulutnjrej.

25 Nobqolo ambru Yesus a aqa angro nañgoq bosiqya ya banjaq na walwelosiqa nañgi daurnjrsiq gilej.

26 Onaqa nañgi ñam ateb di Yesus a ya banjaq na walwelosiq nañgo areq beqnaqa unsib mareb, “Di buga beqnu.” Osib nañgi tulañ ulaugetosib lelenkobaeb.

27 Onaqa Yesus na minjrej, “Nuñgo are siñgilatiy. Endi e beqnum. Ulaaib.”

28 Onaqa Pita na minjej, “O Tamo Koba, ni kiyo beqnum? Ni degam e odbimqa e kamba ya banjaq na walwelosiy ino areq bqai.”

29 Onaqa Yesus na Pita minjej, “Od, endi e. Ni au.” Degsi minjnaqa Pita a qobuň uratosiqa ya banjaq na walwelosi gilsiq Yesus jojomyej.

30 Yesus jojomysiq nam atsiq jagwa unsiq ulaej. Ulaosiq tuqoqnsiq maosiq Yesus minjej, “O Tamo Koba, e tuqeignum. Deqa ni e aqaryaiibe.”

31 Onaqa Yesus na aqa baň waiyosiq Pita ojsiq soqtej. Soqtosiq minjej, “Kiyaqa ni areqalo aiyeltonum? Ni e qa ino areqalo siňgilitqa yonum keresaiimqo.”

32 Degsi minjsiqa naňgi aiyel qobuň gogeton-abqa jagwa laej.

33 Onaqa tamo qobuň di soqneb qaji naňgi Yesus aqa manwa di unsibqa naňgi aqa ñam soqtosib minjeb, “Bole, ni Qotei aqa Niri.”

Tamo ungasari naňgi Yesus aqa gara mutu ojeqnab naňgo ma kobooqnej

34 Yesus aqa aňgro naňgi koba na qobuň na gilsib ya agu taqal beiq di brantosib Genesaret sawaq di tiryeb.

35 Tiryonabqa qure deqaji naňgi na Yesus unsibqa aqa ulatamu poinjrej. Poinjrnaqa anjam qarinjyonab qure qure kalil jojom di soqneb naňgi quoqnsib naňgo ma tamo naňgi joqoqnsib Yesus aqa areq osi beleñoqneb.

36 Beleñoqnsib Yesus endegsib minjoqneb, “Naňgi ino gara mutu segi ojibqa naňgo ma kobooqnqas.” Onaqa Yesus na odnjrnaqa tamo ungasari kalil ma ti soqneb qaji naňgi aqa gara mutu ojoqneb. Ojoqneb qaji kalil naňgo ma kobooqnej.

15

Yesus a Qotei aqa dal anjam ti moma nañgo kumbra qa ti marej

¹ Onaqa bati deqa Farisi nañgi ti dal anjam qalie tamo qudei ti nañgi Jerusalem dena bosibqa Yesus aqa areq di koroeb. Koroosib minjeb,

² “Ino añgro nañgi kiyaqa gago moma nañgo kumbra gotranyeqnub? Agi nañgi ingi uyqa oqnsib mati bañ yansosaisosib laña uyeqnub.”

³ Onaqa Yesus na kamba minjrej, “Ninji kiyaqa Qotei aqa dal anjam gotranyeqnsibqa olo nuñgo segi moma nañgo kumbra dauryeqnub?

⁴ Qotei a nami marej, ‘Ni ino ai abu nañgo sorgomq di geregere sosimqa nañgo anjam dauryoqne. Tamo bei na aqa ai abu nañgi misiliñnjrimqa a qalib moiym.’ Qotei a nami degsi marej.

⁵ Ariya ninji mareqnub, ‘Tamo bei aqa ai kiyo aqa abu kiyo ingi qa truquamqa a na minjgas, “Ijo ingi ingi ejunum endi e ni emqa kere. Eo. E ni emqasai. E nami Qotei atraiyqa giltem deqa e ni aqaryaimqasai.”’

⁶ A degsi minjgas di ninji marqab, ‘A keretqo. A na aqa ai abu nañgi aqaryainjraiq.’ Ninji degsib marqab. Nuñgo kumbra dena ninji Qotei aqa anjam gotranyeqnsibqa olo nuñgo segi moma nañgo kumbra dauryeqnub.

⁷ “Ninji gisañ tamo. Ninji anjam maro aiyelteqnub. Qotei aqa medabu o qaji tamo Aisaia a kere ninji qa anjam endegsi marej,

⁸ ‘Tamo nañgi di nañgo medabu na ijo ñam soqteqnub. Ariya nañgo are miligi e qa sosai. Isaq di únu.

9 Nañgi laña babañ na e qa loueqnub. Osib mandam tamo nañgo dal anjam palontoqnsib olo beltoqnsib mareqnub, “Anjam endi Qotei aqa anjam.” ’ ”

Ingi kiye na tamo a jiga yeqnu?

10 Yesus a Farisi nañgi anjam degsi minjrsiqa olo tamo uñgasari kalil nañgi metnjrnaqa aqa areq bonabqa minjrej, “Niñgi ijo anjam endi geregere quisib poinjgem.

11 Tamo bei a ingi uyimqa aqa miliq aqas dena tamo jiga yqasai. Ingi uge uge tamo aqa medabuq na branteqnu qaji dena tamo jiga yeqnu.”

12 Yesus na tamo uñgasari nañgi anjam degsi minjrsiq koboonaqa aqa angro nañgi aqa areq bosib minjeb, “Farisi nañgi ino anjam di quisib ni qa are ugeinjrqo. Di ni qalie e?”

13 Onaqa Yesus na minjrej, “Ijo Abu lañ qureq di unu qaji a ingi yagobuleqnu. Ingi kalil a yagosai qaji di a na jirim qoji otorosim taqal breinjrqas.

14 Deqa niñgi Farisi nañgi uratnjrib soqneb. Nañgi tamo ñam qandimo bul unub deqa nañgi na tamo bei gam osoryqa keresai. Niñgi qalie, tamo ñam qandimo bei na tamo ñam qandimo bei aqa banj ojsim ombla walwelqab di ombla mañgalsib subq aiqab. Farisi nañgi tamo deqaji bul.”

15 Onaqa Pita na Yesus minjej, “O Tamò Koba, ingi jiga qa yawo anjam ni maronum di aqa utru geregere plaltosim mergim iga quqwom.”

16 Onaqa Yesus na kamba aqa angro nañgi endegsi minjrej, “Niñgi dego ijo yawo anjam di aqa utru poingosai e?”

17 Tamo naŋgi iŋgi uyeqnabqa aisiq meneq di unu. Meneq dena bi talq di waiyeqnub. Niŋgi di pojngosai kiyo?

18 Iŋgi uge uge tamo aqa are miliq na oqoqnsiq medabuq na branteqnu qaji dena tamo jiga yeqnu.

19 Iŋgi uge uge di agi ubtosiy merŋgwai. Areqalo uge uge, tamo qaloqa, uŋa qa laoqa, was aqa ḥauŋ anjamyoqa, bajinjoqa, was aqa jejamu laŋa gisanjyoqa, was yomuiyoqa.

20 Kumbra uge uge dena tamo jiga yeqnu. Tamo a ban yansosaisosim laŋa iŋgi uyqas dena a jiga yqasai.”

Kenan qaji uŋa a Yesus qa aqa areqalo siŋgilatej

21 Onaqa Yesus a dena tigelosiqa walwelosiq Tair qure ti Saidon qure ti naŋgo sawaq gilej.

22 Gilsiq di sonaqa Kenan qaji uŋa bei a sawa dena brantosiqa Yesus aqa areq bosiq a singila na pailyosiq minjej, “O Tam Koba, Devit aqa Niri, ni e qa are ugeimeme. Mondor uge na ijo aŋgro sebiŋ a tulaŋ ugeugeiyoqnsiq jaqatin koba yeqnu.”

23 Onaqa Yesus a uŋa di aqa anjam quisiq quosaibulosiq anjam bei kamba minjosai. A mequmej. Deqa Yesus aqa aŋgro naŋgi aqa areq bosib minjeb, “O Tam Koba, uŋa di a singila na iga pailgoqnsiq daurgeqnu. Deqa ni na saidyimqa a puluosim ulaŋqas.”

24 Onaqa Yesus na minjrej, “Israel naŋgi sougete-junub. Naŋgi kaja bul mandor saiqoji. Qotei na e qarinbonaq naŋgo segiq bem.”

25 Onaqa uña di a Yesus aqa areq di siŋga pulutosiqa pailyosiq minjej, “O Tamo Koba, ni e aqaryaibe.”

26 Onaqa Yesus na kamba minjej, “Iga aŋgro du du nango iŋgi yainjrsim olo bauŋ naŋgi anainjrqom di kumbra bolesai.”

27 Onaqa uña dena olo Yesus minjej, “O Tamo Koba, ni kere maronum. Ariya e kamba anjam bei mermiit ni que. Aŋgro du du naŋgi iŋgi uyeq nabqa iŋgi ſeŋgi ululoneqnaqa bauŋ naŋgi dego uyeq nub.”

28 Onaqa Yesus a anjam di quisiga minjej, “O uña, ni e qa ino areqalo tulaŋ ſiŋgilatonum. Osim agi ni na anjam degsi merbonum. Deqa ni gilime. Ino anjam di e na dauryosiy ino aŋgro boletqai.” Degsi minjnaqa batı qujai deqa mondor uge na aqa aŋgro di uratonaqa a boleej.

Yesus a tamo ungasari gargekoba naŋgi boletnijro-qnej

29 Onaqa Yesus a sawa di uratosiqa walwelosiq Galili ya aguq di brantej. Brantosiq dena manaq oqsiq dia awesoqnej.

30 Awesonaqa tamo ungasari tulaŋ gargekoba naŋgi na tamo siŋga qandamnjro qaji ti tamo ɻam qandimnjro qaji ti tamo jejamu lainjro qaji ti tamo meŋ ſiŋgilaŋjro qaji ti tamo ma utru segi segi so qaji naŋgi ti joqsib boqnsib Yesus aqa areq di atoqneb. Ateqnabqa a na naŋgi kalil boletnijroqnej.

31 Deqa tamo meŋ ſiŋgilaŋjro qaji naŋgi olo anjam bole maroqneb. Tamo jejamu lainjro qaji naŋgo jejamu olo ſiŋgilaqnej. Tamo siŋga qandamnjro qaji naŋgi olo tigelosib walweloqneb.

Tamo ɳam qandimnjro qaji naŋgi olo ɳam poinjre-qnaqa sawa unoqneb. Deqa tamo uŋgasari kalil naŋgi Yesus aqa maŋwa di unoqnsib tulaj prugo-qnsib Israel naŋgo Qotei aqa ñam soqtoqneb.

Yesus a tamo 4,000 naŋgi iŋgi anainjrej

³² Onaqa Yesus na aqa aŋgro naŋgi olo metnjr-naqa aqa areq bonabqa minjrej, “Tamo uŋgasari naŋgi bati qalub e koba na soqneb naŋgi iŋgi saiqoji. Deqa e naŋgi qa are ugeibqo. E naŋgi mam ti suweinjritqa gamq di naŋgi mam na lao uge.”

³³ Degsi minjrnaqa naŋgi na kamba minjeb, “Sawa endi wadau. Deqa iga iŋgi qabe na osimqa tamo uŋgasari gargekoba endi anainjronam kereqas?”

³⁴ Onaqa Yesus na minjrej, “Niŋgi bem gembub unu?” Onaqa minjeb, “Bem 7 unu. Qe kiñilala quja quja dego unu.”

³⁵ Onaqa Yesus na tamo uŋgasari naŋgi minjrej, “Niŋgi kalil mandamq di awoelenjoiy.”

³⁶ Degsi minjrnaqa naŋgi kalil mandamq di awoonabqa Yesus na bem 7 ti qe ti di osiqa Qotei pailyej. Pailyosiqa bem ti qe ti giŋgenyosiqa aqa aŋgro naŋgi enjreqnaqa naŋgi na osi giloqnsibqa tamo uŋgasari naŋgi anainjreqnab uyoqneb.

³⁷ Uynab kalil menetnjrej. Onaqa iŋgi oto uratelenejeb qaji di Yesus aqa aŋgro naŋgi na koroiyosib gumba kokba 7 di jignab maqelenej.

³⁸ Tamo kalil iŋgi uyeb qaji naŋgi sisiyeb 4,000. Ariya uŋgasari ti aŋgro du du ti naŋgi sisiyosai.

³⁹ Onaqa Yesus na tamo uŋgasari kalil naŋgi suweinjrnaqa naŋgo qure qureq gileqnabqa a qobuŋ gogetosiqa Magadan sawaq gilej.

16

Farisi naŋgi Qotei aqa maŋwa bei unqajqa mareb

¹ Onaqa Farisi ti Sadyusi ti naŋgi Yesus aqa areq bosibqa a anjam bei grotimqa quisib a ojqa-jqa deqa gisanjyosib minjeb, “Ni endego Qotei aqa maŋwa bei babtim iga unqom.”

² Onaqa Yesus na kamba minjrej, “Bilaqteqnaqa niŋgi marelqub, ‘Seŋ lentqo. Laŋbi usriŋqo. Deqa sawa boleqas.’

³ Nebeeqnaqa niŋgi marelqub, ‘Laŋbi tuluqo. Seŋ lentqo. Deqa jagwa awa ti bqas.’ Od, niŋgi laŋ unoqnsib geregere pegiyeqnub. Ariya Qotei aqa maŋwa bini branteqnu qaji di niŋgi kiyaqa utru poiŋgosaeqnu?

⁴ Tamo uŋgasari bini bati endeqa unub qaji naŋgo kumbra tulaŋ ugedamu. Naŋgi Qotei areiyosaieqnub. Naŋgi gaigai Qotei aqa maŋwa laŋa unqajqa metbeqnub. Deqa e na Qotei aqa maŋwa bei naŋgi osornjrqasai. Jona aqa maŋwa segi osornjritqa naŋgi unqab.” Yesus na Farisi ti Sadyusi ti naŋgi degsi minjrsiqa uratnjrsiqli gilej.

Bem tiyeqnu qaji sum qa yawo anjam

⁵ Osiqa Yesus na aqa aŋgro naŋgi joqsiqa koba na olo qobuŋ gogetosibqa ya agu taqal beiq di branteb. Bati deqa aqa aŋgro naŋgi bem oqajqa are walnrej.

⁶ Onaqa Yesus a naŋgi endegsi minjrej, “Ninji geregere ɣam atsib soqniy. Bem tiyeqnu qaji sum Farisi naŋgo bem ti bulyimqa bem dena tiyekritosim tulaŋ kobaqujaqas. Sadyusi naŋgo bem dego tiyekritosim tulaŋ kobaqujaqas.”

7 Onaqa Yesus aqa angro naŋgi aqa yawo anjam di quisibqa segi segi maroqneb, “Iga bem osai deqa kiyo mergwo?”

8 Onaqa Yesus a naŋgo anjam di qalieosiqa minjrej, “Nunjo areqalo e qa singilatqa yonub tulan̄ keresaiiŋgwo. Niŋgi kiyaqa bem osai deqa mareqnub?

9 Niŋgi e qa poiŋgosai unu kiyo? E nami bem 5 giŋgenyosimqa tamo 5,000 anainjronam uynab menetnırnaqa niŋgi iŋgi oto koroiyosib gumba kokba 12 di jignab maqelenej. Niŋgi deqa are walŋgwo kiyo?

10 E bati bei bem 7 dego giŋgenyosimqa tamo 4,000 anainjronam uynab menetnırnaqa niŋgi iŋgi oto koroiyosib gumba kokba 7 di jignab maqelenej. Niŋgi deqa are walŋgwo kiyo?

11 O ijo angro, e niŋgi bem tiyeqnu qaji sum qa merŋgonum di e niŋgi yawo anjam merŋgonum. E niŋgi bem bole qa merŋgosai. Niŋgi kiyaqa deqa poiŋgosai? Niŋgi quiy. Bem tiyeqnu qaji sum Farisi ti Sadyusi ti naŋgo bem ti bulyimqa bem dena tiyekritosim tulan̄ kobaqujaqas. Niŋgi deqa geregere ɣam atsib soqniy.”

12 Yesus na aqa angro naŋgi degsi minjrnaqa naŋgi quisib poinjrej, “Bole, Yesus a bem bole tiyosim kobaqujaqas deqa iga mergosai. Farisi ti Sadyusi ti naŋgo gisan̄ anjam bem bul tulan̄ kobaqas deqa iga mergwo.”

Pita a Yesus qa poiyonaqa aqa ɣam ubtej

13 Onaqa bati bei Yesus na aqa angro naŋgi olo joqsiqa koba na walwelosib Sisaria Filipai qure naŋgo sawaq di branteb. Brantosib Yesus na aqa

aŋgro naŋgi endegsi nenemnjrej, “Tamo uŋgasari naŋgi e Tamo Aŋgro e qa kiyersib mareqnub?”

14 Onaqa naŋgi na minjeb, “Tamo qudei naŋgi mareqnub, ni Jon yansnjro qaji. Qudei naŋgi mareqnub, ni Elaija. Qudei naŋgi mareqnub, ni Jeremaia kiyo Qotei aqa medabu o tamo naŋgi nami soqneb deqaji bei kiyo?”

15 Onaqa Yesus a naŋgi olo nenemnjrej, “Ninji segi e qa kiyersib mareqnub?”

16 Onaqa Saimon Pita na minjej, “Ni Kristus. Ni Qotei ɣambile gaigai unu qaji aqa Niri.”

17 Pita a kamba Yesus degsi minjnaqa a na minjej, “O Saimon, Jona aqa ɣiri, ni tuləŋ areboleboleimeme. Di kiyaqa? Ino anjam merbonum di mandam tamo bei na babbosiq mermosai. Ijo Abu laŋ qureq di unu qaji a segi na anjam di babbosiq mermqo.

18 Deqa e ni endegsi mermqai. Ni Pita. Ni meniŋ bul. Meniŋ quraq di e na ijo segi tamo uŋgasari kalil naŋgi koroinjrqai. Koroinjritqa Moiyo Qure aqa singila na naŋgi ugetnjqra keresai.

19 O Pita, ni que. Qotei a laŋ qureq di Mandor Koba unu deqa e ni singila emqai. Emitqa ni mandamq endi gam getentqam di Qotei a dego laŋ qureq di gam getentqas. Ni mandamq endi gam waqtqam di Qotei a dego laŋ qureq di gam waqtqas.”

20 Yesus na Pita degsi minjsiqa olo aqa aŋgro naŋgi endegsi minjrej, “E Kristus. Niŋgi ijo ñam di ubtosib tamo qudei minjraib.”

Yesus a marej, “E moisiy olo subq na tigelqai”

21 Bati deqa Yesus na aqa angro nangi endegsi minjrej, “E Jerusalem aiyeqnum. Dia Juda gate naŋgi ti atra tamo kokba ti dal anjam qalie tamo naŋgi ti e jaqatinj koba ebsib lubsib moiybqab. Bati qalub koboamqa e olo subq na tigelqai.” Yesus a anjam di ubtosiq minjrej.

22 Onaqa Pita a anjam di quasiqa Yesus osiqa qalaq gilsiga ɻirintosiq minjej, “O Tamo Koba, kumbra di inoq di degsi brantqa maraim.”

23 Onaqa Yesus a bulosiqa Pita koqyosiqa ɻirintosiq minjej, “Ni Satan bul. Deqa ni ijo qoreq gile. Ni e uneq waibaim. Ni Qotei aqa areqalo dauryosai. Ni mandam tamo naŋgo areqalo dauryonum. Dauryosim agi ni na anjam di merbonum.”

24 Osiqa Yesus na aqa angro kalil naŋgi endegsi minjrej, “Tamo bei na e daurbqa osimqa a aqa segi areqalo kalil uratekritosim aqa segi ɻamburbas qoboyosim e daurbem.

25 Tamo bei na aqa segi ɻambile taqatqajqa arearetqas di a padalqas. Ariya tamo bei a e qa are qalsimqa aqa segi ɻambile uratqas di a olo ɻambile bole oqas.

26 Tamo bei a mandam qa ñoro kalil koroyosim ariya mondonj aqa segi qununj padalqas di ñoro dena a kiyersim aqaryaiyqas? Di keresai. Aqa qununj padalqas di a awai kiye atsim dena aqa qununj olo aqaryaiyosim a ɻambile sqas? Di keresai.

27 E Tamo Angrø. Mondonj e ijo Abu aqa rian na ti aqa laŋ angro naŋgo rian na ti bqai. Bosiy tamo uŋgasari kalil naŋgo kumbra qa peginjrsiy awai keretosi enjrqai.

28 E bole merjgħwai. Tamo qudei ijo areq endi tigelejunub qaji nañgi morenja soqnejha e Tamo Añgro bqai. Bosiy nañgi taqatnjsiy nañgo Mandor Koba soqnit nañgi e nubqab.”

17

Yesus aqa jejamu bulyonaq aqa añgro qalub nañgi unobeiteb

1 Osiqa bati 6 onaqha Yesus a tigelosiqha Pita na Jems na aqa was Jon na nañgi segi qalub joqsiqa koba na mana goġe kobaq oqsib di soqneb.

2 Sosibqqa Yesus aqa jejamu bulyonaq nañgi unobeiteb. Aqa ulatamu sej̄ bul tulañ suwañoqnej. Aqa gara dego tulañ pulonjosiq qatekritej.

3-4 Onaqha Moses Elaija wo nañgi brantosib Yesus koba na anjam maroqneb. Mareqnabqqa Yesus aqa añgro nañgi na nañgi aiyel unjrsibqqa Pita a Yesus minnej, “O Tamo Koba, Moses Elaija wo nañgi bosib iga koba na endi unum di bolequja. Deqa ni na e odbimqqa e tal kiñnilala qalub gereiyqai. Bei ino. Bei Moses aqa. Bei Elaija aqa.”

5 Pita a degsi mareqnaqa lañbi tulañ suwañosiq aisiqa nañgi kabutnjrej. Onaqha lañbi miligiq dena anjam bei endegsi brantonaq nañgi queb, “Endi ijo Añgro qujai e na tulañ qalaqlaiyeqnum qaji. E a qa areboleboleibeqnu. Deqa niñgi aqa anjam quetoqniy.”

6 Onaqha Yesus aqa añgro nañgi anjam di quisibqqa tulañ ulaugeteb. Osib sinġa pulutosib mandamq di ħam quosib ħerenejeb.

⁷ Onaqa Yesus a nañgo areq gilsiq a nañgo gateq di aqa banj atsiqa minjrej, “Ninji tigeliy. Ninji ulaaib.”

⁸ Degsi minjrnaqa nañgi tigelosib ñam ateb di Yesus a segi nañgi koba na sonab uneb. Nañgi tamo bei unosai.

⁹ Nañgi Yesus ombla manaq dena olo aiyoqn-sibqa Yesus a siñgila na minjrej, “Mañwa ninji mana goge di unonub qaji di ubtosib tamo qudei minjraib. Bunuqna e Tamo Añgro moisiy olo subq na tigelotqa batı deqa ninji na ubtosib minjroqn-qab.”

¹⁰ Onaqa nañgi Yesus aqa anjam di quisib kamba minjeb, “Dal anjam qalie tamo nañgi mareqnub, ‘Elaija a namo bamqa Kristus a bunuqna bqas.’ Anjam di kiyaqa degsib mareqnub?”

¹¹ Onaqa Yesus na minjrej, “Nañgo anjam di bole. Elaija a namo bosim tamo uñgasari kalil nañgo areqalo gereiyetnjsim soqnimqa bunuqna Kristus a bqas.

¹² Ariya e ninji endegsi mern̄gwai. Elaija agi bej. Bonaqa tamo nañgi a qa poinjrosai. Deqa gulbe kalil nañgi a yqajqa are soqnej qaji agi yeb. E Tamo Añgro dego degsib jaqatinj ebqab.”

¹³ Onaqa nañgi Yesus aqa anjam di quisib endegsi poinjrej, “Bole, Yesus a Elaija qa bole marosai. A Jon yansnjro qaji qa marqa osiqa Elaija aqa ñam na yawo anjam marqo.”

Yesus a añgro mel aqa jejamuq na mondor uge wiyetej

¹⁴ Onaqa Yesus na aqa añgro qalub nañgi di joqsiqa koba na aisib tamo uñgasari tulañ gargekoba

mana utruq di tariñesonab itnjreb. Onaqa tamo bei a bosiqä Yesus aqa areq di siñga pulutosiqä minjej,

15 “O Tamo Koba, ni ijo añgro mel qa are ugeim-imqa aqaryaiye. A bati gaigai nanarioqnsiqä dena aqa jejamu tulan̄ ugeeqnu. Bati gargekoba a uloñqoqnsiqä ñamyuwoq o yaq aiyeqnu.

16 Deqa e a osim ino añgro nañgoq osi bonumqa nañgi na boletqa yonub keresaiinjrqo.”

17 Onaqa Yesus a anjam di quisiqä endegsi marej, “Niñgi tamo uñgasari bini bati endeqa unub qaji nunþgo areqalo e qa siñgilatosai bole sai. Nunþgo kumbra tulan̄ uge. Bati gembub e niñgi koba na sosiyqa nunþgo gulbe di qoboiyoqnqai? Añgro mel di ijo areq osib boiy.”

18 Onaqa osi bonabqa Yesus na mondor uge di ñirinjtosiq minjej, “Ni añgro di uratosim ulan̄.” Degsi minjnaqa mondor uge na añgro di uratosiq ulanjej. Ulanjonaqa bati qujai deqa añgro a boleej.

19 Onaqa Yesus aqa añgro nañgi aqa areq lumu bosib nenemyeb, “Iga kiyaqa mondor uge di wiyyqa yonum keresaiigwo?”

20 Onaqa Yesus na minjrej, “Utru agiende. Niñgi e qa nunþgo areqalo siñgilatqa yonub niñgi tulan̄ truquonub. E bole merñgwai. Nunþgo areqalo e qa siñgilato qaji di sis yago bul kiñala sqas di kereqas. Degesqas di niñgi mana kobaquja endi minjibqa a nunþgo anjam dauryosim tigelosim sawa beiq gilqas. Nunþgo areqalo e qa siñgilato qaji degesqas di niñgi kumbra kalil yqa kereinjwas.

21 Deqa niñgi mondor uge deqají winjrqá osibqa niñgi mati ingi uratosib qurienjosib Qotei paily-

oqniy. Dena qujai niŋgi na mondor uge winjrib jaraiqab.”

Yesus a marej, “E moisiy olo subq na tigelqai”

²² Onaqa Yesus na aqa aŋgro naŋgi olo joqsiqa koba na sawa di uratosib Galili sawaq gilsib dia sosibqa Yesus na minjrej, “E Tamo Aŋgro. Jeu tamo naŋgi na e ojsib tamo qudei naŋgo baŋq di e atqab.

²³ Atib lubib moiqai. Bati qalub koboamqa e olo subq na tigelqai.” Onaqa Yesus aqa aŋgro naŋgi anjam di quisib utru poinjrosai. Deqa naŋgi are tulaŋ gulbekobainjrej.

Yesus a atra tal takis waiyej

²⁴ Onaqa bati bei Yesus aqa aŋgro naŋgi koba na walwelosib Kaperneam qureq gileb. Gilsib di sonabqa atra tal takis o tamo naŋgi Pita aqa areq bosib nenemyeb, “Nuŋgo Qalie Tamo a atra tal takis oqnsiq ateqnu e?”

²⁵ Onaqa Pita na minjrej, “Od, a ateqnu.”

Osiqa Pita a tal gogetosiqa takis o tamo naŋgo anjam di Yesus minjqa laqnaqa Yesus a nami qalieosiq deqa minjoqujatej, “O Saimon, ni kiyersi are qalonum? Mandam endeqaji mandor naŋgi yai naŋgoq dena takis eqnub? Naŋgo segi aŋgro naŋgoq dena eqnub kiyo tamo lanaj naŋgoq dena eqnub kiyo?”

²⁶ Onaqa Pita na kamba minjej, “Tamo lanaj naŋgoq dena eqnub. Naŋgo segi aŋgro naŋgoq dena osaieqnub.” Onaqa Yesus na minjej, “Ni kere maronum. E Qotei aqa Aŋgro unum deqa e atra tal takis atqa uratqai di kere.

²⁷ Uŋgum. Iga takis o tamo naŋgo are ugetet-njrqasai. Deqa ni alile aisim yima waiyosim qe

namoqna oqam qaji di aqa medabu waqtosimqa aqa medabu miliqiñ di silali bei soqnim unqam. Unsim silali di osi gilsim gago aiyel qa takis atqa osimqa takis o tamo nañgi enjre.”

18

Niñgi añgro kiñilala bul soqniye

¹ Bati deqa Yesus aqa añgro nañgi aqa areq bosib minjeb, “O Tamo Koba, Qotei lañ qureq di unu qaji a na iga taqatgosim gago Mandor Koba soqnim bati deqa ino añgro yai a iga kalil buñgosim ñam ti sqas?”

² Onaqa Yesus na añgro kiñala bei metonaq aqa areq bonaqa nañgo ambleq di tigeltoсиqa osorn-jrej.

³ Osornjrsiqa minjrej, “E bole merngwai. Niñgi are bulyosib añgro kiñala endeqaji bulqasai di Qotei lañ qureq di unu qaji a na niñgi taqatngwasai. Osim a nuñgo Mandor Koba sqasai dego.

⁴ Tamo bei na aqa segi ñam aguq atsim añgro kiñala endeqaji bulqas di Qotei na tamo di aqa ñam olo soqtetimqa a tamo kalil nañgi buñjrsim a ñam ti sqas. Deqa Qotei na a taqatosim aqa Mandor Koba sqas.

⁵ “Tamo bei a e qa are qalsimqa añgro kiñala endeqaji bei osim geregereiyqas di a e dego osim geregereibqas.”

Niñgi une torei uratiy

⁶ Osiqa Yesus a olo marej, “Tamo bei na añgro kiñala endeqaji bei e qa aqa areqalo singilateqnu qaji di osim uneq waiyqas di a kumbra tulan ugedamu yqo. Iga tamo di ojsim meniñ kobaqua

osim sil na aqa kakroq di tontosim waiyim ya robuq aisim moiqas di kere.

⁷ “Bunuqna tamo qudei naŋgi tamo qudei uneq breinjroqnqab. Bole, kumbra di brantoqnqas. Ariya tamo naŋgi kumbra di yoqnqab qaji naŋgi tulan padaloquetqab.

⁸ Ino banj na kiyo ino siŋga na kiyo ni titmosim uneq waimqa laqnimqa di gentosim waiy. Ni degye. Di kiyaqa? Ni banj geno kiyo siŋga geno kiyo sosimqa une bei yqasai di kere. Di ni ɻambile gaigai sqam. Ariya ni banj aiyel ti kiyo siŋga aiyel ti kiyo sosimqa une yqam di keresai. Di Qotei na ni ɻamyuwoq waimqas. Namyuwo di gaigai yuoqnsim sqas.

⁹ Ino ɻamdamu na ni titmosim uneq waimqa laqnimqa ɻamdamu di otorosim waiy. Ni degye. Di kiyaqa? Ni ɻamdamu qujai ti sosimqa une bei yqasai di kere. Di ni ɻambile gaigai sqam. Ariya ni ɻamdamu aiyel ti sosimqa une yqam di keresai. Di Qotei na ni ɻamyuwoq waimqas.

¹⁰ “Deqa niŋgi aŋgro kiñilala endeqaji naŋgi qa ugeaib. E mernŋwai. Naŋgo laŋ aŋgro naŋgi na ijo Abu laŋ qureq di unu qaji aqa ulatamu gaigai koqyeqnub.

¹¹ E segi Tamo Aŋgro. E na tamo uŋgasari padalo gamq di unub qaji naŋgi eleŋeqnum. E deqa mandamq aiyem.

Kaja du alelqo qaji aqa yawo anjam

¹² “Niŋgi kiyersib are qalonub? Tamo bei aqa kaja 100 naŋgi manaq di soqnibqa qujai bei alelamqa a kiyerqas? E mernŋwai. A na kaja 99 naŋgi

uratnjsim qujai alelqo qaji di ɻamosim gilsim itqas.

¹³ E bole merŋwai. A na kaja qujai di itosim tuləŋ areboleboleiyqas. A kaja du du 99 alelosai qaji naŋgi qa tuləŋ areboleboleiyqasai. Qujai alelqo qaji a qa tuləŋ areboleboleiyqas.

¹⁴ Dego kere nunŋo Abu laŋ qureq di unu qaji a aŋgro kiňala endeqaji bei padalqajqa a deqa are sosai.”

Niŋgi nunŋo was aqa une olo gereiyetyi

¹⁵ Osiqa Yesus a olo marej, “Ino Kristen was bei na ni une bei emimqa ningi segi aiyel ombla awoosib aqa une ni emqo qaji di ubtosim minje. Minjimqa a ino anjam qusim are bulyqas di ni na ino was olo onum.

¹⁶ Ariya a ino anjam quetmosaiamqa ni na Kristen tamo qujai kiyo aiyel kiyo joqsimqa naŋgi ni taqmosib ino was aqa une di olo ubtosib minjqab.

¹⁷ Ariya a naŋgo anjam dego quetnjrosaiamqa ni na Kristen tamo uŋgasari kalil naŋgi metnjrim koroosib ni taqmosib ino was aqa une di olo ubtosib minjqab. Ariya a naŋgo anjam dego quetnjrosaiamqa ni na a qoreiye. Ni na une tamo ti takis o qaji tamo ti naŋgi qoreinjreqnum dego kere ni na ino was di qoreiye.

¹⁸ “E bole merŋwai. Niŋgi mandamq endi gam getentqab di Qotei a dego laŋ qureq di gam getentqas. Niŋgi mandamq endi gam waqtqab di Qotei a dego laŋ qureq di gam waqtqas.

¹⁹ “E olo merŋwai. Mandamq endi ijo aŋgro aiyel naŋgi iŋgi bei oqa marsibqa areqalo qu-

jaitosib ijo Abu laŋ qureq di unu qaji a pailyqab di a na inŋi di enjrqas.

20 Tamo aiyel kiyo qalub kiyo ijo ñam qa are qalsib koroqab di e naŋgo ambleq di sqai.”

Gago Kristen was aqa une kobotqajqa yawo an-jam

21 Onaqa bati deqa Pita a Yesus aqa areq bosiq nenemyej, “O Tamo Koba, ijo Kristen was bei na e une gembub ebimqa e aqa une di moiyyotqai? E endegyqai kiyo? A na une 7 ebimqa aqa une di moiyyotqai. Ariya a olo une bei ebimqa e moiyyotqasai. Degyqai kiyo?”

22 Onaqa Yesus na kamba minjej, “Ino was bei na ni une 7 emimqa aqa une di segi moiyyotqam di keresai. A na une gargekoba emoqnsim soqnim ni aqa une kalil di dego moiyyotoqne. A ni une 7 emoqnim une di moiyyotoqne. Olo une 7 emoqnim moiyyotoqne. Deggim giloqnem.

23 “Niŋgi quiy. Qotei laŋ qureq di unu qaji a na aqa segi tamo uŋgasari naŋgi taqatnjsim naŋgo Mandor Koba sqas. Kumbra di mandor bei aqa kumbra sigitejunu. Mandor dena aqa kaŋgal tamo qudei nami silali yaiyeb qaji di kamba olo yqajqa minjrej.

24 Aqa kaŋgal tamo bei 10 milion kina yaiyej qaji di osib aqa ulatamuq di tigelteb.

25 Tigeltonabqa a na silali di kamba olo yqajqa keresaiiyej. Deqa mandor a na minjej, ‘Ni silali di kamba olo e ebqa keresaiimqo deqa e ni ino ɻauŋ wo ino angro naŋgi ti osiy tamo bei aqa banq di uratŋgitqa tamo dena silali ebimqa ningi a laŋa wauetoqnqab. Ino inŋi inŋi kalil dego e

ni yaimosiy tamo qudei naŋgi enjritqa naŋgi na kamba silali ebqab. Gam dena ni silali nami yaibem qaji di kobotqam.’

26 Degsi minjnaq qusiq aqa areq di siŋga pulutosiqa pailyosiq minjej, ‘O Tamo Koba, ni e kumbra degbaim. Ni e qa dulosim mati e qa tarinjoqnime. E silali nami yaimem qaji di kalil itosiy e kamba emekritqai.’

27 Onaqa mandor a kanŋal tamo deqa dulosiqa silali kalil nami yaiyej qaji di laŋa kobotej. Osiqa a uratonaq gilej.

28 “Gilsiga kanŋal tamo bei ombla wauo qaji a itosiqa ojsiq kakro apiyetosiq minjej, ‘Ni nami 10 kina yaibem qaji di kamba olo ebe.’

29 “Degsi minjnaq qusiq aqa areq di siŋga pulutosiqa pailyosiq minjej, ‘Ni e qa dulosim mati e qa tarinjoqnime. E 10 kina nami yaimem qaji di itosiy e kamba emekritqai.’

30 Degsi minjnaqa a aqa anjam di quetqa asgiyonaqa a osi gilsiga tonto talq di waiyosiq minjej, ‘Ni tonto talq endi soqne. Bunuqna ni 10 kina nami yaibem qaji di kamba ebekritimqa e ni olo uratmit oqedqam.’

31 “A degyonaqa kanŋal tamo qudei a koba na wauo qaji naŋgi unsibqa are ugeinjrnaqa aisib naŋgo mandor a deqa saiyyosib minjeb.

32 Minjnab qusiqa kanŋal tamo di metonaq bonaqa minjej, ‘Ni kanŋal tamo uge. Ni e pailbonumqa silali ni nami yaibem qaji di e na kobotonum.

33 E ni qa dulosim silali di kobotonum. Ariya kiyaqa ni olo gilsim kanŋal tamo bei ni ombla

wauo qaji a qa dulosai? Osim silali a na nami yaimej qaji di ni kobotosai?’

³⁴ Degsi minjsiqa a qa tulanj minjinj oqeton-aqa osiq qaja tamo naŋgo banq di atsiqa minjrej, ‘Niŋgi a wau koba yibqa a jaqatinj ti wauosim gilsim gilsim silali kalil nami yaibej qaji di kamba ebekritimqa niŋgi a olo uratib gilqas.’

³⁵ “O ijo aŋgro, dego kere niŋgi nuŋgo are miligiq na nuŋgo Kristen was naŋgo une kobotetnjqasai di ijo Abu laŋ qureq di unu qaji a dego nuŋgo une kobotetŋwasai.”

19

Yesus a uŋa uratqajqa anjam marej

¹ Yesus a anjam degsi marsiq koboonaqa a Galili sawa uratosiqa Judia sawaq gilsiq Jordan ya taqal beiq di soqnej.

² A di sonaqa tamo uŋgasari tulanj gargekoba naŋgi a dauryosib aqa areq di koroonabqa a na naŋgo ma tamo kalil naŋgi boletnjroqnej.

³ Onaqa Farisi naŋgi olo Yesus aqa areq bosi-bqa a anjam bei grotimqa quisib naŋgi a ojqajqa deqa gisanjosib endegsib nenemyeb, “Tamo bei aqa ɻauŋ aqa jejamuq di une kiňala bei soqnimqa tamo dena a uratqa kere e? Gago dal anjam a kiyersi marqo?”

⁴ Onaqa Yesus na kamba minjrej, “Qotei aqa anjam bei neŋgrenq di so qaji di niŋgi nami sisivosai kiyo? Anjam endegsi unu, ‘Tulanj nami Qotei a mandam ti ingi ingi kalil ti gereiyosiqa batı deqa a tamo uŋa wo dego gereinjrej.

5 Gereinjrsiqa marej, “Tamo bei na aqa ai abu naŋgi uratnjsimqā aqa ɻauŋ wo beterosib jejamu qujaitosib sqab.”’

6 Qotei aqa anjam di agi neŋgreŋq di unu. Deqa tamo uŋa wo naŋgi jejamu qujai sqab. Naŋgi olo jejamu aiyel sqasai. Qotei na naŋgi aiyel turtnjrej deqa tamo bei na olo potnjraiq.”

7 Onaqa Farisi naŋgi na kamba Yesus minjeb, “Ni anjam degsi mergonum deqa Moses a kiyaqa dal anjam endegsi marej, ‘Tamo bei na aqa ɻauŋ uratqa osimqā pepa bei neŋgreŋyosim yosim di a uratqas’?”

8 Onaqa Yesus na kamba minjrej, “Nuŋgo are geteŋgejunu deqa Moses a niŋgi uŋa uratqa mernŋej. Ariya tulan nami kumbra degsi sosai.

9 Niŋgi quiy. Tamo bei na aqa ɻauŋ laŋa uratosim olo uŋa bei oqas di a na aqa ɻauŋ kumbra ugeq waiyqo. Di kiyaqa? Uŋa di a nami tamo bei ombla une atosai deqa.”

10 Onaqa Yesus aqa aŋgro naŋgi na minjeb, “Tamo uŋa ti unub qaji naŋgi gulbe deqaji oqab deqa uŋgum. Naŋgi uŋa aib. Naŋgi laŋa soqneb.”

11 Onaqa Yesus na kamba minjrej, “Niŋgi anjam maronub di tamo kalil naŋgi dauryqa keresai. Tamo naŋgi Qotei na singila enjreqnu qaji naŋgi segi anjam di dauryqa kere.

12 Tamo qudei naŋgo jejamu bolesai. Naŋgi degsib ai miliqiŋ na ɻambabeb. Deqa naŋgi uŋa oqa keresai. Tamo qudei naŋgi tamo qudei na welum etnjreb deqa naŋgi aŋgrotqa keresai. Deqa naŋgi dego uŋa oqa keresai. Naŋgi laŋa unub. Ariya tamo qudei naŋgo segi areqalo na Qotei aqa wau

ojqa marsibqa uŋja oqa urateqnub. Tamo naŋgi ijo anjam endi dauryqa kereamqa naŋgi dauryebe.”

Aŋgro du du naŋgi Yesus aqa areq beb

¹³ Onaqa tamo uŋgasari qudei naŋgi naŋgo aŋgro du du joqsib Yesus na aqa ban naŋgo gateq di atetnjrsim naŋgi qa Qotei pailyqajqa deqa marsib Yesus aqa areq beb. Beqnabqa Yesus aqa aŋgro naŋgi na saidnjrsib minjreb, “Nuŋgo aŋgro du du naŋgi joqsib endeq baib.”

¹⁴ Degtisib saidnjrnabqa Yesus na aqa aŋgro naŋgi minjrej, “Aŋgro du du naŋgi uratnjrib ijo areq beb. Naŋgi saidnjraib. Tamo uŋgasari naŋgi aŋgro du du bul sqab di Qotei laŋ qureq di unu qají a naŋgo Mandor Koba sosim naŋgi taqatnjqas.”

¹⁵ Osiga Yesus na aŋgro du du naŋgo gateq di aqa ban atetnjrsiqa a sawa di uratosiq gilej.

Ñoro tamo bei a Yesus ombla anjam mareb

¹⁶ Onaqa tamo bei a Yesus aqa areq bosiqa nenemyej, “O Qalie Tamo, e kumbra bole kiye dauryosiy dena e ñambile gaigai sqai?”

¹⁷ Onaqa Yesus na kamba minjej, “Ni kiyaqa e kumbra bole qa nenembonum? Qotei a segi qujai tamo bole. Ariya ni ñambile gaigai sqajqa osimqa ni Qotei aqa dal anjam daurye.”

¹⁸ Onaqa tamo dena olo Yesus nenemyej, “E dal anjam kiye dauryqai?” Onaqa Yesus na minjej, “Ni tamo bei qalsim moiyatim. Ni tamo bei aqa unja jejamu ojetaim. Ni bajinaim. Ni tamo bei aqa jejamu laŋa gisanqaim.

¹⁹ Ni ino ai abu naŋgo sorgomq di geregere sosimqa naŋgo anjam dauryoqne. Ni ino segi

jejamu gereiyeqnum dego kere ino was naŋgi degsim gereinjroqne.’”

²⁰ Onaqa aŋgro wala dena olo Yesus minjej, “E dal anjam kalil di nami dauryosim boqnem agi bini degsi unum. Deqa e Qotei aqa kumbra kiye keretosai unum?”

²¹ Onaqa Yesus na kamba minjej, “Ni Qotei aqa kumbra kalil keretqa osimqa endegye. Ni gilsim ino iŋgi iŋgi kalil qariŋyosim silali osim tamo iŋgi iŋgi saiqoŋi naŋgi jeisim enjre. Degsim enjrsim bosim e daurbe. Osim bunuqna ni laŋ qureq di awai bole itqam.”

²² Yesus na tamo di degsi minjnaq quſiqa are tulaŋ gulbeiyej. A iŋgi iŋgi koba ti soqnej deqa ulatamu ugeiyonaqa ularnej.

²³ Onaqa Yesus na aqa aŋgro naŋgi minjrej, “E bole mern̄gwai. Tamo uŋgasari iŋgi iŋgi koba ti unub qaji naŋgi Qotei na taqatn̄jrsim naŋgo Mandor Koba sqa marsibqa laŋ qureq oqwajqa tulaŋ baŋgi koba.

²⁴ E ningi olo mern̄gwai. Kamel a yumba miligiq gilqajqa baŋgi koba. Dego kere tamo uŋgasari iŋgi iŋgi koba ti unub qaji naŋgi Qotei na taqatn̄jrsim naŋgo Mandor Koba sqa marsibqa laŋ qureq oqwajqa tulaŋ baŋgi koba.”

²⁵ Onaqa Yesus aqa aŋgro naŋgi anjam di quſibqa tulaŋ prugugetosib minjeb, “Ni anjam degsi mergonum deqa tamo yai naŋgi Qotei na eleŋjamqa naŋgi ɻambile gaigai sqa kere?”

²⁶ Onaqa Yesus a naŋgi koqn̄jrsiqa minjrej, “Tamo naŋgi segi ɻambile sqa keresai. Ariya Qotei na naŋgi eleŋqa kere. Di kiyaqa? Qotei a kumbra kalil yqa kere.”

27 Onaqa Pita na Yesus minjej, “O Tamo Koba, ni une. Iga gago iŋgi iŋgi kalil uratosim ni daurmeqnum. Deqa iga awai kiye oqom?”

28 Onaqa Yesus na minjrej, “E bole mern̄gawai. Mondoŋ Qotei a laŋ bunuj ti mandam bunuj ti atimqa bati deqa e Tamo An̄gro ñam kobaquja osiy ijo segi awo jaram kobaq di awesqai. Awesosiyqa niŋgi tamo e daurbeqnub qaji met̄ngitqa niŋgi degó awo jaram kokba 12 di awoelenqab. Awoosib Jekop aqa an̄gro 12 naŋgo moma kalil naŋgi taqatnjroqnqab.

29 Deqa tamo naŋgi ijo ñam qa are qaloqnsib naŋgo segi tal, naŋgo was naŋgi, naŋgo jaja naŋgi, naŋgo ai abu naŋgi, naŋgo an̄gro naŋgi ti naŋgo wau kalil degó uratnjsrib e daurbqab di Qotei na olo iŋgi bole bole tulan̄ gargekoba naŋgi enjrqas. Yimqa mondoŋ naŋgi ḥambile gaigai sqab.

30 Deqa niŋgi quiy. Tamo gargekoba bini ñam ti unub qaji naŋgi mondoŋ ñam saiqoji sqab. Ariya tamo gargekoba bini ñam saiqoji unub qaji naŋgi mondoŋ ñam ti sqab.”

20

Jesus a iŋgi wauqa yawo anjam marej

1 Osiqa Yesus a olo aqa an̄gro naŋgi endegsi minjrej, “Qotei laŋ qureq di unu qaji a na aqa segi tamo uŋgasari naŋgi taqatnjrsim naŋgo Mandor Koba sqas. Kumbra di wau lanja bei aqa kumbra sigitejunu. Wau lanja dena nobqolo ambru tigelosiqa aisiq tamo qudei naŋgi aqa iŋgi wauq di wauetqajqa itnjrej.

² Itnjrsiqa minjrej, ‘Ninġi ijo inġi wauq di wauoqneb wau qa bati koboamqa e na silali quruño quja quja eñgwai.’ Degsi minjrsiq qariñnjrnaqa nañgi gilsib aqa inġi wauq di wauoqneb.

³ Sej kiñala goge oqnaqa wau lanja a koro sawaq aisiqa dia tamo qudei nañgi lanja tigelesonab unjrsiqa minjrej,

⁴ ‘Ninġi dego gilsib ijo wauq di wauoiy. Wauab kere dego awai eñgwai.’

⁵ Degsi minjrnqa nañgi gilsib aqa inġi wauq di wauoqneb. Qanam jige tamo qudei nañgi dego lanja tigelesonab unjrsiqa minjrej, ‘Ninġi dego gilsib ijo wauq di wauoiy. Wauab kere dego awai eñgwai.’ Degsi minjrnqa nañgi gilsib aqa wauq di wauoqneb. Sej kelinjtonaqa olo tamo qudei dego degsi minjrnqa nañgi gilsib wauoqneb.

⁶ “Sej bilaqtonaqa wau lanja a aisiqa gamq di tamo qudei nañgi lanja tigelesonab unjrsiqa nenemnjrej, ‘Ninġi kiyaqa lanja tigelesonab sej bilaqtqo?’

⁷ Onaqa nañgi na minjeb, ‘Tamo bei na iga wau egosai deqa iga lanja tigelejunum.’ Onaqa wau lanja na minjrej, ‘Ninġi dego gilsib ijo inġi wauq di wauoiy.’

⁸ “Ariya wau qa bati koboonaqa wau lanja na aqa wau taqato tamo bei qariñyosiq minjeb, ‘Ni gilsim wau tamo nañgi di metnirim ino areq di koroabqa nañgo awai enjre. Enjrqa osimqa tamo nañgi bilaq bosib wauonub qaji nañgo awai namo enjrsimqa ariya tamo nañgi nobqolo ambru bosib wauosib bilaqtonub qaji nañgo awai bunuqna enjre.’

9 Degsi minjnaq qusiqa tamo nañgi bilaq bosib wauueb qaji nañgi namo metnjrnaq aqa areq bonabqa silali quruñjo quja quja enjrej.

10 Onaqa tamo nañgi nobqolo ambru bosib wauosib bilaqteb qaji nañgi degsib unsibqa are qaleb, ‘Iga nobqolo ambru bosim wauosim bilaqtonum. Deqa iga silali kobaquja oqom.’ Degrub are qalnabqa wau taqato tamo na nañgi metnjrnaq aqa areq bonabqa nañgi dego silali quruñjo quja quja enjrej.

11 Onaqa nañgi degsib unsibqa nañgi na wau lanja ñirintosib minjeb,

12 ‘Tamo nañgi di bilaq bosib waukiñalayonubqa silali ni na iga egonum qaji dego kere nañgi enjronum. Iga nobqolo ambru waueqnam señ oqsiq gago jejamu tulaj kañkañeqnaqa bilaqtqo. Iga silali koba osai.’

13 “Onaqa wau lanja a nañgo anjam di qusiqa bei endegsi minjej, ‘O was, e ni kumbra uge emosai. Aqo ombla bini nobqolo anjam keretosimqa e ni silali quruñjo qujai emqa mermonum.

14 Deqa ni ino silali quruñjo qujai osim aiye. E ni silali quruñjo qujai emonum dego kere tamo nañgi bunuqna bosib wauonub qaji nañgi silali quruñjo quja quja enjronum. E ijo segi areqalo na degyonum.

15 Silali di ijo segi silali. Deqa e ijo segi areqalo dauryosiy ijo silali jeiqa kere. E na tamo nañgi bunu bonub qaji nañgi kumbra bole enjrqas enjrqai. Deqa ni kiyaqa e qa are uegimqo?”

16 Yesus a yawo anjam degsi marsiqqa olo marej, “Dego kere tamo bini ñam ti unub qaji nañgi mon-

donj ñam saiqoji sqab. Ariya tamo bini ñam saiqoji unub qaji nañgi mondoñ ñam ti sqab.”

Yesus a marej, “E moisiy olo subq na tigelqai”

¹⁷ Osiqa Yesus na aqa aŋgro 12 nañgi joqsiqa koba na walwelosib Jerusalem aiyoqneb. Aiyoqn-sibqa Yesus na nañgi segitnjsiqa endegsi minjrej,

¹⁸ “Niñgi quiy. E Tamo Aŋgro. Iga Jerusalem aiyeqnum. Dia tamo qudei na e ojsib atra tamo kokba ti dal anjam qalie tamo ti nañgo bañq di e atqab. Yimqa nañgi na ijo jejamuq di une qamsib merbqab, ‘Ni une ti. Deqa ni moiqam.’

¹⁹ Nañgi e degsib merbosib tamo nañgi Qotei qaliesai qaji nañgo bañq di e atqab. Yimqa nañgi na e misiliñboqnsib bu toqoñ na kumbaiñboqnsib ñamburbasq di lubsisb moiyotbqab. Bati qalub koboamqa e olo subq na tigelqai.”

Jems Jon wo nañgi aiyel tamo kokba sqajqa mareb

²⁰ Onaqa Sebedi aqa ñiri aiyel nañgo ai ombla na Yesus aqa areq bosibqa nañgo ai a sinja pulutosiqa Yesus minjej, “O Tamo Koba, e ni anjam bei mermitqa ni ijo anjam dauryqa kere kiyo?”

²¹ Onaqa Yesus na kamba minjej, “Ni ingi kiye qa merbqam?” Onaqa a na Yesus minjej, “Mondoñ ni gago Mendor Koba sosimqa batı deqa ni marimqa ijo aŋgro aiyel endi nañgi ino bañ woq ino bañ qonañq di awoqab.”

²² Onaqa Yesus na kamba nañgi aiyel endegsi minjrej, “Anjam niñgi merbonub di aqa utru ninji geregere poiñgosai. E jaqatin koba oqai. Jaqatin di ya uge uyo bul. Jaqatin e oqai di niñgi aiyel dego

oqa kere e?” Onaqa nañgi na minjeb, “Od, aqo aiyel oqa kere.”

²³ Onaqa Yesus na olo nañgi aiyel minjrej, “Bole, jaqatin e oqai di ningi dego oqab. Ariya tamo yai nañgi ijo ban̄ woq ijo ban̄ qonanq di awoqab di e na marqa keresai. Di ijo wau sai. Tamo nañgi ijo Abu na giltnjrej qaji nañgi segi ijo ban̄ woq ijo ban̄ qonanq di awoqab.”

²⁴ Yesus aqa aŋgro 10 nañgo ɻamdamuq di was aiyel nañgi na anjam di Yesus minjeb deqa quisib nañgi aiyel qa ɻirinjeb.

²⁵ Onaqa Yesus na aqa aŋgro 10 nañgi met-njrnaqa aqa areq bonabqa minjrej, “Ningi qalie, mandor kokba sawa sawa kalil taqateqnub qaji nañgi nañgo segi ñam soqtoqnsib tamo uŋgasari nañgi ɻirinj na taqatnjreqnub.

²⁶ Ariya kumbra di nuŋgoq di saiq. Nuŋgo ambleq di aŋgro bei a ñam ti sqa marsimqa a mati nuŋgo wau tamo soqnem. Osim a ñam ti sqas.

²⁷ Nuŋgo ambleq di aŋgro bei a tamo kobaquja sqa marsimqa a mati nuŋgo kaŋgal tamo soqnem. Osimqa a olo tamo kobaqujaqas.

²⁸ E Tamo Aŋgro. Ningi ijo kumbra qalieosib degsib dauryoqniy. Ijo kumbra agiende. E na tamo uŋgasari nañgi wauetnjreqnum. E deqa bem. Tamo uŋgasari nañgi e wauetbqajqa e deqa bossai. Bunuqna e ijo segi ɻambile uratosiy tamo uŋgasari gargekoba nañgi eleñqai.”

Yesus na tamo aiyel ɻam qandimnjro qaji nañgi boletnjrej

²⁹ Osiqa Yesus na aqa aŋgro nañgi joqsiqa koba na walwelosib aisib Jeriko qureq di branteb.

Brantosib Jeriko qure ambleq na walwelosib olo Jeriko uratosib aiyeqnabqa tamo ungasari tulan̄ gargekoba nañgi Yesus dauryosib koba na aiy-oqneb.

³⁰ Aiyeqnabqa tamo aiyel ɣam qandimnjro qaji nañgi gam qalaq di awesosibqa anjam endegsib queb, “Yesus a beqnu.” Nañgi degsib quisibqa tulan̄ lelenjosib mareb, “O Tamò Koba, Devit aqa Niri, ni aqo aiyel qa dulame.”

³¹ Onaqa tamo ungasari gargekoba Yesus dauryosib aiyoqneb qaji nañgi na nañgi aiyel ɣirinjtrsib minjreb, “Ninji lelenkobaaib. Kirioiy.” Degsib minjrnabqa nañgi aiyel kiriosai. Nañgi olo tulan̄ lelenjoqnsib Yesus minjoqneb, “O Tamò Koba, Devit aqa Niri, ni aqo aiyel qa dulame.”

³² Onaqa Yesus a tigelosiqa nañgi aiyel metnjr-naqa aqa areq bonabqa minjrej, “E ninji aiyel kiyern̄gwajqa deqa ninji e qa lelenjoqnab?”

³³ Onaqa nañgi aiyel na minjeb, “O Tamò Koba, aqo aiyel olo ɣam poigim sawa unqajqa deqa iga ni qa lelenjoqnam.”

³⁴ Onaqa Yesus a nañgi aiyel qa dulosiqa aqa ban̄ waiyosiq nañgo ɣamdamu ojetnjrej. Ojetnjr-naqa nañgi aiyel ɣam poinjrn̄aqa sawa unsibqa tigelosib Yesus dauryosib aiyeb.

21

*Yesus a donki aqa quraq di awoosiq Jerusalem
aiyej*

¹ Onaqa Yesus aqa angro nañgi koba na walwelosib aisib Jerusalem jojomysosib Betfage qureq di branteb. Betfage qure agi Oliv mana utruq

di unu. Di brantosib Yesus na aqa aŋgro aiyel qariŋjrsiqa minjrej,

² “Niŋgi aisib qure bei jojom di unu di brantosib donki bei aqa du wo tontnjerub unub di unjrqab. Unjrsib sil palontosib titnjrsib joqsib boiy.

³ Niŋgi sil palontoqniqbqa tamo bei na neneŋgwas kiyo, ‘Niŋgi kiyaqa donki aiyel naŋgo sil palonteqnub?’ Degsi neneŋgimqa niŋgi na minjiy, ‘Tamo Koba a wau ti deqa donki aqa du wo qa mergwo.’ Yimqa a na donki aqa du wo naŋgi qariŋjrim ijoq bqab.”

⁴ Yesus a kumbra di yej deqa anjam bei Qotei aqa medabu o tamo bei nami marej qaji di aqa damu brantej. A endegsi marej,

⁵ “Niŋgi na Saion qure naŋgi endegsib minjriy, ‘Niŋgi uniy. Nuŋgo Mandor Koba a nuŋgoq beqnu. A lawo na beqnu. A areqalo minjinj saiqoji. Deqa a donki quraq di awoosiq beqnu. Od, a donki aqa du quraq di awoosiq beqnu.’ ”

⁶ Onaqa Yesus aqa aŋgro aiyel naŋgi aisib anjam Yesus na minjrej qaji di dauryeb.

⁷ Osib naŋgi donki aqa du wo Yesus aqa areq joqsib beb. Bosib naŋgo segi gara jugo piqtosib donki aiyel naŋgo quraq di tunabqa Yesus a segi donki gogetosiqa quraq di awoej.

⁸ Awoonaqa donki aiyel naŋgi walwelosib aiye-qnabqa tamo ungasari tulaŋ gargekoba naŋgi beleŋjosib naŋgo segi gara jugo piqtelenjosib gamq di tuelenjoqneb. Tamo qudei naŋgi nañuq dena ñam baŋga giŋgenjyosibqa osi bosib di dego gamq di tuelenjoqneb.

⁹ Onaqa Yesus a donki quraq di awoosiq wal-

weleqnaqa tamo uŋgasari namooqneb qaji naŋgi ti bunuoqneb qaji naŋgi ti tulan̄ leleŋoqnsibqa maroqneb, “O Devit aqa Niri, iga ni qa tulan̄ areboleboleigeqnu. Ni Tamo Koba aqa ñam na bonum deqa a ni tulan̄ geregereimeqnu. Deqa iga Qotei lan̄ goge di unu qaji aqa ñam tulan̄ soqtoqnqom.” Tamo uŋgasari naŋgi degoqnsib lelen̄ ti Yesus dauryoqneb.

10 Onaqa Yesus a walwelosi aisiq Jerusalem di brantonaqa tamo uŋgasari kalil naŋgi a unsibqa tulan̄ prugugetosib segi segi maroqneb, “Tamo endi yaiyo?”

11 Degtisib mareqnabqa tamo uŋgasari qudei Yesus dauryosib aiyoqneb qaji naŋgi na kamba minjreb, “Tamo endi Yesus. A Qotei aqa medabu o qaji tamo bole. Aqa qure utru Nasaret. Qure di Galili sawaq di unu.”

Yesus na tamo uŋgasari naŋgi atra talq dena winjrej

12 Onaqa Yesus a walwelosi aisiqa atra tal koba miliq gilej. Gilsiqä ñam atej di tamo uŋgasari gargekoba naŋgi ingi ingi qarinqyoqnsibqa dena silali eqnab unjrsiqa naŋgi winjrnaq jaraiyeb. Tamo qudei naŋgi silali piloqneb. Qudei naŋgi binon̄ qarinqyoqnsib dena silali oqneb. Deqa Yesus a naŋgo jar ti jaram ti bilbelyosiqa naŋgi dego winjrnaq jaraiyeb.

13 Naŋgi kalil jaraiyeq nabqa Yesus na minjrej, “Qotei aqa anjam bei nami endegsib neŋgreŋyeb unu, ‘Ijo tal endi pailyqajqa tal.’ Ariya ningi na olo tal endi ugetonubqa a bajin̄ tamo naŋgo tal bulqo.”

14 Yesus a atra tal miliq di sonaqa tamo ñam qandimnjro qaji ti tamo siŋga qandamnjro qaji ti naŋgi aqa areq beqnabqa a na naŋgi kalil bolet-njroqnej.

15 Onaqa angro du du atra tal miliq di soqneb qaji naŋgi Yesus aqa manwa di unsibqa tulan leleñoqnsib minjoqneb, “O Devit aqa Niri, iga ni qa tulan areboleboleigeqnu.” Onaqa dal anjam qalie tamo naŋgi ti atra tamo kokba ti naŋgi angro du du naŋgo anjam di quisibqa Yesus qa ugeeb.

16 Osib Yesus minjeb, “Angro du du naŋgi leleñoqnsib anjam mareqnub di ni queqnum e?” Onaqa Yesus na kamba minjrej, “Od, e naŋgo anjam queqnum. Ariya anjam bei neŋgreŋq di unu qaji di ningi nami sisiyosai kiyo? Anjam agiende, ‘O Abu, angro du du ti angro mom ti naŋgi ino ñam soqteqnub.’”

17 Yesus a naŋgi degsi minjrsiq koboonaqa a tigelosiq Jerusalem uratosiq Betani qureq gilej. Gilsiq qoloonaq di ɻeiej.

Yesus a qura minjej, “Ni olo bunu geitqasai”

18 Nebeonaqa Yesus a olo tigelosiqa Jerusalem aiyoqnsiqa gamq di a mamyej.

19 Mamyonqa ñam atsiqa qura baŋga ti gam qalaq di tigelesonaq unsiqa aqa gei unqajqa utruq gilej. Gilsiq unej qura gei bei saiqoji. Baŋga segi sonab unej. Unsiqa qura di minjej, “Ni olo bunu geitqasai.” Degsi minjnaqa batí qujai deqa qura di utru ti kalil laosiq moiyej.

20 Onaqa Yesus aqa angro naŋgi aqa kumbra di unsibqa tulan prugugetosib Yesus nenemyeb, “Qura di kiyersi urur laosiq moiqo?”

21 Onaqa Yesus na kamba minjrej, “E bole mern̄gwai. Niñgi Qotei qa nun̄go areqalo singilatosib nun̄go areqalo aiyeltqasai di niñgi dego qura minjibqa a laosim moiqas. Qura segi sai. Niñgi mana kobaquja endi dego minjqab, ‘Ni tigelosim yuwalq aiye.’ Minjibqa a nun̄go anjam di dauryosim tigelosim yuwalq aiqas.

22 Deqa niñgi Qotei qa nun̄go areqalo singilatosib ingi bei qa pailyqab di niñgi ingi di oqab.”

Juda nañgi na Yesus nenemyeb, “Ni siñgila qabe na osimqa kumbra endi yeqnum?”

23 Osiqa Yesus a olo atra tal miliqq gilsiq dia Qotei aqa anjam palontoqnej. Onaqa Israel nañgo gate nañgi ti atra tamо kokba ti nañgi na Yesus aqa areq bosib nenemyeb, “Ni iga merge. Ni siñgila qabe na osimqa kumbra endi yeqnum? Yai na ni qariñmej deqa ni bosim wau endi yeqnum?”

24 Onaqa Yesus na minjrej, “E kamba anjam bei niñgi nenemñgwai. Nenemñgitqa niñgi e merbibqa e yai na qariñbonaq bosim wau endi yeqnum di ubtosiy merñgwai.

25 Niñgi na merbiy. Yai na Jon qariñyonaq bosiqua tamо ungasari nañgi yansnjroqnej? Qotei na kiyo? Tamо bei na kiyo?”

Onaqa nañgi Yesus aqa anjam di quisibqa segi segi qairosib mareb, “Iga Yesus minjqom, ‘Qotei na Jon qariñyej,’ degsi minjqom di a iga mergwas, ‘Kiyaqa niñgi Jon aqa anjam quetosai?’

26 Ariya iga minjqom, ‘Tamo bei na Jon qariñyej,’ degsi minjqom di dego keresai. Tamо ungasari nañgi mareqnub, ‘Jon a Qotei aqa medabu o qaji tamо bole.’ Deqa iga nañgi ulainjronum.”

27 Naŋgi degsib qairosib olo Yesus minjeb, “Yai na kiyo Jon qarinjej di iga qaliesai.” Onaqa Yesus na kamba minjrej, “Niŋgi degsib merbonub deqa e dego yai na qarinjbonaq bosim wau endi yeqnum di niŋgi mernŋwasai.”

Yesus a yawo anjam bei marej

28 Osiqa Yesus a olo Juda gate naŋgi ti atra tamo kokba ti naŋgi endegsi minjrej, “Niŋgi kiyersib are qalonub? Tamo bei aqa njiri aiyel soqneb. Bati bei a aqa njiri matu aqaq bosiq a minjej, ‘O ijo aŋgro, ni gilsim ijo inŋgi wauq di wauame.’

29 Onaqa aqa njiri matu na minjej, ‘Sai. E wauqa uratonum.’ Degsi aqa abu saidyosiqa bunuqna areqalo bei osiqa gilsiq wauetej.

30 Onaqa abu a aqa njiri yala aqaq bosiq a minjej, ‘O ijo aŋgro, ni gilsim ijo inŋgi wauq di wauame.’ Onaqa aqa njiri yala na minjej, ‘Od, Abu, e wauqai.’ Degsi aqa abu odyosiqa ariya a wauosai. A laŋa talq di soqnej.

31 Deqa niŋgi na merbiy. Aŋgro yai na aqa abu aqa anjam dauryej?” Onaqa naŋgi na kamba Yesus minjeb, “Niri matu a na aqa abu aqa anjam dauryej.”

Naŋgi degsib Yesus minjnabqa a na olo minjrej, “E bole mernŋwai. Takis o qaji tamo ti gam qaji uŋa ti naŋgi na niŋgi buŋgosib namoosib Qotei aqaq oqibqa a naŋgi eleŋosim nango Mandor Koba sosim naŋgi taqatnjqas.

32 Di kiyaqa? Jon yansnjro qaji a nuŋgoq bosiq a Qotei aqa kumbra bole niŋgi osorŋgonqa naŋgi Jon aqa anjam quetosai. Ariya takis o qaji tamo ti gam qaji uŋa ti naŋgi Jon aqa anjam geregere

queteb. Quetonab niŋgi di unsibqa ariya niŋgi olo are bulyosai. Osib niŋgi Jon aqa anjam quetosai dego.”

Wain wau qayawo anjam

33 Yesus a Juda tamo kokba naŋgi degsi minjrsiqa olo endegsi minjrej, “E niŋgi yawo anjam bei mernjgit niŋgi quiy. Tamо bei a tigelosiqa aqa wauq gilej. Gilsipa wain sil yagelenjosipa jeŋ qosej. Qoso koboonaqa meniŋ qura gogeq di tabir kuru bul gereyej. Wain sil geitimqa wain gei koroiyosib paraparaiyosib aqa ya dia bilentqajqa deqa gereyej. Osiqa wauq di tal atsiqa wau taqato tamo qudei naŋgo banq di aqa wau uratetnjrsiqa sawa isaq gilsiq di soqnej.

34 Sonaqa wain gei melionaqa a na aqa kanjal tamo qudei naŋgi qariŋnjrnaqa wau taqato tamo naŋgoq aisib minjreb, ‘Wau lanja a na iga qaringwo bonum. Deqa niŋgi wain gei egibqa iga na osi gilqom.’

35 Degsi minjrnabqa naŋgi na naŋgi ojelejosib bei qalougeteb. Bei qalnab moiyej. Bei meniŋ na qalnab moiyej.

36 Onaqa wau lanja a di qusiqa olo aqa kanjal tamo gargekoba naŋgi qariŋnjroqnej. Qariŋnjreqnaqa aiyeqnab naŋgi dego ŋumoqneb.

37 “Onaqa wau lanja a endegsi are qalej, ‘E ijo segi aŋgro qujai qariŋyit aiqas di naŋgi a qalqasai. Naŋgi aqa anjam quetqab.’ Degsi are qalsiqa aqa segi ŋiri qariŋyonaq aiyej.

38 Aiyeqnaqa wau taqato tamo naŋgi a unsibqa segi segi qairosib mareb, ‘Tamo a bqo endi wau lanja aqa segi ŋiri. A na aqa abu aqa iŋgi iŋgi kalil

oqas. Deqa iga a qalsim moiyotosimqa wau endi iga na oqom.'

³⁹ Degtib marsibqa wau lanja aqa njiri ojsib osi gilsib wau qalaq di qalnab moiyej.

⁴⁰ Deqa niŋgi kiyersib are qalonub? Wau lanja a bosimqa wau taqato tamo uge naŋgi di kiyern-jrqas? Ningi na merbiy."

⁴¹ Onaqa naŋgi na minjeb, "Wau lanja a bosimqa tamo uge naŋgi di tulaj ugeugeinjrsim padaltnrougetqas. Osim aqa wau di olo yainjrsim tamo qudei naŋgo banq di uratetnjrimqa naŋgi na kamba wau taqatosib wain gei melioqnimqa koroijoqnsib wau lanja yoqnqab."

⁴² Naŋgi degsib Yesus minjnabqa a na olo minjrej, "Qotei aqa anjam bei unu. Ningi anjam di nami sisiyosai kiyo? Anjam agiende,

"Tal gereiyo qaji tamo naŋgi na tal ai arqsibqa uge qa marsib taqal waiyeb.

Onaqa tal ai di Qotei na olo osiq tumaq di tigeltej unu.

Tal ai di tal siŋgilatqajqa deqa tigeltej.

Tamo Koba a segi na tal ai di tigeltej deqa iga unsim mareqnum,

"Tal ai di tulaj bolequja." '

⁴³ Deqa e niŋgi endegsi merŋgwai. Qotei a nuŋgo Mandor Koba sosim niŋgi taqatŋgwajqa uratosim niŋgi taqal breŋgwas. Osim olo tamo uŋgasari qudei aqa kumbra bole dauryeqnub qaji naŋgi eleŋosim naŋgo Mandor Koba sosim naŋgi taqatnjrqas. Naŋgi gei bole atobuleqnub deqa Qotei na naŋgi taqatnjrqas.

⁴⁴ Tamu uŋgasari ululonjosib tal ai quraq ainqab qaji naŋgi di tal ai dena naŋgo tanu giŋgenyqas. Ariya

tal ai di ulojosim tamo uñgasari qudei nañgoq aism
jejamu ti tanu ti torei paraparainjrqas.”

⁴⁵ Onaqa atra tamo kokba ti Farisi nañgi ti yawo
anjam di qusib endegsib qalieeb, Yesus a yawo
anjam dena nañgo jejamuq di une qametnjrej.

⁴⁶ Nañgi degsib qalieosib deqa nañgi Yesus ojqa
mareb. Ariya nañgi tamo uñgasari nañgi ulainjrsib
deqa Yesus ojqa urateb. Di kiyaqa? Tamo uñgasari
kalil nañgi maroqneb, “Yesus a Qotei aqa medabu
o qaji tamo bole.”

22

Yesus a maruro qa yawo anjam marej

¹ Onaqa Yesus a olo Juda tamo kokba nañgi yawo
anjam bei endegsi minjrej,

² “Qotei lañ qureq di unu qaji a na aqa segi tamo
uñgasari nañgi taqatnjsim nañgo Mandor Koba
sqas. Kumbra di mandor bei aqa ñiri uña bañ ojqa
bationaqa maruro atej dego kere.

³ A maruro atsiqa aqa kañgal tamo qudei
qariñjrnqa nañgi gilsib tamo uñgasari nami aqa
maruro unqa minjrej qaji nañgi metnjreb, ‘Ningi
boiy.’ Onaqa nañgi bqa asginjrej.

⁴ Asginjrnqa mandor a deqa quasiqa aqa kañgal
tamo qudei olo qariñjrsiqa minjrej, ‘Niñgi gilsib
tamo uñgasari e ijo maruro unqa minjrem qaji
nañgi olo endegsib minjriy, “Niñgi quiy. Mandor
a ingi ingi kalil gereiyosiq atqo unu. Makau ti
wagme namur bole bole ñumsiqa goiqa. Deqa ningi
asginqaiq. Niñgi bosib aqa maruro uniy.” O kañgal
tamo, niñgi gilsib nañgi degsib minjriy.’

5 “Onaqa naŋgi gilsib tamo uŋgasari naŋgi di minjreb, ‘Niŋgi boiy.’ Minjrnabqা naŋgi kalil bqa asginjrej. Bei a ulaŋosiqa aqa iŋgi wauq gilej. Bei a ulaŋosiqa aqa silali wauq gilej.

6 Qudei na kaŋgal tamo naŋgi di ojeleŋosib ugeugeinjrsib ſumnaŋ moreŋeb.

7 Onaqa mandor a deqa quſiqa minjinj oqet-on-aqa aqa qaja tamo naŋgi qariŋnjrnaqa gilsib tamo naŋgi kaŋgal tamo ſumeb qaji naŋgi kamba ſumekriteb. Osib naŋgo tal iŋgi iŋgi kalil qatren-tonab yuekriteb.

8 “Onaqa mandor a olo aqa kaŋgal tamo qudei qariŋnjrsiqa minjrej, ‘Ijo aŋgro aqa uŋga baŋ ojqa batı kereqo deqa e na maruro atonum unu. Tamo uŋgasari e nami ijo maruro unqa minjrem qaji naŋgi bqa asginjrej. Naŋgi tamo uŋgasari bolesai deqa naŋgi ijo maruro unqa keresai.

9 Deqa niŋgi gilsib gamq di tamo uŋgasari laŋa lanaj naŋgi turosib metnjrib ijo maruro unqa beb.’

10 Onaqa naŋgi gilsib gamq di tamo uŋgasari gargekoba bole ti uge ti naŋgi turosib metnjrn-abqা naŋgi kalil maruro unqajqa bosib koroon-abqা tal tamo na maqej.

11 “Onaqa mandor a na tamo uŋgasari naŋgi di unjrqa marsiqa tal miliq gilej. Gilsiq ŋam atej di tamo bei a maruro qa gara wala jugosai di unsiqa minjej,

12 ‘O was, ni kiyaqa maruro qa gara wala jugosai? Ni degsim maruro unqa baim.’ Degsi minjnaqa tamo di a na kamba olo anjam bei minjqa keresaiiyo-naqa laŋa kiriesoqnej.

13 Onaqa mandor a na aqa kaŋgal tamo naŋgi

minjrej, ‘Niñgi na tamo di siñga ti bañ ti tontetosib oqeñ waiyibqa sawa ambruq di soqnem. Sawa dia tamo nañgi akamkobaoqnsib pailoqnsib nañgo jaqatin qaqalagei anjam atoqnqas.’ ”

¹⁴ Osiqa Yesus a olo marej, “Niñgi quiy. Qotei a tamo tulan gargekoba nañgi metnjreqnu. Ariya a tamo quja quja segi giltnjreqnu.”

“Iga Sisar takis yqom e?”

¹⁵ Onaqa Farisi nañgi gilsib nañgi anjam kiye Yesus nenemyib a anjam grotim quhib a ojqajqa deqa qairoqneb.

¹⁶ Qairosib anjam kereonaq nañgo angro qudei Herot aqa wau tamo qudei ti qariñjrnab Yesus aqa areq bosib minjeb, “O Qalie Tamo, iga qalie, ni anjam bole maro qaji tamo. Ni anjam bole segi tamo uñgasari nañgi minjroqnsim Qotei aqa kumbra osornjreqnum. Ni tamo bei ulaiyosaieqnum. Ni tamo ñam ti nañgi anjam bei minjroqnsim olo tamo ñam saiqoji nañgi anjam bei minjro-saieqnum. Ni anjam qujai tamo kalil nañgi minjreqnum.

¹⁷ Deqa ni iga merge. Iga Sisar takis yqom e? Yqasai e? Ni kiyersi are qalonum?”

¹⁸ Onaqa Yesus a nañgo areqalo uge di poiyon-aqa minjrej, “Niñgi gisañ tamo. Kiyaqa niñgi e anjam bei grotitqa quhib e ojqajqa deqa gisañbeqnub?

¹⁹ Niñgi meniñ silali bei osorbiy.” Degrí minjrnáqa nañgi meniñ silali bei osi bosib osoryonab unsiqa minjrej,

²⁰ “Meniñ silali quraq endi tamo yai aqa ulatamu ti ñam tiunu?”

21 Onaqa naŋgi na minjeb, “Di Sisar aqa.” Onaqa a na minjrej, “Deqa Sisar aqa iŋgi iŋgi a qa olo yiy. Qotei aqa iŋgi iŋgi a qa olo yiy.”

22 Onaqa naŋgi Yesus aqa anjam di quisibqa tulaj prugugeteb. Osib naŋgi Yesus uratosib jaraiyeb.

Tamo moreŋo qaji naŋgi olo subq na tigelqab

23 Onaqa bati deqa Sadyusi tamo qudei naŋgi Yesus aqa areq beb. Sadyusi naŋgi mareqnub, “Tamo moreŋo qaji naŋgi olo subq na tigelqasai.” Deqa naŋgi bosib Yesus endegsib minjeb,

24 “O Qalie Tamo, ni que. Moses a nami endegsi marej, ‘Tamo bei a moiylimqa aqa ɻauŋ aŋgro saiqoji soqnimqa aqa was bei na olo uŋa qobul di osim aqa was moiyej qaji aqa aŋgro ɻambabtqas.’ Moses a nami degsi marej.

25 Deqa ni que. Was 7 naŋgi soqneb. Nango was matu a uŋa osiqa moiyej. A aŋgro saiqoji. Onaqa aqa was yala na olo uŋa qujai di ej.

26 Osiqa a dego moiyej. A aŋgro saiqoji. Onaqa aqa was yala na olo uŋa qobul di osiqa a dego moiyej. A aŋgro saiqoji. Was 7 kalil naŋgi uŋa qujai di osib moreŋeb. Naŋgi aŋgro saiqoji.

27 Naŋgi kalil moreŋonabqa ariya bunuqna uŋa di a dego moiyej.

28 Deqa ni iga merge. Mondoŋ subq na tigelo batiamqa tamo kalil naŋgi subq na tigelabqa uŋa di a yai aqa ɻauŋ tiŋtiŋ sqas? Ni qalie, was 7 kalil naŋgi uŋa qujai di eb.”

29 Onaqa Yesus na minjrej, “Qotei aqa anjam neŋgreŋq di unu qaji di aqa damu niŋgi poiŋgosai.

Qotei aqa singila dego niŋgi poingosai. Deqa niŋgi anjam grotonub. Grotosib agi nenembonub.

³⁰ Mondon tamo uŋgasari naŋgi subq na tigelosi-bqa naŋgi uŋatqasai. Naŋgi tamotqasai. Naŋgi laŋ angro bul laŋa sqab.

³¹ “Niŋgi quiy. Tamo naŋgi moisib olo subq na tigelqab anjam di aqa utru Qotei a nami babbosiq niŋgi merngej. Di niŋgi sisiyosai kiyo? Qotei a endegsi marej,

³² ‘E Abraham aqa Qotei. E Aisak aqa Qotei. E Jekop aqa Qotei.’ Qotei a degsi marej deqa iga qalieonum, Qotei a tamo moreno qaji naŋgo Qotei sai. A tamo ŋambile so qaji naŋgo Qotei.”

³³ Onaqa tamo uŋgasari kalil naŋgi Yesus aqa anjam di quisibqa tulaŋ prugugeteb.

Dal anjam kiye a tulaŋ bolequja?

³⁴ Yesus a Sadyusi naŋgi anjam degsi minjrnaqa naŋgi na kamba olo anjam bei minjqa keresaiin-jrej. Onaqa Farisi naŋgi deqa quisib olo Yesus aqa areq beb.

³⁵ Nango ambleq dena dal anjam qalie tamo bei a tigelosiqa Yesus gisanjyosiq nenemyej,

³⁶ “O Qalie Tam, ni mare. Qotei aqa dal anjam kiye a segi qujai tulaŋ bolequja? Dal anjam kiye a dal anjam kalil buŋnjrejunu?”

³⁷ Onaqa Yesus na minjej, “Dal anjam tulaŋ bolequja agi mermqai. Dal anjam agiende. ‘Ni ino Tamo Koba Qotei a tulaŋ qalaqalaiyime. Qalaqalaiyosim ino are miligi ti ino qunuŋ ti ino areqalo ti kalil a yekritime.’

³⁸ Dal anjam di a segi qujai tulaŋ bolequja. A na dal anjam kalil buŋnjrejunu.

39 Ariya dal anjam deqaji bei dego mermqai. Dal anjam agiende. ‘Ni ino segi jejamu gereiyeqnum dego kere ino was naŋgi degsim geregereinjroqni-me.’ Dal anjam boledamu aiyel agi e na mermonum.

40 Ni dal anjam aiyel di dauryqam di ni Moses aqa dal anjam ti Qotei aqa medabu o qaji tamo naŋgo anjam ti kalil keretosim dauryqam.”

Kristus a kiyersim Devit aqa ɳiri sqas?

41 Onaqa Farisi naŋgi olo Yesus aqa areq di koroesonabqa a na nenemnjrej,

42 “Niŋgi Kristus qa kiyersib are qalonub? A yai aqa ɳiri?” Onaqa naŋgi na kamba minjeb, “Kristus a Devit aqa ɳiri.”

43 Onaqa Yesus na olo minjrej, “Devit a nami marej, ‘Kristus a ijo Tamo Koba.’ Agi Qotei aqa Mondor na Devit aqa medabu singilatetonaqa a endegsi marej,

44 “Tamo Koba a na ijo Tamo Koba minjej,
“Ni ijo banj woq endi awo.

Awesoqnimqa e ino jeu tamo kalil naŋgi elejosiy
ino sorgomq di atitqa ni na naŋgi taqatnjqro-qnqam.”

45 Niŋgi uniy. Devit a marej, ‘Kristus a ijo Tamo Koba.’ Deqa Kristus a kiyersim Devit aqa ɳiri sqas?”

46 Yesus a Farisi naŋgi anjam degsi minjrnaqa tamo bei na kamba anjam bei minjqa keresai. Deqa tamo naŋgi olo bunuqna anjam bei Yesus nenemyqajqa ulaeb.

23

Juda tamo kokba nañgi kumbra uge uge yoqneb

¹ Onaqa Yesus na olo aqa aŋgro nañgi ti tamo ungasari kalil nañgi ti endegsi minjrej,

² “Dal anjam qalie tamo nañgi ti Farisi nañgi ti Moses aqa ñam osib dal anjam plaltoqnsib ningi mernejeqnub.

³ Deqa anjam kalil nañgi na mernejeqnub qaji di ningi quisib dauryoqniy. Ariya kumbra nañgi yeqnub qaji di ningi dauryaib. Nañgi anjam maroqnsib ariya nañgi segi anjam di dauryosaieqnub.

⁴ Nañgi gulbe kokba tamo ungasari nañgi enreqnab qoboiyoqnsib unub. Ariya nañgi olo tamo ungasari nañgo gulbe di qoboiyetnjrosaieqnub.

⁵ Kumbra kalil nañgi yeqnub qaji di tamo ungasari nañgi unoqnsib nañgo ñam soqtetnjqajqa deqa yeqnub. Nañgo kumbra bei agiende. Nañgi Qotei aqa dal anjam mutu qudei pepa kiñilaq di nengreñyoqnsibqa lopo miligiq di jigeleñyoqnsib nañgo lanjaq di gara ñeñgi na qoseqnub. Osib nañgo gara jugo mutuq di gara burbur nengren ti wala bole bole tonteqnub.

⁶ Nañgi goiyo kokbaq di, Qotei tal miligiq di sosisbqa tamo ñam ti nañgo awo jaramq di awoqajqa tulaj areboleboleinjreqnu.

⁷ Nañgi koro sawaq di tamo ungasari nañgi na nañgo ñam soqtoqnsib bañ ojetnjqajqa deqa areboleboleinjreqnu. Tamo ungasari nañgi na ‘O Qalie Tamo Koba’ degsib minjroqñqajqa deqa ti nañgi areboleboleinjreqnu.

⁸ “O ijo aŋgro, tamo qudei na ningi ‘O Qalie Tamo Koba’ degsib merŋgaib. Tamo qujai a segi nuŋgo Qalie Tamo. Niŋgi kalil was.

⁹ Mandamq endi ningi na tamo bei endegsib minjaib, ‘O Abu.’ Tamo qujai a segi nuŋgo Abu. Agi a laŋ qureq di unu.

¹⁰ Tamo qudei na ningi endegsib merŋgaib, ‘O Gate Koba.’ Tamo qujai a segi nuŋgo Gate Koba. Agi e Kristus.

¹¹ Nuŋgo ambleq di aŋgro bei a ñam ti sqa marsimqa a mati nuŋgo wau tamo soqnem. Osimqa a ñam ti sqas.

¹² Tamo kalil naŋgo segi ñam soqteqnub qaji naŋgi Qotei na olo ñam aguq atetnjrqas. Ariya tamo kalil naŋgo segi ñam aguq ateqnub qaji naŋgi Qotei na olo ñam soqtetnjrqas.”

Yesus a Juda tamo kokba naŋgo kumbra uge qa marej

¹³ Osiqa Yesus a olo marej, “O dal anjam qalie tamo ti Farisi ti, niŋgi gisanj tamo. Deqa niŋgi tulanj padalugetqab. Niŋgi anjam maro aiyelteqnub. Agi tamo uŋgasari naŋgi laŋ qureq oqwajqa gam itqa mareqnabqa niŋgi na olo gam getentetnjreqnub. Niŋgi segi laŋ qureq oqwajqa gam itqa keresai. Deqa tamo uŋgasari naŋgi dego laŋ qureq oqwajqa gam itqa yeqnab niŋgi na gam getentetnjreqnub.

¹⁴ O dal anjam qalie tamo ti Farisi ti, niŋgi gisanj tamo. Deqa niŋgi tulanj padalugetqab. Niŋgi anjam maro aiyelteqnub. Agi niŋgi uŋa qobul naŋgi gisanjnroqnsibqa naŋgo tal ti iŋgi iŋgi ti laŋa yainjreqnub. Osib tamo uŋgasari naŋgi na niŋgi nuŋgsib

nun̄go ñam soqtetñgwaqqa deqa pailyo olekokba yeqnub. Deqa mondon̄ Qotei na tamo nañgi peginqrqa batiamqa a na niñgi awai tulan̄ uge eñgwas.

15 “O dal anjam qalie tamo ti Farisi ti, niñgi gisañ tamo. Deqa niñgi tulan̄ padalugetqab. Niñgi anjam maro aiyelteqnub. Agi niñgi na tamo qujai segi niñgi daurn̄gwa maroqnsib sin̄ga na kiyo qobun̄ na kiyo sawa sawa kalil keretoqnsib laqnub. Ariya tamo qujai di a niñgi daurn̄gwas di a na niñgi buñgosim tamo tulan̄ ugedamu sqas. Deqa a niñgi qa namoosim torei ñamyuwoq aiqas.

16 “Niñgi tamo ñam qandimo bul unub. Deqa niñgi tamo nañgi gam osornjrqa keresai. Agi niñgi mareqnub, ‘Tamo bei a anjam singilatqa osimqa atra tal aqa ñam na singilatqas di aqa anjam singilaqasai. Deqa a na anjam di uratqas di kere. Ariya a gol atra tal miliq di unu qaji aqa ñam na anjam singilatqas di aqa anjam bole singilaqas. Deqa a anjam di urataiq.’ Niñgi degsib mareqnub.

17 Niñgi tamo ñam qandimo bul unub. Niñgi tulan̄ nanari. Niñgi na merbiy. In̄gi kiye a Qotei aqa ñamgalaq di tulan̄ bole? Atra tal a tulan̄ bole kiyo atra tal aqa gol a tulan̄ bole kiyo? Od, atra tal a tulan̄ bole. Ariya gol atra tal miliq di unu qaji a degó in̄gi bole.

18 Niñgi endegsib mareqnub, ‘Tamo bei a anjam singilatqa osimqa atra bijal aqa ñam na singilatqas di aqa anjam singilaqasai. Deqa a na anjam di uratqas di kere. Ariya a atraiyo in̄gi in̄gi atra bijal gogeq di unub qaji nañgo ñam na anjam singilatqas di aqa anjam bole singilaqas. Deqa a anjam di urataiq.’ Niñgi degsib mareqnub.

19 Niñgi tamo ñam qandimo bul unub. Niñgi na merbiy. Ingi kiye a Qotei aqa ñamgalaq di tulan bole? Atra bijal a tulan bole kiyo atraiyo ingi ingi atra bijal gogeq di unub qaji nañgi tulan bole kiyo? Od, atra bijal a tulan bole. Ariya atraiyo ingi ingi atra bijal gogeq di unub qaji nañgi dego bole kailil.

20 Deqa ningi quiy. Tamo bei a atra bijal aqa ñam na anjam singilatqas di a atra bijal ti ingi ingi kalil atra bijal gogeq di unub qaji nañgi ti nañgo ñam na anjam singilatqas.

21 Tamo bei a atra tal aqa ñam na anjam singilatqas di a atra tal ti Qotei agi atra tal miligiq di unu qaji a ti nañgo ñam na anjam singilatqas.

22 Tamo bei a lañ qure aqa ñam na anjam singilatqas di a Qotei ti aqa awo jaram ti nañgo ñam na dego anjam singilatqas.

23 “O dal anjam qalie tamo ti Farisi ti, ningi gisanj tamo. Deqa ningi tulan padalugetqab. Ningi anjam maro aiyelteqnub. Agi ningi dal anjam kiñilala segi dauryeqnub. Ningi lei ti lombo ti saga ti oqnsib poto 10 yoqnsib oto qujai Qotei atraiyeqnub. Ariya ningi Qotei aqa dal anjam kokba dauryqajqa urateqnub. Agi ningi kumbra bole bole dauryqa asginjeqnu. Ningi tamo nañgi qa dulosaieqnub. Ningi Qotei qa nuñgo areqalo singilatosaeqnub. Ningi dal anjam kiñilala segi dauryeqnub. Deqa e ningi endegsi merngwai. Ningi are bulyosib dal anjam kokba dauryosib laqniy. Ningi dal anjam kiñilala dego dauryqa urataib.

24 Ningi tamo ñam qandimo bul unub. Deqa ningi tamo nañgi gam osornjrqa keresai. Agi ningi qui uyqa oqnsib añañig kiñala quiq di sonaqa uno-

qnsib taqal ateqnub. Ariya kamel a quiq di sonaqa niŋgi unosaieqnub. Qoji uyeqnub.

25 “O dal anjam qalie tamo ti Farisi ti, niŋgi gisanj tamo. Deqa niŋgi tulan padalugetqab. Niŋgi anjam maro aiyelteqnub. Agi niŋgi ya gambaŋ ti tabir ti qore segi yanseqnub. Niŋgi miligi yansosaeqnub. Dego kere niŋgi baban na tamo bole. Ariya nungo are miligi bajin kumbra ti jejamu qa kumbra uge ti dena maqejunu.

26 O Farisi niŋgi tamo ḥam qandimo bul unub. Deqa niŋgi endegiy. Niŋgi mati ya gambaŋ ti tabir ti miligi yansiy. Yansib milalamqa qore dego milalqas.

27 “O dal anjam qalie tamo ti Farisi ti, niŋgi gisanj tamo. Deqa niŋgi tulan padalugetqab. Niŋgi anjam maro aiyelteqnub. Agi niŋgi tamo moiyo qaji sub bul unub. Sub gogeq di wala boledamu. ḥam qaq na liyeb. Ariya sub miliqiŋ di tamo aqa quſa ti tanu ti dena maqejunu.

28 Niŋgi sub di bul. Deqa tamo uŋgasari naŋgi na niŋgi nungoqnsib mareqnub, niŋgi tamo bole. Ariya nungo are miligi gisanj kumbra ti dal anjam gotraŋyqajqa kumbra ti dena maqejunu.”

29 Osiga Yesus a olo marej, “O dal anjam qalie tamo ti Farisi ti, niŋgi gisanj tamo. Deqa niŋgi tulan padalugetqab. Niŋgi anjam maro aiyelteqnub. Bole, niŋgi Qotei aqa medabu o tamo naŋgo sub gereyoqnsib tamo uŋgasari nami kumbra bole bole yoqneb qaji naŋgo sub walateqnub.

30 Ariya niŋgi olo endegsib mareqnub, ‘Iga nami soqnem qamu iga gago moma naŋgi ti beterosim Qotei aqa medabu o tamo naŋgi ñumosai qamu.’ Di

gisan koba. Niñgi nñjgo moma nañgi ti areqalo qujai.

³¹ Niñgi mareqnub, ‘Gago moma.’ Nñjgo anjam dena niñgi segi qa ubtosib endegsib marobuleqnub, ‘Tamo nañgi na Qotei aqa medabu o tamo nañgi ñumoqneb qaji nañgo anjro agi iga.’

³² Niñgi degsib marobuleqnub. Deqa uñgum. Nñjgo moma nañgo kumbra uge di niñgi na olo keretosib yoqniy.

³³ Niñgi amal uge bul. Deqa mondoñ Qotei a nñjgo une qa mernjsim niñgi ñamyuwoq di breiñgas. Yimqa niñgi kiyersib olo bole sqab? Keresai.

³⁴ “Deqa niñgi quiy. E na Qotei aqa medabu o tamo nañgi ti Qotei aqa powo tamo nañgi ti Qotei aqa dal anjam qalie tamo nañgi ti qariñnjroqnit nñjgoq boqnqab. Boqnibqa niñgi na nañgi qudei ñumoqnsib moiyoñjroqñqab. Osib nañgi qudei ñamburbasq di gaintnjrqab. Osib nañgi qudei ojeleñosib nñjgo Qotei tal miliq di kumbaiñnjroqñqab. Osib nañgi qudei teteinjribqa nañgi jaraiyosib qure bei beiq giloqñqab.

³⁵ Niñgi nañgi degnjroqñibqa batí deqa Qotei a nñjgo moma nañgo une kalil osim nñjgo jejamuq di atelenqas. Nñjgo moma nañgo une agiende. Nañgi na tamo ungasari kumbra bole bole yoqneb qaji nañgi ñumoqneb. Nañgo une di agi nañgi nami yqajqa utru atsib Kein na Abel qalnaq moiyej. Dena bosi bosib Berekia aqa ñiri Sekaraia atra bijal ti atra tal ti ambleq di qalnab moiyej. Une kalil di Qotei na osim nñjgo jejamuq di atelenqas.

³⁶ E bole mernjgwai. Une kalil di aqa awai uge Qotei na osim tamo uñgasari bini batí endeqa unub

qaji naŋgi enjrqas.”

Yesus a Jerusalem naŋgi qa dulej

³⁷ Osiqa Yesus a olo marej, “O Jerusalem qure, O Jerusalem qure, ni na Qotei aqa medabu o tamo naŋgi ñumoqnsim moiyoñjreqnum. Osim tamo ungasari Qotei na inoq qariñjreqnu qaji naŋgi meniŋ na ñumeqnam moreñeqnub. Bati gargekoba e ino angro naŋgi tuwe du du bul koroinjrqajqa yeqnam niŋgi saideqnub.

³⁸ Deqa niŋgi quiy. Qotei a nunjo atra tal koba uratetjimqä a laŋja sqas.

³⁹ Deqa e niŋgi endegsi merñgħwai. Niŋgi olo e nubqasai. Degtis gilsim mondon e olo laŋ qureq na boqnitqa niŋgi e nubsib marqab, ‘Tamo a bgo endi Tamo Koba aqa ñam na bgo. Deqa Qotei na a tulaŋ geregereiyeqnu.’ ”

24

Bunuqna jeu tamo naŋgi na atra tal niñaqyqab

¹ Osiqa Yesus a atra tal koba uratosiq gileqnaqa aqa angro naŋgi na aqa areq bosib atra tal osoryeb.

² Osoryonab Yesus na minjrej, “E bole merñgħwai. Atra tal niŋgi unonub endi bunuqna jeu tamo naŋgi na bosib tulaŋ niñaqyosib aqa meniŋ kalil paraparainjrsibqa taqal breinjrqab. Yimqa meniŋ bei meniŋ bei aqa quraq di sqasai. Meniŋ kalil segi segiqab.”

Gulbe kobaquja bunuqna brantqas

³ Yesus na aqa angro naŋgi degsi minjrsiqa Oliv manaq oqsiq goge di awesonaqa aqa angro naŋgi aqa areq bosib lumu nenemyeb, “Ni iga merge.

Bati gembu jeu tamo naŋgi bosib atra tal endi niñaqyqab? Mandam endi koboqa laqnimqa ni olo laŋ qureq na boqnim kumbra kiye namoqna brantim iga unsim poigwas, ‘Bati di jojomqo?’

⁴ Onaqa Yesus na kamba minjrej, “Ninji geregere ɻam atoqniy. Tamo qudei na ninji gisaŋgo uge.

⁵ Bunuqna gisanj tamo gargekoba naŋgi ijo ñam na boqnsib tamo uŋgasari naŋgi endegsib minjroqinqab, ‘E Kristus.’ Degr̄sib tamo uŋgasari tulan̄ gargekoba naŋgi gisaŋjroqinqab.

⁶ Bunuqna sawa bei bei qaji naŋgi aŋ na qotokobaoqinqab. Ninji deqa quisib ulaaib. Qotei a nami marej, ‘Kumbra di brantqas.’ Deqa brantem. Ariya kumbra di brantimqa diŋo bati urur brantqasai. Soboleiyosim brantqas.

⁷ Bati deqa sawa bei ti sawa bei ti qotoqinqab. Mandor qudei naŋgi tigeloqnsibqa mandor qudei naŋgi qoto itnjroqinqab. Sawa bei beiq di mimiŋ kokba ti mam ti inji saio bati dego brantelenqas.

⁸ Kumbra kalil di uŋga aŋgrotqa osiqa mati jaqatin̄ kiñala eqnu dego kere.

⁹ “Bati deqa naŋgi na ninji ojeleŋoqnsib jaqatin̄ ti gulbe ti engoqinqab. Osib ninji qudei luŋgsib moiyoŋgwab. Ninji ijo ñam ejunub deqa sawa bei bei qaji naŋgi ninji qa tulan̄ ugeoqnsib jeutŋgoqinqab.

¹⁰ Bati deqa tamo uŋgasari gargekoba e qa naŋgo areqalo singilato qaji naŋgi ijo ñam ulontosib segi segi jeu sqab. Sosibqa naŋgo segi was naŋgi ojeleŋoqnsib tamo uge naŋgo banq di atoqinqab.

¹¹ Gisanj tamo tulan̄ gargekoba naŋgi boqnsib ijo segi tamo uŋgasari naŋgi endegsib minjroqinqab, ‘E

Qotei aqa medabu o qaji tamo bole.' Degtib naŋgi gisanŋnjroqnqab.

¹² Kumbra uge deqaji tulan̄ kobaqnimqa tamo gargekoba naŋgi qalaqalaiyo kumbra uratoqnqab.

¹³ Ariya niŋgi ijo ŋam siŋgila na ojsib gilsib diŋo bati itqab di Qotei na niŋgi eleŋqas.

¹⁴ Ijo wau tamo naŋgi sawa sawa kalil keretoqnibqa Qotei aqa anjam bole mare mare laqnqab. Amqa diŋo bat̄i brantqas. Anjam bole di aqa damu agiende. Qotei na aqa segi tamo uŋgasari naŋgi taqatnjsim naŋgo Mandor Koba sqas."

Ingi tulan̄ ugedamu brantqas

¹⁵ Osiqa Yesus a olo aqa aŋgro naŋgi endegsi minjrej, "Diŋo batiamqa ingi tulan̄ ugedamu Qotei aqa medabu o tamo Daniel a nami deqa marej qaji di brantim niŋgi unqab. Ingı ugedamu di a Qotei aqa getento warum miliq di tigelesqas." E Matyu. Tamo uŋgasari ijo anjam endi sisiyeqnub qaji naŋgi geregere sisiyosib poinjrem. Poinjrim marqab, bole.

¹⁶ Osiqa Yesus na aqa aŋgro olo endegsi minjrej, "Niŋgi ingi ugedamu di unsibqa bati deqa tamo uŋgasari Judia sawaq di unub qaji naŋgi jaraiyosib manaq oqoqujatebe.

¹⁷ Tamo uŋgasari tal meq di unub qaji naŋgi jaraiqa oqnsib ingi ingi oqa osibqa olo warum miliq gilaib. Naŋgi jaraiyoqujatebe.

¹⁸ Tamo uŋgasari wauq di unub qaji naŋgi jaraiqa oqnsib naŋgo gara jugo oqa osibqa olo puluosib qureq baib. Naŋgi torei dena jaraiyoqujatebe.

19 Bati deqa uŋa gumaŋ ti uŋa aŋgro mom ti jaraiyo baŋgioqnsib gulbe koba oqab.

20 Deqa niŋgi endegsib pailyoqniy, ‘Gulbe di awa bati qa brantaiq. Yori bati qa dego brantaiq.’

21 Niŋgi degsib pailyoqniy. Di kiyaqa? Bati deqa tamo uŋgasari naŋgi gulbe tulaj kobaquja oqab. Gulbe deqaji nami brantosaiqnej. Qotei na mandam atej bati deqa gulbe deqaji brantosai dena bosi bosiq agi bini unum. Bunuqna laŋa ambleq di dego brantqasai. Agi bati qujai deqa brantqas.

22 Gulbe di aqa bati Qotei na truqutqas. A na truqutqasai di tamo uŋgasari kalil naŋgi padalekritqab. Aqa segi tamo uŋgasari nami giltnjrej qaji naŋgi padalaib deqa a na gulbe di aqa bati truqutqas.

23 “Bati deqa tamo qudei na mernŋwab, ‘Niŋgi uniy. Kristus bqo agiende’ o ‘Kristus bqo agide.’ Degsib mernŋibqa niŋgi naŋgo anjam quetnjraib.

24 Tamo qudei naŋgi bosib gisaŋjosib marqab, ‘E Kristus.’ Qudei marqab, ‘E Qotei aqa med-abu o qaji tamo bole.’ Degsib maroqnsib maŋwa kokba babtoqnqab. Naŋgo maŋwa dena naŋgi na tamo uŋgasari kalil areqalo niňaqyetnjroqnqab. Osib Qotei aqa segi tamo uŋgasari nami giltnjrej qaji naŋgi dego areqalo niňaqyetnjrqajqa waquoqnqab.

25 “Niŋgi quiy. Kumbra kalil di brantosaisonqa e namoqna mernŋgonum.

26 Deqa tamo qudei na niŋgi endegsib mernŋwab, ‘Niŋgi uniy. Kristus bqo agi wadau sawaq di unu.’ Degrıb mernŋibqa niŋgi naŋgo anjam di dauryosib wadau sawaq gilaib. Tamo qudei na niŋgi

merηgwab, ‘Kristus bqo agi talq di unu.’ Degtisib merηgibqa niηgi naηgo anjam quetnjraib.

27 Niηgi qalie, kola minjaleqnaqa laη kalil suwanjeqnu. Dego kere e Tamo Aηgro laη qureq na boqnitqa tamo ungasari kalil naηgi e nubqab.

28 “Tamo naηgo jejamu qusaeqnu qaji sawa dia qal naηgi koroqab.”

Tamo Aηgro a siηgila ti riaη ti bqas

29 Osiqa Yesus a olo marej, “Gulbe kalil di naηgo batı koboamqa seη ambruqas. Bai dego suwanqasai. Bongar naηgi laη goge na ululonjosib mandamq aiyelenqab. Laη goge dia iηgi iηgi kalil reηgiyelenqab.

30 Batı deqa e Tamo Aηgro bqai. Ijo toqor a laη goge dia brantimqa tamo ungasari sawa sawa kalilq di unub qaji naηgi e qa akamugetqab. E siηgila ti riaη ti lanbiq na boqnit tamo ungasari kalil naηgi e nubqab.

31 Yimqa e siηgila na gul anjamosiy ijo laη aηgro naηgi qariηnjritqa naηgi sawa sawa kalil keretosib Qotei aqa segi tamo ungasari nami giltnjrej qaji naηgi laη utru utruq na koroinjrqab.”

Niηgi qura qa yawo anjam dena poiηgem

32 Osiqa Yesus a olo marej, “E na qura qa yawo anjam niηgi mernjgitqa dena poiηgwas. Qura baηga qalsim olo ñalguyoqnimqa niηgi unsib qalieqab, ‘Seη aqa batı jojomqo.’

33 Dego kere kumbra kalil e ubtosim merηgonum qaji endi brantimqa niηgi unsib endegsib qalieoiy, ‘Bole, Kristus bqajqa batı jojomqo. A siraηmeq di tigelejunu.’

34 E bole mern̄gwai. Tamo uŋgasari bini bati endeqa unub qaji naŋgi kalil moreŋosaisoqnibqa kumbra kalil endi brantelenqas.

35 Laŋ ti mandam ti koboqab. Ariya ijo anjam koboqa keresai.”

Yesus bqajqa bati di tamo bei a qaliesai

36 Osiqa Yesus a olo marej, “Ijo bqajqa bati tamo qujai bei a qaliesai. Lan aŋgro naŋgi qaliesai. E Qotei aqa Niri e segi dego qaliesai. Ijo Abu a segi qalie.

37 Noa aqa bati qa tamo uŋgasari naŋgi kumbra yoqneb dego kere e Tamo Aŋgro bqajqa bati qa tamo uŋgasari naŋgi kumbra degyoqnqab.

38 Agi Noa aqa bati qa mandam ya maqosaison-aqa tamo uŋgasari naŋgi inŋi ti ya ti uyoqnsib uŋa ban ojelenqnsib sonabqa Noa a qobun miliq gilej.

39 Mandam ya maqosim naŋgi padaltnjrqas naŋgi deqa qaliesai. Naŋgi laŋa nanari soqneb. Sonabqa gulbe di naŋgoq di brantej. Dego kere e Tamo Aŋgro bqajqa bati qa tamo uŋgasari naŋgi nanari degsib sqab.

40 Tamo aiyel wau qujaiq di inŋi yagoqnibqa Qotei na bei laŋ qureq osi oqsimqa bei uratim sqas.

41 Uŋa aiyel tal qujaiq di saplaŋ gereiyoqnibqa Qotei na bei laŋ qureq osi oqsimqa bei uratim sqas.

42 Deqa niŋgi geregere ŋam atiy. E nun̄go Tamo Koba. E bati gembu bqai di niŋgi qaliesai.

43 Niŋgi are qaliy. Bati gembu bajin tamo a bosim tal paratqas di tal lanja a qalieqasai. A

nami qalieosiq sonaq qamu bajiq tamo bosiq tal paratqa yonaq unsiq wiyej qamu.

44 Dego kere e Tamo Aŋgro bqajqa batı ningi qaliesai. E bosiy niŋgi pruqtıgaim deqa ningi geregere ɻjam atoqnsib e qa tarıñoqnsib soqniy.”

Tamo yai a kaŋgal tamo bole?

45 Osiqa Yesus a olo marej, “Kaŋgal tamo yai a areqalo bole ti sosiqa gaigai wau bole yeqnu? Kaŋgal tamo di tal lanja na endegsi minjgas, ‘Ni na ijo kaŋgal tamo kalil naŋgi geregere taqatnjroqnsimqa nango ingi uyqajqa batioqnimqa ingi anainjroqnsim soqne.’

46 Degsi minjsimqa sawa beiq gilsim di sqas. Olo puluosim wau kalil a na aqa kaŋgal tamo yej qaji di kalil keretosim soqnimqa a bosim unimqa kaŋgal tamo di a tulan areboleboleiyqas.

47 Deqa e bole mern̄gawai. Kanŋal tamo di a wau boledamu yej deqa tal lanja na aqa ingi ingi kalil osim aqa banq di atim a na taqatetoqnqas.

48 Ariya kanŋal tamo di a tamo uge sqas di a endegsi are qalqas, ‘Ijo tamo koba a urur bqasai.’

49 Degsi are qalsimqa a na kanŋal tamo qudei a ombla wauo qaji naŋgi laŋa laŋa kumbainjroqnqas. Osim wain uyo tamo qudei naŋgi joqsim koba na ingi ti wain ti uyoqnsib nanarioqqnqab.

50 Aqa tamo koba bqajqa batı a qaliesai deqa a kumbra degsim yoqnimqa aqa tamo koba brantoujatosim unimqa a tulan prugugetqas.

51 Deqa aqa tamo koba a na qalougetosim gisan tamo nango so sawaq waiyim aiqas. Sawa dia

tamo naŋgi tulanj akamkobaoqnsib pailoqnsib naŋgo jaqatinj qa qalagei anjam atoqnqas.”

25

Duŋgeŋge 10 naŋgo yawo anjam

¹ Osiqa Yesus a olo marej, “Qotei laŋ qureq di unu qaji a na aqa segi tamo uŋgasari naŋgi taqatnjsim naŋgo Mandor Koba sqas. Kumbra di duŋgeŋge 10 naŋgo kumbra sigitejunu. E deqa ningi saingwai. Tamo bei a uŋa banj ojej. A uŋa banj ojqa sawaq gilqa laqnaqa duŋgeŋge 10 naŋgi a ombla gilqa marsib naŋgo segi segi lam osib walwelosib aisib gamq di a qa tariŋoqneb.

² Duŋgeŋge 5 naŋgi nanari. Duŋgeŋge 5 naŋgi powo ti.

³ Duŋgeŋge nanari naŋgo lam miliq di ya kiňala segi soqnej. Naŋgi lam ya bei o ti aiyosai.

⁴ Duŋgeŋge powo ti naŋgi naŋgo lam osibqa lam ya jaliŋaq di qamsib o ti aiyeb.

⁵ Ariya tamo a uŋa banj ojqa sawaq urur gilosai. A sokobaiyej. Deqa duŋgeŋge 10 naŋgi gamq di a qa tariŋosib sonabqa urŋamnjrnaqa ḡereljeb.

⁶ “Nerejesonabqa qolo jige tamo qudei naŋgi maosib mareb, ‘Tamo uŋa banj ojqa qaji agi gileqnu. Deqa ningi tigelosib walwelosib gamq di a turoiy.’

⁷ Onaqa duŋgeŋge 10 naŋgi tigelosib naŋgo lam gereiyeb.

⁸ Gereiyoqnsibqa duŋgeŋge nanari naŋgi na duŋgeŋge powo ti naŋgi minjreb, ‘Niŋgi lam ya kiňala egiy. Gago lam ya saiqa deqa mosoqa laqnu.’

9 Onaqa duñgenge powo ti nañgi na kamba minjreb, ‘Lam ya endi gago segi qa kere. Iga niñgi qa ti keresai. Deqa niñgi olo sumsib nuñgo segi lam ya awaiiyiy.’

10 Onaqa duñgenge nanari 5 nañgi tigelosib lam ya awaiyqajqa sumeqnabqa tamo di a uña ban ojqa sawaq giloqnej. Gileqnaqa duñgenge powo ti nañgi nami nañgo lam gereiyosib soqneb deqa nañgi na tamo di dauryosib uña ban ojqa sawaq gileb. Gilsib tal miliq gilekritosib sirañ kabuteb.

11 “Sokiñalayonaq duñgenge nanari nañgi tal meq di brantosib maosib tamo di minjeb, ‘O Tam Koba, iga bonum. Ni na sirañme waqtetgime.’

12 Onaqa a na kamba minjrej, ‘E bole mern̄gwai. E niñgi qaliesai.’ ”

13 Osiqa Yesus a olo marej, “Dego kere niñgi geregere ñam atsib soqniy. Di kiyaqa? Ijo bqajqa bati niñgi qaliesai deqa.”

Silali taqatqajqa yawo anjam

14 Osiqa Yesus a olo marej, “Qotei na aqa segi tamo uñgasari nañgi taqatn̄rsim nañgo Mandor Koba sqas. Kumbra di tamo bei a sawa isaq gilsiq di soqnej dego kere. A gilqa osiqa aqa kañgal tamo nañgi koroinjrsiqa nañgi na aqa silali taqatqa minjrsiqa nañgo banq di uratetnjrej.

15 A na aqa kañgal tamo nañgo segi segi siñgila pegiyetn̄rsiqa nañgi wau yqajqa kere dego silali pupoiyosiqa enjrej. Bei 5,000 kina yej. Bei 2,000 kina yej. Bei 1,000 kina yej. Osiqa a sawa isaq gilsiq di soqnej.

16 Sonaqa kañgal tamo 5,000 kina ej qaji a silali dena wauosiqa olo 5,000 kina bei ej.

¹⁷ Kañgal tamo 2,000 kina ej qaji a dego silali dena wauosiqa olo 2,000 kina bei ej.

¹⁸ Ariya kañgal tamo 1,000 kina ej qaji a silali dena wauosai. A silali di osi gilsiqa mandamq di sub bogsiqa sub miliqiñ di ulitonaq soqnej.

¹⁹ “Bati olekoba yala koboonaqa tamo koba a olo puluosi bosicha aqa kañgal tamo nañgi wauqa silali enjrej qaji di metnjrej. Metnjrnaqa nañgi aqa areq bonabqa a na minjrej, ‘E nami silali engem qaji dena ningi waeub olo silali di osorbiy.’

²⁰ Onaqa kañgal tamo 5,000 kina ej qaji a na 5,000 kina bei osi bosicha aqa tamo koba minjej, ‘O Tamo Koba, ni unime. Ino 5,000 kina nami ebem qaji dena e wauonamqa olo 5,000 kina bei brantej agiende.’

²¹ Onaqa aqa tamo koba a na minjej, ‘Ni kañgal tamo bolequja. Ni wau kiñala geregere taqatonum deqa e wau gargekoba olo ino banq di uratitqa ni na taqatoqnqam. Deqa ni bosim e ombla areboleboleigim sqom.’

²² “Onaqa kañgal tamo 2,000 kina ej qaji a bosicha aqa tamo koba minjej, ‘O Tamo Koba, ni unime. Ino 2,000 kina ebem qaji dena e wauonamqa olo 2,000 kina bei brantej agiende.’

²³ Onaqa aqa tamo koba a na minjej, ‘Ni dego kañgal tamo bolequja. Ni wau kiñala geregere taqatonum deqa e wau gargekoba olo ino banq di uratitqa ni na taqatoqnqam. Deqa ni bosim e ombla areboleboleigim sqom.’

²⁴ “Onaqa kañgal tamo 1,000 kina ej qaji a bosicha aqa tamo koba minjej, ‘O Tamo Koba, ni que. E nami qalieem, ni tamo ñirinj ani. Tamo qudei nañgi ingi yageqnab melieqnaqa ni segi na otorosim

uyeqnum. Tamo qudei naŋgi saga yago breiyeq nab boleeqnaq ni segi na koroiyooqnsim uyeqnum.

²⁵ Deqa e ni qa ulaosim ino 1,000 kina ebem qaji di osi gilsimqa mandamq di sub bogsim sub miliqi q di ulitonam soqnej agiende.'

²⁶ "Onaqa aqa tamo koba a na minjej, 'Ni kaŋgal tamo uge. Ni lola ani. Ni nami qalieem, tamo qudei naŋgi iŋgi yageqnab melieqnaqa e segi na otorosim uyeqnum. Tamo qudei naŋgi saga yago breiyeqnab boleeqnaq e segi na koroiyooqnsim uyeqnum. Ni nami e qa degsim qalieem.

²⁷ Deqa ni kiyaqa ijo silali di osi gilsim silali talq atosai? Ni di atem qamu e bosimqa silali talq dena ijo silali aqa oto kobaqo qamu tuttosim onum qamu.'

²⁸ Degsi minjsiqa aqa kaŋgal tamo qudei naŋgi minjrej, 'Niŋgi 1,000 kina di yaiyosibq a kaŋgal tamo nami wauosiqa 10,000 kina ejunu qaji di olo yi.

²⁹ Niŋgi degiy. Di kiyaqa? Tamo a wau geregere taqatoqnqas di Qotei na olo wau yimqa a wau gargekoba taqatoqnqas. Ariya tamo a wau geregere taqatqasai di wau kiňala a na taqatejunu qaji di a olo bunu taqatqasai. Qotei na a kobotimqa a laŋa sqas.

³⁰ Deqa niŋgi na kaŋgal tamo uge di qalaq di waiyibq a sawa ambruq di soqnem. Sawa dia naŋgi akamkobaoqnsib pailoqnsib naŋgo jaqatin q a qalagei anjam atoqnqas.' "

Mondoŋ Tamo Aŋgro a bosim tamo uŋgasari kalil naŋgi peginjrqas

31 Osiqa Yesus a olo marej, “Mondoŋ e Tamo Angro ñam kobaquja oqai. Osiy laŋ aŋgro kalil naŋgi joqsiy mandamq aisiy ijo segi awo jaram kobaq di awesqai.

32-33 Awesoqnit sawa bei bei qaji kalil naŋgi bosib ijo ulatamuq di koroabqa e na naŋgi pegin-jrqai. E na naŋgi qudei ijo baŋ woq di atelenjosiy olo naŋgi qudei ijo baŋ qonanq di atelenqai. Wagme taqato tamo naŋgi na kaja ti meme ti naŋgi peginjreqnub dego kere.

34 Osiy tamo ungasari ijo baŋ woq di unub qaji naŋgi endegsi minjrqai, ‘Ijo Abu a niŋgi qa tulan areboleboleiyeqnu. Nami a mandam atej bati deqa a nungo Mandor Koba sosim niŋgi taqatŋwajqa gam gereiyetŋgej. Deqa niŋgi ijoq babqa ijo Abu na niŋgi taqatŋwas.

35 Di kiyaqa? E mambonaqa niŋgi na e ingi anaibeb. E ya qarbonaqa niŋgi na e ya anaibeb. E yaun tamo sonamqa niŋgi na e osib nuŋgo talq di gereibeb.

36 E gara saiqoji sonamqa niŋgi na gara tigetbeb. E maibonaqa niŋgi na e taqatbeb. E tonto talq di sonamqa niŋgi na bosib e gereibeb.’

37 “E na tamo ungasari ijo baŋ woq di unub qaji naŋgi degsi minjritqa naŋgi e kamba nenembqab, ‘O Tamo Koba, bati gembu ni mammonaqa iga na ingi anaimem? Bati gembu ni ya qarmonaqa iga na ya anaimem?

38 Bati gembu ni yaun tamo sonamqa iga ni osim gago talq di gereimem? Bati gembu ni gara saiqoji sonamqa iga na gara tigetmem?

39 Bati gembu ni maimonaqa iga na taqatmem?

Bati gembu ni tonto talq di sonamqa iga bosim ni gereimem?’

40 “Naŋgi e degsib nenembibqa e na kamba minjrqai, ‘E bole merŋgwai. Niŋgi na ijo was ñam saiqoji unub qaji naŋgi geregereinjroqneb di agi niŋgi e dego gereiboqneb.’

41 “Ariya e na tamo uŋgasari ijo baŋ qonanq di unub qaji naŋgi endegsi minjrqai, ‘Niŋgi tamo uŋgasari tulaŋ ugedamu. Deqa niŋgi jaraiiy. Jaraiyosib aisib ɻamyuwo gaigai yuejunu qaji dia soqniy. Satan aqa laŋ aŋgro naŋgi ti dia sqab. Qotei a nami ɻamyuwo di naŋgi gereiyetnjrej.

42 Deqa niŋgi ɻamyuwo deq aiyiy. Di kiyaqa? E mambonaqa niŋgi na e inŋi anaibosai. E ya qarbonaqa niŋgi na e ya anaibosai.

43 E yaŋt tamo sonamqa niŋgi na e osib nuŋgo talq di gereibosai. E gara saiqoji sonamqa niŋgi na gara tigetbosai. E maibonaqa niŋgi na e taqatbosai. E tonto talq di sonamqa niŋgi na bosib e gereibosai.’

44 “E na tamo uŋgasari ijo baŋ qonanq di unub qaji naŋgi degsi minjritqa naŋgi e kamba nenembqab, ‘O Tamo Koba, bati gembu ni mammej? Bati gembu ni ya qarmej? Bati gembu ni yaŋt tamo soqnem? Bati gembu ni gara saiqoji soqnem? Bati gembu ni maimej? Bati gembu ni tonto talq di soqnem? O Tamo Koba, bati gembu ni degsi sonamqa iga ni numsim gereimosai?’

45 “Naŋgi e degsib nenembibqa e na kamba minjrqai, ‘E bole merŋgwai. Niŋgi na ijo was ñam saiqoji unub qaji naŋgi gereinjrosaioqneb di agi niŋgi e dego gereibosaioqneb.’

46 E na naŋgi degsi minjrsiyqa naŋgo awai uge enjrsiy breinjrit ɻamyuwoq aiqab. Dia naŋgi bati gaigai jaqatin ɻeqnub sqab. Ariya tamo ungasari kumbra bole yeqnub qaji naŋgi ɻambile gaigai sqab.”

26

Juda tamo kokba naŋgi Yesus qalib moiqajqa gam ɻamoqneb

1 Yesus a anjam kalil di marsiq koboonaqa a na aqa anŋro naŋgi endegsi minjrej,

2 “Niŋgi qalie, yori bati koba jojomqo. Bati aiyel unu. Yori bati di brantimqa Juda tamo kokba naŋgi na e Tamo Anŋro ojsib jeu tamo naŋgo banq di atqab. Atibqa naŋgi na e ɻamburbasq di lubib moiqai.” Yesus na aqa anŋro naŋgi degsi minjrej. Yori bati di Qotei a nami Israel naŋgi Isip sawaq di padalqa laqnabqa aqaryainjrej deqa olo are qalqajqa bati.

3 Yori bati di jojomej deqa atra tamo kokba ti Israel naŋgo gate naŋgi ti gilsib atra tamo gate aqa ñam Kaiafas aqa talq di koroeb.

4 Koroosib endegsib nenemoqneb, “Iga kiyersim Yesus lumu na ojsim qalsim moiyyotqom?”

5 Osib mareb, “Iga yori bati qa Yesus ojqasai. Ojqom di tamo ungasari naŋgi iga nugsib ɻiriŋosib qoto tigelto uge.”

Uŋa bei a goreŋ quleq ti osiq Yesus aqa gateq di bilentej

6 Onaqa Yesus a Betani qureq gilsicha tamo bei nami yu na aqa jejamu ugeelenjej qaji aqa ñam Saimon aqa talq di soqnej.

⁷ Sosiqa ingi uyeqnaqa uña bei a goreñ quleq ti tulañ boledamu silali kobaquja na awaiyej qaji di jalinjaq jigsipa osi bosiqa Yesus aqa gateq di bilentej.

⁸ Onaqa Yesus aqa aŋgro naŋgi uña di aqa kumbra unsibqa ɻirinjosib segi segi maroqneb, “Uña di a kiyaqa goreñ di laŋa ñanŋuiyqo?

⁹ A goreñ di osiq tamo qudei enjrqo qamu silali kobaquja yonub qamu gilsiq tamo ingi ingi saiqoji naŋgi jeisi enjrqo qamu di kere.”

¹⁰ Onaqa Yesus a naŋgo areqalo di qalieosiqa minjrej, “Niŋgi kiyaqa uña di gulbe yeqnum? A kumbra bole ebqo.

¹¹ Tamo ingi ingi saiqoji naŋgi bati gaigai niŋgi ti sqab. Ariya e bati gaigai niŋgi ti sqasai.

¹² E moiqai. Moiyitqa e subq atqab. Uña di a e qa are qalsiqa ijo jejamuq di goreñ bilentosiq dena ijo jejamu subq atqajqa gereiyetbqo.

¹³ E bole mern̄gwi. Bunuqna ijo wau tamo naŋgi sawa sawa kalilq di ijo anjam bole mare mare laqnsibqa uña endena kumbra ebqo qaji deqa are qaloqnsib a qa saoqnqab.”

Judas a Yesus osim atra tamo kokba naŋgo baŋq di atqas

¹⁴ Onaqa Judas Iskariot a tigelosiqa atra tamo kokba naŋgoq gilej. Judas a Yesus aqa aŋgro 12 naŋgi deqaji bei.

¹⁵ A naŋgoq gilsipa minjrej, “Niŋgi na awai kiye ebibqa e Yesus osiy nunjo baŋq di atqai?” Onaqa naŋgi na meniŋ silali 30 yeb.

¹⁶ Yonab a gilsipa a Yesus osim naŋgo baŋq di atqajqa gam ɻamoqnej.

Yesus aqa angro naŋgi ti yori bati aqa iŋgi uyeb

¹⁷ Ariya Bem Tiyosai Qaji Uyqajqa Bati branton-aqa Yesus aqa angro naŋgi aqa areq bosib minjeb, “O Tamo Koba, ni iga merge. Iga aisim tal qabia yori bati aqa iŋgi iŋgi gereiyetmonamqa ni iŋgi uyqam?”

¹⁸ Onaqa Yesus na kamba minjrej, “Ninji aisib qure ambleq di tamo bei itqab. Itosib minjiy, ‘Qalie Tam a marqo, “Ijo bati jojomqo. Deqa e ijo angro naŋgi koba na ino talq di awoosim yori bati aqa iŋgi uyqom.”’”

¹⁹ Onaqa Yesus aqa angro naŋgi qure miligiq aisib anjam kalil Yesus na minjrej qaji degsib brantonab dauryosib iŋgi iŋgi kalil gereyeleñeb.

²⁰⁻²¹ Onaqa bilaqtonaq Yesus aqa angro 12 naŋgi ti koba na aisib tal gogetosib awoosib iŋgi uyoqnsibqa Yesus na naŋgi endegsi minjrej, “E bole merngwai. Ninji ijo angro 12. Nunjo ambleq dena angro bei a tigelosim e osim tamо qudei naŋgo banq di atqas.”

²² Degsi minjrnaq quisibqa are tulan gulbein-jrnaqa segi segi Yesus nenemyoqneb, “O Tamо Koba, ni e qa kiyo maronum?”

²³ Onaqa minjrej, “Angr aqo ombla endego tabir qujaiq di bem quiq di tuqteqnum qaji a na e osim tamо qudei naŋgo banq di atqas.

²⁴ Niŋgi quiy. E Tamо Angr moiqai. Nami Qotei aqa anjam degsib e qa neŋgreñeb. Deqa unjum. E anjam di dauryosiy moiqai. Ariya angr e osim tamо qudei naŋgo banq di atqas qaji a tulan padaloqetqas. A nami ɻambabosai qamu di kere.”

²⁵ Onaqa Judas agi Yesus osim jeu tamо naŋgo

banq di atqas qaji a na Yesus nenemyej, “O Tamo Koba, ni e qa kiyo ubtosim maronum?” Onaqa Yesus na kamba minjej, “Od. Anjam agi ni na maronum.”

Yesus na aqa angro naŋgi bem ti wain ti anainjrej

²⁶ Osiqa Yesus aqa angro naŋgi koba na ingi uyoqnsibqa Yesus a Qotei pailyosiqa bem bei osiq giŋgenyosiqa aqa angro naŋgi enjrsiqa endegsi minjrej, “Endi ijo jejamu. Osib uyiy.”

²⁷ Osiqa wain osiqa gambanq di bilentosiqa Qotei pailyosiqa aqa angro naŋgi enjrsiqa minjrej, “Ninji kalil wain endi uyiy.

²⁸ Endi ijo leŋ. Tamo unŋgasari gargekoba naŋgo une kobotetnjqajqa deqa ijo leŋ aiqas. Aisim Qotei aqa anjam bunuj nami gereiyej qaji di singlatqas.

²⁹ E ninji mern̄gawai. E wain endi olo uyqasai. Degsi gilsiy mondon diŋo batiamqa ijo Abu a nuŋgo Mandor Koba soqnimqa e ninji koba na awoosiy olo wain bunuj uyqai.”

³⁰ Yesus na aqa angro naŋgi degsi minjrsiqa naŋgi koba na louosib koboonaqa qure uratosib Oliv manaq oqeb.

Yesus na aqa angro naŋgi minjrej, “Ninji kalil e uratbosib jaraiqab”

³¹ Yesus aqa angro naŋgi ti manaq oqoqnsibqa Yesus na minjrej, “Qolo qujai endeqa ninji kalil ijo ŋnam ulontosib e uratbosib jaraiqab. Nuŋgo kumbra deqa Qotei aqa anjam bei nami endegsib neŋgreŋyeb, ‘E na kaja naŋgo mandor qalitqa kaja naŋgi segi segi jaraiqab.’ Qotei aqa anjam nami degsib neŋgreŋyeb.

32 Ariya bati qalub koboamqa e olo subq na tigelosiy ningi qa namoosiy Galili sawaq gilitqa ningi bunuqna e daurbosib dia e itbqab.”

33 Onaqa Pita na minjej, “Aŋgro kalil naŋgi ino ñam ulontosib jaraiqab e segi ino ñam ulontqasai.”

34 Onaqa Yesus na kamba minjej, “E bole mermqai. Qolo qujai endeqa ni ijo ñam ultqam. Tuwe anjamosaisoqnimqa ni gisaŋjoqalubtosim marqam, ‘E Yesus qaliesai.’”

35 Onaqa Pita a tulaŋ saidosiq minjej, “Sai. E ni ombla moiqa marimqa, uŋgum, e ino ñam ultqasai bole sai.” Onaqa Yesus aqa aŋgro kalil naŋgi anjam qujai di minjoqneb.

Jesus a Getsemani naňu aguq di aqa Abu pailyej

36 Yesus aqa aŋgro naŋgi koba na walwelosib naňu agu beiq di branteb. Naňu agu di aqa ñam Getsemani. Di brantosib Yesus na aqa aŋgro naŋgi minjrej, “Ningi endi awesoqniy. E kiňala sasalosiy ijo Abu pailyosiy bqai.”

37 Degsi minjrsiqa aqa aŋgro qalub agi Sebedi aqa ɻiri aiyel naŋgi Pita koba na joqsiqa pailyqajqa sasalej. Sasalosiqa pailyoqnsiqa a are tulaŋ gulbekobaiyej.

38 Osiqa aqa aŋgro qalub naŋgi minjrej, “E are tulaŋ gulbekobaiqbqo. Gulbe dena e moiyeprattonum. Deqa ningi e ombla endi sosimqa ɻam atoqniy.”

39 Degsi minjrsiqa olo kiňala sasalosiqa mandamq di ɻam quoqiqa Qotei pailyosiq minjej, “O ijo Abu, gam bei soqnimqa ni na marimqa gulbe endi ijoq baiq. Gulbe endi ya uge uyo bul. Uŋgum, ni ijo

areqalo dauryaim. Ni ino segi areqalo dauryosim ye.”

40 Yesus a degsi Qotei pailyosiq olo tigelosiqa aqa aŋgro naŋgo areq aisiq ɣam atej di naŋgi are gulbe na ɣereñesonab unjrej. Deqa Yesus na Pita minjej, “Niŋgi e ombla na ɣam sokiñalayqa keresai e?”

41 Niŋgi ɣereñjaib. Niŋgi ɣam sosib pailyoqniy. Yim gulbe bei nuŋgoq bqas di gulbe dena ningi uneq waingwasai. Bole, nuŋgo are miliq di ningi e daurbqajqa are unu. Ariya ningi segi gulbe di oqajqa siŋgila saiqoji.”

42 Osiqa Yesus a olo puluosi sasalosiq endegsi pailyej, “O ijo Abu, gam bei saiamqa, uŋgum, ni ino segi areqalo dauryosim marimqa e gulbe endi oqai.”

43 Degsi pailyosiq bosicha aqa aŋgro qalub naŋgi urŋamnırnaqa ɣereñesonab unjrej.

44 Unjrsiqa olo naŋgi uratnjrsiqli puluosi gilsiq a nami pailyej qaji degsi olo pailyej.

45 Osiqa a olo aqa aŋgro naŋgo areq aisiq minjrej, “Niŋgi aqaratosib geregere ɣereñejunub e? Uŋgum. Bati koboqo. Niŋgi uniy. E Tamo Aŋgro osib une tamо nango banq di atqajqa batи bqo.

46 Niŋgi tigelab gilqom. Tamо e osim nango banq di atqajqa agi brantqo.”

Judas a Yesus osiq jeu tamo naŋgo banq di atej

47 Onaqa Yesus aqa aŋgro 12 naŋgi deqaji bei agi Judas a na tamо gargekoba naŋgi sebru ti torom ti eleñonab joqsiqa Yesus aqa areq di branteb. Israel naŋgi gate naŋgi ti atra tamо kokba ti naŋgi na naŋgi qariŋnırnab Yesus ojqa beb.

48 Judas a nami naŋgi ti qairosib anjam gereiyosib a na endegsi minjrej, “E tamo kundoqyqai agide. A ojsib osib giliy.”

49 Onaqa Judas a Yesus aqa areq bosiq minjej, “O Tamo Koba, qolo bole.” Degsi minjsiq kundoqyej.

50 Kundoqyonaqa Yesus na minjej, “O was, ni kumbra kiye e ebqa bonum ni degye.” Degsi minjnaqa tamo naŋgi di brantosib baŋ waiyosib Yesus ojeb.

51 Onaqa Yesus aqa aŋgro bei na aqa sebru osiqa atra tamo gate aqa kaŋgal tamo gateq di qalqajqa sebru waiyej grotosiqa dabkala segi gentetej.

52 Onaqa Yesus na aqa aŋgro di minjej, “Ino sebru olo ate. Tamo kalil sebru na qotqab qaji naŋgi sebru na moreŋqab.

53 Ni que. E ijo Abu minjqai di a na laŋ aŋgro 72,000 naŋgi qariŋnjrimqa bosib e aqaryaibqab. Ni di qaliesai kiyo?

54 Ariya e ijo Abu degsi minjqasai. Minjqai di aqa anjam neŋgrenq di unu qaji di aqa damu bran-tqasai. Agi nami endegsib neŋgrenqe, ‘Kristus a moiqas.’ ”

55 Osiqa bati deqa Yesus na tamo naŋgi di minjrej, “E len ojo tamo unum deqa kiyo niŋgi sebru ti torom ti eleŋosib e ojqa bonub e? E bati gaigai atra tal miliqq di sosimqa Qotei aqa anjam plalto-qnem. Bati deqa niŋgi yala baŋ waiyosib e ojosai.

56 Niŋgi kumbra degyeb deqa Qotei aqa medabu o tamo naŋgo anjam neŋgrenq di unu qaji di aqa damu agi brantej.” Yesus a naŋgi degsi minjrnaqa aqa aŋgro kalil naŋgi a uratosib jaraiyeb.

Juda tamo kokba nañgi Yesus aqa jejamuq di une qametqa marsib koroeb

57 Onaqa tamo Yesus ojeb qaji nañgi na a osib atra tamo gate aqa ñam Kaiafas aqa talq osi gileb. Dia Juda gate nañgi ti dal anjam qalie tamo nañgi ti kalil koroesoqneb. Koroesonabqa tamo nañgi na Yesus osi gilsib nañgo ulatamuq di tigelteb.

58 Nañgi Yesus osi gileqnabqa Pita a kiñala isa isaq na Yesus dauryosiq uli uliosiq gilsiq torei atra tamo gate aqa tal meq di brantej. Brantosiqa nañgi Yesus kiyeryib unqajqa deqa are qalsiq qaja tamo qudei nañgo ambleq di awesoqnej.

59 Onaqa atra tamo kokba ti Juda gate nañgi ti kalil koroesosibqa nañgi gisan anjam na Yesus aqa jejamuq di une qametqa are qalsib anjam ñamoqneb. Di kiyaqa? Anjam dena nañgi Yesus qalib moiqajqa deqa.

60 Anjam ñamonab ñamonab ugeinjrej. Deqa nañgi tamo gargekoba metnjreqnab boqnsib gisan anjam Yesus aqa jejamuq di qameleñoqneb. Nañgo ambleq dena tamo aiyel tigelosib Yesus aqa jejamu laja gisanjosib mareb,

61 “Tamo endi a endegsi marnaq iga quem, ‘E Qotei aqa atra tal koba endi kongrontosiyqa batí qalub qa olo tigeltqai.’ ”

62 Onaqa atra tamo gate a nañgo anjam di quisiga a tigelosiqa Yesus aqa areq bosiq nene-myej, “Tamo nañgi endi une gargekoba ino jejamuq di qameqnub. Di ni kamba anjam bei marqasai e?”

63 Onaqa Yesus a torei mequmej. A anjam bei yala marosai. Deqa atra tamo gate na olo nene-

myej, “Qotei ɳambile gaigai unu qaji aqa ɳam na e ni nenemmqai, ni Kristus e? Ni Qotei aqa ɳiri e? Ni e merbe.”

⁶⁴ Onaqa Yesus na minjej, “Od. Anjam ni maronum di kere. Ni que. E Tamo Aŋgro. Bunuqna e laj qureq oqsiy Qotei singila koba ti unu qaji aqa banj woq di awesosiy olo laŋbiq na boqnit ningi e nubqab.”

⁶⁵ Onaqa atra tamo gate a Yesus aqa anjam di quisiqa a tulaj minjiŋ oqetonaqa aqa segi gara jugo bumbraŋyosiqa marej, “Aqa une agi a segi babtqo iga quonum. Deqa iga kiyaqa tamo bei olo metonam bosim aqa une marqas? Aqa misiliŋ anjam ningi quonub.

⁶⁶ Deqa ningi kiyersib marqab?” Onaqa naŋgi kalil mareb, “A bole une ti. Deqa qalib moiym.”

⁶⁷⁻⁶⁸ Naŋgi kalil degsib marnabqa naŋgo ambleq dena tamo qudei naŋgi tigelosib Yesus aqa ulata-muq di miselyoqnsib banj na qaloqneb. Osib aqa ɳamdamu gara na qosetosib ula poŋyoqnsib minjo-qneb, “Ni Kristus amqa ni ubtosim mare, yai na ni lumqo?”

Pita a gisəŋoqalubtosiq marej, “E Yesus qaliesai”

⁶⁹ Ariya Pita a tal meq di awesonaqa kaŋgal uŋa bei na aqa areq bosiq a minjej, “Ni dego Yesus Galili qaji aqa aŋgro bei. Ni nami a dauryosim laqnem.”

⁷⁰ Onaqa Pita a tamo kalil naŋgo ɳamdamuq di tulaj saidosiq uŋa di minjej, “Ni anjam merbonum di e qaliesai.”

⁷¹ Degsi minjsiqa tigelosiq tal qala beiq gilsiq di soqnej. Sonaqa kaŋgal uŋa bei na Pita unsiqa tamo

naŋgi Pita aqa areq di tigelesoqneb qaji naŋgi minjrej, "Tamo di a dego Yesus Nasaret qaji aqa angro bei. A nami Yesus dauryosiq laqnej."

⁷² Onaqa Pita a olo tulan̄ saidosiq marej, "E tamo di qaliesai bole sai. E bole maronum."

⁷³ Olo kiñala soboleiyonaq tamo qudei jojom di tigelesoqneb qaji naŋgi Pita aqa areq bosib minjeb, "Iga ino anjam maro na qalieonum, ni Galili qaji tamo. Dena iga poigwo, ni Yesus aqa angro bei."

⁷⁴ Onaqa Pita a olo tulan̄ singila na saidosiq marej, "E tamo di qaliesai bole sai. E bole maronum. E gisanjot Qotei na e lubem." A degsi marnaqa tuwe anjamej.

⁷⁵ Tuwe anjamonaqa Pita a quasiqa anjam nami Yesus na minjej qaji, "Tuwe anjamosaisoqnimqa ni gisaŋoqalubtosim marqam, 'E Yesus qaliesai,' anjam deqa olo are qalsiqa poiyyonaqa oqedosiqa tulan̄ akamugetej.

27

Juda tamo kokba naŋgi Yesus osib Pailat aqa banq di ateb

¹⁻² Onaqa nobqolo malu qameqnaq atra tamo kokba ti Israel naŋgo gate naŋgi ti kalil korosibqa Yesus qalib moiqajqa anjam keretoqneb. Anjam kereonaq naŋgi Yesus aqa ban̄ tontetosib osi gilsib Rom naŋgo gate Pailat aqa banq di ateb.

Judas na aqa segijejamu qalsiq moiyej

³⁻⁴ Atra tamo kokba ti Juda gate naŋgi ti Yesus qalib moiqajqa anjam keretonabqa Judas a quasiqa olo areqalo bei osiqa naŋgo areq bosiq minjrej,

“E une kobaquja yonum. Tamo e nuŋgo baŋq di atonum qaji a une saiqoji. Niŋgi a laŋa qalsib moiyatqab. Deqa meniŋ silali 30 niŋgi na ebeb qaji endi olo oiy.” Degsi minjrnaqa naŋgi na kamba minjeb, “Di gago gulbe sai. Di ino segi gulbe.”

⁵ Onaqa Judas a silali di olo osi gilsiqqa atra tal meq di breiyosiqa aisiq a segi na aqa kakroq di sil waiyosiq gainjosiq moiyej.

⁶ Onaqa atra tamo kokba naŋgi mareb, “Silali endi tamo qalib moiqajqa aqa awai. Deqa iga silali endi atra tal aqa silali ti turtqasai.”

⁷ Naŋgi degsib marsibqqa silali di olo osib web gereiyo qaji tamo bei aqa mandam mutu bei awaiyeb. Yaun tamo naŋgi moreŋoqnibqa mandam mutu dia subq atelenqajqa deqa awaiyeb.

⁸ Mandam mutu di “Leŋ Aiyo Qaji Mandam” ñam degsib waiyeb. Ñam di bini mareqnub.

⁹⁻¹⁰ Deqa anjam bei Qotei aqa medabu o tamo Jeremaia a nami marej qaji di aqa damu brantej. A endegsi marej, “Israel naŋgi Kristus aqa jejamu awaiyqa marsib meniŋ silali 30 atqab. Atsib silali di olo osib web gereiyo qaji tamo bei aqa mandam mutu bei awaiyqab. Tamo Koba a na anjam degsi merbqo.” Jeremaia a nami degsi marej.

Pailat na Yesus nenemyej, “Ni Juda naŋgo Mandor Koba e?”

¹¹ Onaqa Yesus a Pailat aqa ulatamuq di tigelon-aqa Pailat na nenemyej, “Ni Juda naŋgo Mandor Koba e?” Onaqa Yesus na minjej, “Od. Anjam ni maronum di kere.”

12 Onaqa atra tamo kokba ti Juda gate naŋgi ti Yesus aqa anjam di quſib minjinj oqetnjerñaqa Yesus gisanjyoqnsib aqa jejamuq di une gargekoba qameleñoqneb. Onaqa Yesus a torei mequmej. A anjam bei kamba yala marosai.

13 Deqa Pailat na olo Yesus nenemyej, “Naŋgi une gargekoba ino jejamuq di qameqnub. Di ni queqnum e?”

14 Onaqa Yesus a kamba anjam bei marosai. Deqa Pailat a tulanj prugugetej.

Pailat a marej, “Niŋgi Yesus a ɿamburbasq di qamiy”

15 Pailat aqa kumbra agiende. Wausau gaigai yori bati koba brantoqnimqa Juda tamo uŋgasari naŋgi tamo qujai aqa ñam maroqnibqa Pailat na tamo di tonto talq dena uratoqnsim enjroqnqas.

16 Bati deqa tamo bei aqa ñiam Barabas a tonto talq di soqnej. A leŋ ojo tamo.

17 Deqa tamo uŋgasari kalil naŋgi Pailat aqa areq di koroonabqa a na nenemnjrej, “E tamo yai tonto talq dena uratosiy engwai? E Barabas uratosiy engwai kiyo Yesus agi niŋgi Kristus qa mareqnub qaji a uratosiy engwai kiyo? Niŋgi na merbiy.”

18 Pailat a naŋgi degsi nenemnjrej. Di kiyaqa? A qaliej, atra tamo kokba naŋgi Yesus qa ugeosib deqa a ojsib Pailat aqa banq di ateb.

19 Bati di Pailat a une pegiyo qaji awo jaramq di awesonaqa aqa ɿauŋ na anjam bei pepa mutu kiňalaq di neŋgreŋyosiq Pailat aqaq qariŋyej. A endegsi neŋgreŋyej, “Yesus aqa jejamuq di une saiqoji. Deqa ni a kumbra uge bei yaim. Qolo

e ηeiobilqeiosim Yesus unonum. Deqa e are tulan̄ gulbekobaibqo.”

20 Onaqa Juda gate naŋgi ti atra tamo kokba ti naŋgi na tamo uŋgasari naŋgo areqalo tigeltetnjreb. Tamo uŋgasari naŋgi Pailat minjibqa a na Barabas uratosim enjrsim olo Yesus qalim moiqa-jqa deqa naŋgo areqalo tigeltetnjreb.

21 Onaqa Pailat na olo tamo uŋgasari naŋgi nen-emnjrej, “E tamo yai uratosiy engwai? Barabas kiyo Yesus kiyo? Niŋgi na merbiy.” Onaqa naŋgi na kamba minjeb, “Ni Barabas uratosim ege.”

22 Onaqa Pailat na olo minjrej, “E niŋgi Barabas engwajqa merbonub deqa e Yesus kiyeryqai? Agi niŋgi a qa marenqub. ‘A Kristus.’” Onaqa naŋgi kalil murqumyosib minjeb, “Ni Yesus osim ɻamburbasq di qame.”

23 Onaqa minjrej, “Kiyaqa Yesus qalit moiqas? A une kiyen yqo deqa a ɻamburbasq di qamqai?” Degsi minjrnaqa naŋgi olo tulan̄ murqumyoqn-sib wainyoqnsib minjoqneb, “Ni a ɻamburbasq di qame.”

24 Onaqa Pailat a naŋgo anjam di qusiqa endegsi poiyej, “Tamo uŋgasari naŋgi ijo anjam quetbqasai. E naŋgi saidnjqrai di naŋgi ɻirinjosib qoto tigeltqab.” Pailat a degsi poiyej deqa a tamo uŋgasari naŋgo ulatamuq di ya bei tabirq di qam-siqa ya dena aqa ban̄ yansosiqa minjrej, “Yesus a moiqas di nun̄go une. Di ijo une sai.”

25 Onaqa tamo uŋgasari naŋgi na minjeb, “Di kere. Uŋgum. Yesus a moiqas di gago une. Di gago angro naŋgo une dego.”

26 Naŋgi Pailat degsib minjnabqa a naŋgo anjam

di dauryosiqa Barabas tonto talq dena oqeç atsiqa nañgi enjrej. Enjrsiqa olo Yesus osiq qaja tamo nañgo banq di atsiqa minjrej, “Niñgi Yesus bu toqon na kumbainyyi.” Degsi minjrnaqa nañgi na Yesus osib kumbainyyeb. Kumbainyyosib koboonaqa Pailat na olo minjrej, “Niñgi Yesus ñamburbasq di qamqajqa osib giliy.”

Qaja tamo nañgi Yesus misilinyoqneb

²⁷ Pailat na qaja tamo nañgi degsi minjrnaqa nañgi Yesus osib Rom nañgo tal kobaqujaq osi gileb. Osi gilsib qaja tamo kalil nañgi metnirnar bosib tal dia koroeb.

²⁸ Koroosib Yesus aqa gara piqtetosib gara jugo olekoba lent mandor kokba nañgi gaigai jigeqnub decjadi bei osib Yesus jigeteb.

²⁹ Osib sil luwit osib lulumosib sil dena mandor nañgo gateatal bul gereiyosib aqa gateq di atetosib singila na teqiyeb. Osib bu toqon kanenjo osib Yesus aqa ban woq di yonab a mandor koba bul ojsiq tigelesoqnej. Osib aqa areq di singa pulutosib a gisan na binjiyoqnsib minjoqneb, “O Juda nañgo Mandor Koba, kaiye.”

³⁰ Degtisib Yesus minjoqnsib a miselyoqnsib bu toqon esoqnej qaji di tatruiyosib dena aqa gateq di qaloqneb.

³¹ Nañgi degsib Yesus misilinyosib koboonaqa gara lent di piqtetosib aqa segi gara olo jitgetosib aqa qawarq di ñamburbas atetosib a ban ojsib gain-tqa sawaq osi gileb.

Nañgi Yesus osib ñamburbasq di qameb

³² Nañgi Yesus osi giloqnsibqa gamq di tamo bei walwelosiq aiyeqnaqa a turosib ojsib Yesus aqa

qawarq dena ɣamburbas yaiyosib tamo di yonabqa a kamba qoboiyosiqa gam na Yesus dauryosiq giloqnej. Tamo di aqa ñam Saimon. A Sairini qure qaji.

³³ Naŋgi Yesus osi gilsib sawa agu kiñala bei aqa ñam Golgota di branteb. Ñam di aqa damu, “Tamo gate tanu.”

³⁴ Di brantosib qaja tamo naŋgi na wain ya ti kial aqa ya isa koba de ti bulyosib Yesus anaiyonab uyo oneiyonaq ugeiyonaq uratej.

³⁵ Onaqa qaja tamo naŋgi na Yesus osib ɣamburbasq di qameb. Qamsib Yesus aqa gara eleŋqa marsib giltelenjeb. Osib meniŋ silali alanjeb. Tamo yai aqa meniŋ na buŋnırqas di a na gara oqas. Degtisib marsib meniŋ silali alanjosib gara eleŋjeb.

³⁶ Onaqa Yesus a ɣamburbas goge di gainesonaqa qaja tamo naŋgi ɣamburbas utruq di awoosib Yesus taqatesoqneb.

³⁷ Osib ɣamburbas mutu gogeq di anjam endegsib neŋgreŋyeb, “Tamo endi Yesus. A Juda naŋgo Mandor Koba.” Yesus a nami maroqnej, “E Juda naŋgo Mandor Koba.” Yesus aqa une deqa osib anjam di neŋgreŋyeb.

³⁸ Bati deqa bajiq tamo aiyel dego ɣamburbasq di gaintrnsib ñumeb. Bei Yesus aqa baŋ woq di qameb. Bei Yesus aqa baŋ qonanq di qameb.

³⁹ Yesus a ɣamburbas goge di sonaqa tamo ungasari naŋgi aqa ulatamuq dena walwelosib gile beoqnsib a misiliŋyoqnsib gate gainyoqnsib minjoqneb,

⁴⁰ “Ni nami marem, ‘E atra tal koba

kongrontosiyqa bati qalub qa olo tigeltqai.' Ni degsi marem deqa ni ino segi jejamu aqaryaiye. Ni Qotei aqa Njirimqan ni ɻamburbas uratosim mandamq aiye."

41-42 Atra tamo kokba ti dal anjam qalie tamo naŋgi ti Juda gate naŋgi ti dego Yesus degsib misiliŋyoqneb. Osib segi segi maroqneb, "A na tamo uŋgasari gargekoba naŋgi aqaryainjroqnej. Ariya a na aqa segi jejamu aqaryaiyqa keresai. A Israeł naŋgo Mandor Koba boleamqa a ɻamburbas uratosim mandamq aiyimqa iga unsim marqom, 'Bole.'

43 A segi mareqnu, 'E Qotei qa ijo areqalo singilatejunum. E segi Qotei aqa Njiri.' Aqa anjam di boleamqa Qotei na endego aqaryaiyem."

44 Onaqa bajin tamo aiyel Yesus ombla gaintnjreb qaji naŋgi dego Yesus degsib misiliŋ anjam minjoqneb.

Yesus a moiyej

45 Qanam jige sen batı 12 onaqa sawa kalil tulan ambruosi sonaq gilsiq sen batı 3 onaq bilaqtej.

46 Onaqa Yesus a tulan leleŋosiqa marej, "Eloi, Eloi, lema sabaktani?" Di Hibru anjam. Anjam di aqa damu, "O ijo Qotei, O ijo Qotei. Ni kiyaqa e qoreibonum?"

47 Onaqa tamo qudei Yesus aqa areq di tigelesoqneb qaji naŋgi aqa anjam di quisib mareb, "A Elaija meteqnu."

48 Deksib marnabqa tamo bei a urur ti gilsiq gara ɻenqei bei osiq wain isa kobaq di tuqtosiqa soruq di qosisiqa osi bosicha Yesus anaiyqajqa soqtosiqa aqa medabuq di atej.

49 Onaqa tamo qudei naŋgi mareb, “Iga mati tarinjosim koqyesqom. Elaija a bosim Yesus ɣamburbasq dena osim mandamq atqas kiyo?”

50 Onaqa Yesus a olo tulan leleŋosiq mondor titosiq aqa ɣambile uratosiq moiyej.

51 Bati qujai deqa gara kobaquja atra tal miligiq di gainesoqnej qaji a goge na braŋosiq aisiq poaiyelej. Onaqa mimiŋ kobaquja dego dosiq mandam reŋgiyonaqa meniŋ kokba paraparaelejeb.

52-53 Bati deqa Qotei aqa segi tamo uŋgasari gargekoba nami moreneb qaji naŋgo sub waqelenjonabqa naŋgi olo subq na tigeleb. Bunuqna Yesus a dego subq na tigelonaqa tamo uŋgasari naŋgi di Qotei aqa qure koba Jerusalem miligiq gileb. Gilnabqa tamo gargekoba naŋgi naunjreb.

54 Ariya qaja tamo naŋgi ɣamburbas utruq di Yesus taqatesoqneb qaji naŋgo gate ombla na mimiŋ dosiq mandam reŋgiyonaq meniŋ kokba paraparaelejonab unsibqa naŋgi tulan ulauge-tosib mareb, “Bole. Tamo endi a Qotei aqa Niri.”

55-56 Uŋgasari gargekoba naŋgi isaq di tigelesosib Yesus koqyoqneb. Bei Maria Makdala qure qaji. Maria bei agi Jems Josep wo naŋgo ai. Ariya unja bei Sebedi aqa ɣiri aiyel naŋgo ai. Yesus a nami Galili sawaq di sonaqa uŋgasari naŋgi dena a dauryosib laqnsib kaŋgalyoqneb. Bati Yesus a Galili sawa uratosiq a na naŋgi joqsiqa koba na Jerusalem belejeb.

Josep a Yesus aqa jejamu osiq subq atej

57-58 Onaqa bilaqtonaqa ñoro tamo bei aqa ñam Josep a Yesus aqa jejamu osim subq atqa marsiqa Pailat a nenemyqa gilej. Josep a Arimatea qure qaji. A dego Yesus dauryoqnej qaji. Deqa a Pailat aqa talq gilsiga nenemyej, “Ni e odbimqa e Yesus aqa jejamu osiy subq atqa kere e?” Onaqa Pailat na odyosiqa aqa qaja tamo qudei nañgi minjrej, “Ninji Yesus aqa jejamu osib Josep yiy.”

59-60 Onaqa Josep na Yesus aqa jejamu osi gilsiga gara qat omu na dalaosiq aqa segi sub bunuj nami menij miligiq di gereiyej qaji dia atej. Atsiqa menij kobaquja belbeltoсиq dena sub me getentej. Osiga olo aiyej.

61 Onaqa Maria Makdala qure qaji wo Maria bei wo bosib sub areq di awoosib taqatesoqneb.

Qaja tamo nañgi sub me taqatesoqneb

62 Juda nañgo yori bati brantqa laqnej deqa yori bati aqa inđi inđi kalil gereiyosib atnab soqnej. Deqa atra tamo kokba ti Farisi nañgi ti Pailat aqa talq gilsib minjeb,

63 “O Tamko Koba, Yesus a gisanj tamo. Deqa a moiyoaisosiqa endegsi marnaq iga quem, ‘Bati qalub koboamqa e olo subq na tigelqai.’ A degsi marnaq iga quem.

64 Deqa ni ino qaja tamo qudei qariñjrimqa nañgi gilsib sub me geregere getentosib taqatesoqnebqa bati qalub koboqas. Ni degye. Ni degyqasai di Yesus aqa angro nañgi gilsib aqa jejamu bajinjosib gisanjosib tamo ungasari nañgi minjrqab, ‘Yesus a subq na tigelqo.’ Yimqa nañgo gisanj anjam di tulan kobaosim Yesus aqa gisanj anjam nami marej qaji di tulan buñyqas.”

65 Onaqa Pailat na minjrej, “Niñgi nuñgo segi qaja tamo qudei joqsib gilibqa nañgi sub me geregere getentosib taqatesqab.”

66 Pailat a nañgi degsi minjrnaqa nañgi na qaja tamo qudei nañgi joqsib gilsib minjreb, “Niñgi na sub me geregere taqatesoqniy.” Degsib minjrsib meniñ kobaquja nami sub me getentesoqnej qaji di olo geregere singilatosib sub meq di saga waiyeb. Nañgi degyeb. Di kiyaqa? Yesus aqa angro nañgi bunuqna bosib saga olo taqal atqab di tamo kalil nañgi poinjrqas, Yesus aqa angro nañgi aqa jejamu bajinjorub.

28

Yesus a olo subq na tigelej

1 Yori bati koboonaqa nebeonaq nobqolo ambru Maria Makdala qure qaji wo Maria bei wo tigelosib Yesus aqa sub unqajqa gileb.

2 Nañgi gileqnabqa Tamo Koba aqa lañ angro bei a lañ goge na aisiqa meniñ kobaquja sub me getentesoqnej qaji di belbeltosiq qalaq di atsiqa meniñ quraq di awesoqnej. Awesonaqa mimiñ kobaquja dej.

3 Lañ angro di aqa ulatamu kola bul tulanç minjalej. Aqa gara lanbi bul tulanç qat.

4 Onaqa qaja tamo sub me taqatesoqneb qaji nañgi na lañ angro di unsibqa nañgi tulanç ulaugertosib gindagindañosib mandamq di ululonjósib tamo moreño bul tindañeosqneb.

5 Onaqa lañ angro na uña aiyel di minjrej, “Niñgi ulaaib. E qalie, niñgi Yesus ñamburbasq di qameb qaji a qa ñameqnu. **6** A endi sosai. A subq na

tigelqo. Agi a nami niŋgi endegsi merngej, ‘E subq na tigelqai.’ Deqa niŋgi aiyel bosib sub miligi uniy. A ŋeioteb qaji lume agi unu.

⁷ Niŋgi unsibqa olo puluosib gurgur ti aisib Yesus aqa aŋgro naŋgi endegsib minjriy, ‘Yesus a subq na tigelqo. Tigelosiq niŋgi qa namoosiq Galili sawaq gilqo. Niŋgi dego Galili sawaq gilsib dia a itqab.’ O uŋa aiyel, e niŋgi anjam di merngwa bonum.”

⁸ Onaqa uŋa aiyel di naŋgi tulan ulaugeteb. Osib naŋgi olo areboleboleinjrej. Deqa naŋgi subq dena olo puluosib laŋ aŋgro na anjam minjrej qaji di Yesus aqa aŋgro naŋgi minjrqajqa gurgur ti aiyeb.

⁹ Aiyeqnabqa gamq di Yesus a segi naŋgi aiyel turosiga minjrej, “Nobqolo bole.” Degt minjrnaga naŋgi aiyel aqa areq bosibqa aqa siŋga ojsib a biŋiyeb.

¹⁰ Onaqa Yesus na minjrej, “Niŋgi ulaaib. Niŋgi aisib ijo was naŋgi endegsib minjriy, ‘Niŋgi Galili sawaq giliy. Gilsib dia Yesus itqab.’ ”

Qaja tamo naŋgo gisanj anjam

¹¹ Uŋa aiyel aiyeqnabqa qaja tamo qudei sub taqatesoqneb qaji naŋgi tigelosib qure miligiq aiyeb. Aisib kumbra kalil subq di brantonaq uneb qaji di atra tamo kokba naŋgi sainjreb.

¹² Sainjrnab quisibqa Juda gate kalil naŋgi metnjrnab bosib koroosib anjam qosisib qaja tamo naŋgi di silali kobaquja enjreb. Osib minjreb,

¹³ “Niŋgi na tamo uŋgasari naŋgi anjam endegsib minjroqniy, ‘Iga sub taqatosim ŋereŋesonamqa

Yesus aqa aŋgro naŋgi qolo bosib subq dena Yesus aqa jejamu bajiŋosib jaraiyeb.'

¹⁴ Yimqa Pailat a nungo anjam di qusim ningi qa ɻiriŋjamqa iga na aqa are olo latetosim anjam gereiyonamqa a niŋgi gulbe bei eŋgasari."

¹⁵ Onaqa qaja tamo naŋgi silali di osib atra tamo kokba naŋgo anjam dauryosib Yesus aqa aŋgro naŋgi na aqa jejamu subq dena bajiŋeb anjam di mare mare laqneb. Laqnab Juda tamo uŋgasari tulan̄ gargekoba naŋgi anjam di queleŋosib naŋgi kamba saoqneb agi bini saoqnsib unub.

Yesus na aqa aŋgro naŋgi wau enjrej

¹⁶ Onaqa Yesus aqa aŋgro 11 naŋgi Galili sawaq gilsib mana bei Yesus a nami naŋgi deq oqwaŋqa minjrej qaji deq oqeb.

¹⁷ Oqsib dia Yesus itosib a biŋiyosib aqa ñam soqteb. Ariya naŋgi qudei areqalo aiyelteb.

¹⁸ Onaqa Yesus a naŋgo areq gilsiq a minjrej, "Ijo Abu na ſingila kalil ijo banq di atej deqa e mandam ti laŋ ti taqatejunum.

¹⁹ Deqa niŋgi walwelosib sawa sawa kalil kere-toqnsibqa tamo uŋgasari naŋgi ijo anjam minjre minjre laqniy. Yim naŋgi e daurbqajqa deqa. Niŋgi ijo Abu aqa ñam na ti e Qotei aqa Niri ijo segi ñam na ti Mondor Bole aqa ñam na ti naŋgi yansnjroqniy.

²⁰ O ijo aŋgro, anjam kalil e nami mernŋoqnam qaji di niŋgi walwelosib tamo uŋgasari naŋgi minjroqniy. Yim naŋgi anjam di dauryqajqa deqa. Niŋgi quiy. E batı gaigai niŋgi koba na wauoqnsiy sqai. Degtisim soqnim soqnim diŋo batı brantqas."

**Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini,
2014**

copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 28 Dec 2024 from source files dated 31 Aug 2023

0eb339dc-c20a-5065-9483-338933d97585